



902H



~~80~~

Palat. XL III 1

LL

5132


517 132


MEMOIRES
DE
LA REYNE
MARGVERITE:
EDITION NOVVELLE
plus correcte.



A PARIS,
Chez JEAN RIBOV, au Palais, vis à vis
de la sainte Chapelle, à l'Image
Saint Louys.

M. DC. LXVI.







ADVIS

A V

LECTEUR.

CE Liure, Lecteur, est un de ceux qui n'ont point besoin de l'industrie d'autrui pour se rendre recommandables. Son titre est un charme si puissant, qu'il faut estre merueilleusement stupide

A ij

pour n'estre point attiré à la lecture de l'ouvrage qui est en suite, & les choses qu'il traite sont agreables, & si elegamment écrites, que celuy n'a aucune connoissance des belles choses, qui n'a vouë que cét écrit a toutes les perfections qui sont requises pour exciter l'admiration dans les esprits bien-faits. Que Rome vante tant qu'il luy plaira les Commentaires de son premier Empereur, la France a maintenant les Memoires d'une grande Reyne qui ne leur cedent en rien. Voila un Eloge bien grand, mais tres-veritable pourtant, & duquel tu ne me dédiras pas, Lecteur, si tu n'es preoccupé de cette

impertinente opinion que rien ne peut égaler ce que l'antiquité a produit , ou si une abominable malice ne te fait regarder avec envie la gloire de ta Patrie. Je ne veux pas m'étendre davantage sur ce sujet , afin qu'un plus long discours ne retarde le contentement que tu auras en la lecture de celuy de cette rare Princesse, & me contenteray de te dire que celuy auquel elle l'adresse est Messire Charles de Vironne , Baron de la Chastaigneraye , & Seigneur de Hardelay , qui estoit Chambellan du Duc d'Alençon. La Mere de Madame de Rais estoit sa tante , & luy par consequent cousin de Madame de

Rais. Quelques - uns croient
que l'adresse en soit faite à Mon-
sieur de Rendan , mais cela n'est
pas si vray-semblable.





L I V R E P R E M I E R.



E loüerois dauantage vostre œuvre si elle ne me loüoit tant; ne voulant qu'on attribuë la loüange que i'en ferois plustost à * la philastie qu'à la raison, & ainsi que l'on pense que comme Themistocle i'estime celuy dire le mieux qui me louë le plus. C'est vn commun vice aux femmes de se plaie aux loüâges bien que non meritées. Je blasme mon sexe en cela, & n'en voudrois tenir cette condition. Je tien ncant-moins à beaucoup de gloire qu'un si honneste homme que vous m'aye voulu peindre d'un si riche pinceau. En ce portrait l'ornement du tableau surpasse de beaucoup l'excellence de la figure que vous en auez voulu rendre le sujet. Si i'ay eu quelques parties de celles que vous m'attribuez, les ennuis les effaçans de l'exterieur, en ont aussi effacé la souuenance de ma memoire. De sorte que me remirant en vostre discours, ie ferois volontiers comme la vieille Madame de Rendan, qui ayât demeuré depuis la mort de son mary sans voir son miroir, rencontrant par fortune son visage dans le miroir d'un autre, demanda qui estoit celle-là. Et bien que mes amis qui me voyent me veulent per-

* *l'amour de jôy-mesme.*

A iijj

suader le contraire, ie tiens leur iugement pour suspect, comme ayans les yeux fascinez de trop d'affection. Je crois que quâd vous viendrez à l'épreuue, vous ferez en cela de mon costé, & direz, côme souuent ie l'escriis, par ces vers de du Bellay, [C'est chercher Rome en Rome, & rien de Rome en Rome ne trouuer. Mais comme l'on se plaist à lire la détruction de Troye, la grandeur d'Athenes, & de telles puissantes Villes lors qu'elles florissoient, bien que les vestiges en soiēt si petits, qu'à peine peut-on remarquer où elles ont esté; ainsi vous plaisez-vous à décrire l'excellence d'une beauté, bien qu'il n'en reste aucun vestige ny témoignage que vos escrits. Si vous l'auiez fait pour représenter le cōtraste de la nature & de la fortune, plus beau sujet ne pouuiez-vous choisir; les deux y ayans à l'enuy fait essay de l'effort de leur puissance. En celuy de la nature, en ayant esté témoin oculaire, vous n'y auez besoin d'instruction. Mais en celuy de la fortune, ne le pouuant décrire que par rapport (qui est sujet d'estre fait par des personnes ou mal informées, ou mal affectionnées, qui ne peuuent représenter le vray ou par ignorance, ou par malice) i'estime que vous receurez plaisir d'en auoir les memoires de qui le peut mieux scauoir, & de qui a plus d'interest à la verité de la description de ce sujet. I'y ay aussi esté conuiee par cinq ou six remarques que i'ay faites en vostre discours, où il y a de l'erreur, qui sont lors que vous parlez de Dau & de mon voyage de France; quand vous parlez de feu Monsieur le Marechal de Biron; quand vous parlez d'A-

gen , & aussi de la sortie de celieu du Marquis de Canillac. Je traceray mes Memoires, à qui ie ne donneray vn plus glorieux nom , bien qu'ils meritaissent celuy d'Histoire, pour la verité qui y est contenuë nuëment & sans ornement aucun , ne m'en estimant pas capable , & n'en ayant aussi maintenant le loisir. Cët œuvre donc d'vne après - disnée ira vers vous comme les petits ours, en masse lourde & difforme, pour y receuoir sa formation. C'est vn chaos , duquel vous auez déjà tiré la lumiere. Il reste l'œuvre de cinq ou six autres journées. C'est vne Histoire, certes, digne d'estre écrite par vn Cavalier d'honneur , vray François , nay d'illustre maison , nourry des Roys mes pere & freres , parent & familier amy des plus galantes & honnestes femmes de nostre temps , de la comagnie desquelles i'ay eu ce bon-heur d'estre la liaison. Les choses precedentes avec celles des derniers temps me contraignent de commencer du temps du Roy Charles , & au premier poinct où ie me puisse ressouuenir y auoir eu quelque chose remarquable à ma vie. Partant comme les Geographes qui décriuent la terre, quand ils sont arriuez au dernier terme de leur connoissance, disent ; Au delà ce ne sont que des deserts sablonneux , terres inhabitées , & mers non nauiguées , de mesme ie diray n'y auoir au delà que la vague d'vne premiere enfance, où nous viuions plustost guidez par la nature à la façon des plantes & des animaux , que comme hommes regis & gouuernez par la raison , & laisseray à ceux qui m'ont gouuerné en cët

âge-là cette superflue recherche, où peut-estre en ces enfantines actions s'en trouueroit-il d'aussi dignes d'estre escrites que celle de l'enfance de Themistocles & d'Alexandre, l'un s'exposant au milieu de la rue deuant les pieds des cheuaux d'un chartier, qui ne s'estoit à sa priere voulu arrester, l'autre mesprisant l'honneur du prix de la course s'il ne le disputoit avec des Roys. Desquelles pourroit estre la repartie que ie fis au Roy mon pere peu de iours auant le miserable coup, qui priua la France de repos & nostre maison de bon-heur. N'ayant lors qu'environ quatre ou cinq ans, & me tenant sur ses genoux pour me faire causer, il me dit que ie choisissè celuy que ie voulois pour mon seruiteur, de Monsieur le Prince de Ioinuille, qui a depuis esté ce grand & infortuné Duc de Guyse, ou du Marquis de Beaupreau, fils du Prince de la Roche-sur-Yon (en l'esprit duquel la fortune pour auoir fait trop d'effort de son excellence, excita l'ennie de la fortune iusques à luy estre mortelle ennemie, le priuant par la mort en son an quatorziesme des honneurs & Couronnes qui estoient iustement promises à la vertu & magnanimité qui reluisoient en son esprit) tous deux se iouans auprès du Roy mon pere moy les regardant. Je luy dis que ie voulois le Marquis, Il me dist; Pourquoi? il n'est pas si beau: (car le Prince de Ioinuille estoit blond & blanc, & le Marquis de Beaupreau auoit le teint & les cheueux bruns:) ie luy dis pource qu'il estoit plus sage, & que l'autre ne peut durer en patience qu'il ne fasse

tous les iours mal à quelqu'un, & veut toujours estre le maistre. Augure certain de ce que nous auons veu depuis. Et la resistance aussi que ie fis pour conseruer ma religion du temps du Colloque de Poissi, où toute la Cour estoit infectée d'heresie, aux persuasions imperieuses de plusieurs Dames & Seigneurs de la Cour, & mesmes de mon frere d'Anjou, depuis Roy de France, de qui l'enfance n'auoit pû éuiter l'impression de la malheureuse Huguenoterie, qui sans cesse me crioit de changer de religion, jettant souuent mes heures dans le feu, & au lieu me donnant des Psalmes & prieres Huguenotes, me contraignant les porter; lesquelles soudain que ie les auois ie les baillois à Madame de Curton ma Gouuernante, que Dieu m'auoit fait la grace de conseruer Catholique, laquelle me menoit souuent chez le bon homme Monsieur le Cardinal de Tournon, qui me conseilloit & fortifioit à souffrir toutes choses pour maintenir ma religion, & me redonnoit des heures & des chappelllets au lieu de ceux que m'auoit bruslez mon frere d'Anjou. Et les autres particuliers amis qui auoient entrepris de me perdre me les retrouvant, animez de courroux m'injurioient, disans que c'estoit enfance & sottise qui me le faisoit faire; Qu'il paroissoit bien que ie n'auois point d'entendement; Que tous ceux qui auoient de l'esprit, de quelque âge & sexe qu'ils fussent, oyants prescher la charité s'estoient retirés de l'abus de cette bigoterie. Mais que ie ferois aussi sottise que ma Gouuernante. Et

mon frere d'Anjou y adjoûtant les menaces, disoit que la Reyne ma Mère me feroit foïetter. Ce qu'il disoit de luy mesme, car la Reyne ma Mere ne sçauoit point l'erreur où il estoit tombé. Et soudain qu'elle le sceut le tança fort luy & ses Gouverneurs, & les faisant instruire les contraignit de reprendre la vraye, sainte, & ancienne Religion de nos peres, de laquelle elle ne s'estoit iamais départie. Le luy répondis à telles menaces fondante en larmes, comme l'âge de sept à huit ans ou i'estois lors y est assez tendre, qu'il me fist foïetter, & qu'il me fist tuër s'il vouloit, que ie souffrirois tout ce que l'on me sçauoit faire plustost que de me danmer. Assez d'autres réponses, assez d'autres telles marques de iugement & de resolution s'y pourroient elles trouuer, à la recherche desquelles ie ne veux peiner, voulant commencer mes Memoires seulement du temps que ie fis à la suite de la Reyne ma Mere, pour n'en bouger plus. Car incontinent apres le Colloque de Poissi que les guerres commencerent, nous fumes mon petit frere d'Alençon & moy, à cause de nôtre petitesse, enuoyez à Amboise, où toutes les Dames de ce pais-là se retirerent avec nous; mesme vostre tante Madame de Dampierre, qui me prist lors en amitié, qu'elle m'a continuée iusques à sa mort; & vostre cousine Madame la Duchesse de Rais, qui sceut en ce lieu la grace que la fortune luy auoit faite de la deliurer à la bataille de Dreux d'un fâcheux, son premier mary Monsieur d'Annebaut, qui estoit indigne de posséder.

vn sujet si diuin & si parfait. Je parle icy du
 principe de l'amitié de vostre tante enuers
 moy, non de vostre cousine; bien que depuis
 nous en ayons eu de si parfaite, qu'elle dure
 encore & durera tousiours. Mais lors l'âge
 ancien de vostre tante & mon enfantine ieun-
 nesse auoient plus de conuenance; estant le
 naturel des vieilles gens d'aymer les petits en-
 fans, & de ceux qui sont en âge parfait,
 comme estoit lors vostre cœusine, de mépriser
 & haïr leur importune simplicité. I'y demeu-
 ray iusques au commencement du grand
 voyage, que la Reyne ma Mere me fait reue-
 nir à la Cour pour ne bouger plus d'auprès
 d'elle. Duquel toutesfois ie ne parleray point,
 estant lors si ieune que ie n'en ay pû conser-
 uer la souuenance qu'en gros, les particuliari-
 tez s'estans esuanoüies de ma memoire com-
 me vn songe. Je laisse a en discourir à ceux
 qui estans en âge plus meur, comme vous,
 se peuuent souuenir des magnificences qui
 furent faites par tout, mesme à Bar le Duc,
 au baptesme de mon neveu le Prince de Lor-
 raine, à Lyon à la venue de Monsieur & de
 Madame de Sauoye, à Bayonne à l'entreueüe
 de la Reyne d'Espagne ma sœur, & de la
 Reyne ma mere, & du Roy Charles mon
 frere, là où ie m'assure que vous n'oublierez
 de représenter le festin superbe de la Reyne ma
 mere en l'Isle, avec le ballet, & la forme de
 la salle qu'il sembloit que la nature eust ap-
 propriée à cét effect, ayant cerné dans le mi-
 lieu de l'Isle vn grand pré en auale de bois de
 haute fustaye, où la Reyne ma Mere disposa

tout à l'entour de grâdes niches , & dans cha-
 cune vne table ronde à douze personnes , la
 table de leurs Majestez seulement s'éleuoit au
 bout de la sale sur vn haut dais de quatre de
 grez de gazons. Toutes ces tables seruies par
 troupes de diuerses Bergeres habillées de
 toile d'or & de satin , diuersement selon les
 habits diuers de toutes les Prouinces de Fran-
 ce. Lesquelles Bergeres à la descente des ma-
 gnifiques batteaux) sur lesquels venant de
 Bayonne à cette Isle l'on fust tousiours ac-
 compagné de la musique de plusieurs Dieux
 marins , chantans & recitans des vers autour
 du batteau de leurs Majestez) s'estoient trou-
 ué chaque troupe en vn pré à part aux deux
 costez d'une grande allée de pelouse , dressée
 pour aller à la susdite salle , chaque troupe
 dansant à la façon de son pais ; les Poiteuines
 avec la cornemuse , les Prouençales la volte
 avec les tymballes , les Bourguignonnes &
 Champenoises avec le petit haut-bois , le des-
 sus de violon , & tabourins de village ; les
 Bretonnes dansans les passe-pieds & branles-
 gais ; & ainsi toutes les autres Prouinces.
 Après le seruice desquelles & le festin finy,
 l'on veit avec vne grande troupe de Satyres
 musiciens entrer ce grand rocher lumineux ;
 mais plus esclairé des beantez & pierreries des
 Nymphes qui se faisoit dessus leur entrée
 que des artificielles lumieres , lesquelles des-
 cendantes vindrent danser ce beau ballet , du-
 quel la fortune enuieuse ne pouuant supporter
 la gloire , fit orager vne si estrange pluye &
 tempeste , que la confusion de la retraicte qu'il

fallloit faire la nuit par batteaux apporta le lendemain autant de bons contes pour rire, que ce magnifique appareil de festin auoit apporté de contentement, & en toutes les superbes entrées qui leur furent faites aux villes principales de ce Royaume, duquel ils visiterent toutes les Prouinces.

Au regne du magnanime Roy Charles mon frere, quelques années apres le retour du grand voyage, les Huguenots ayans recommencé la guerre, le Roy & la Reyne ma Mere estans à Paris, vn Gentil-homme de mon frere d'Anjou, qui depuis a esté Roy de France, arriua de sa part pour les aduertir, qu'il auoit reduit l'armée des Huguenots à telle extremité, qu'il esperoit qu'ils seroient contraincts de venir dans peu de iours à la bataille, & qu'il les supplioit auant cela qu'il eust cét honneur de les voir, afin que si la fortune, enuieuse de la gloire qu'en vn si ieune âge il auoit acquise, vouloit en cete desirée iournée, apres auoir fait vn bon seruice à son Roy, à sa Religion, & à cét Estat, joindre le triomphe de sa Victoire à celuy de ses funerailles, il partist de ce monde avec moins de regret, les ayant laisséz tous deux satisfaits en la charge qu'ils luy auoient fait l'honneur de luy commettre; dequoy il s'estimeroit plus glorieux, que des deux trophées qu'il s'estoit acquis par ses deux premieres victoires. Si ces paroles toucherent au cœur d'une si bonne mere qui ne viuoit que pour ses enfans, abandonnant à toute heure sa vie pour conseruer la leur & leur Estat, & qui sur

tout cherissoit celuy-là, vous le pouuez iuger. Soudain elle se resolut de partir avec le Roy, le menant avec elle, & des femmes la petite troupe accoustumée, Madame de Rais, Madame de Sauue, & moy. Estant portée des aîsles du desir & de l'affection maternelle, elle fit le chemin de Paris à Tours en trois iours & demy; qui ne fut sans incommodité, & beaucoup d'accidens dignes de risée, pour y estre le pauvre Monsieur le Cardinal de Bourbon qui ne l'abandonnoit iamais, qui toutesfois n'estoit de telle humeur, ny de complexion pour telles couruées. Arriuant au Plessis lez Tours, mon frere d'Anjou s'y trouua avec les principaux Chefs de ses armées, qui estoient la fleur des Princes & Seigneurs de France, en la presence desquels il fit vne harangue au Roy, pour luy rendre raison de tout le maniement de sa charge depuis qu'il'estoit party de la Cour, faite avec tant d'art & d'éloquence, & redire avec tant de grace, qu'il se fit admirer de tous les assistans; & d'autant plus que sa grande ieunesse releuoit & faisoit dauantage paroistre la prudence de ses paroles, plus conuenable à vne barbe grise & à vn vieux Capitaine, qu'à vne adolescence de seize ans, en laquelle les lauriers de deux batailles gagnées luy ceignoient déjà le front, & la beauté, qui rend toute action agreable, florissoit tellement en luy, qu'il sembloit qu'elle s'y fait à l'enuy avec sa bonne fortune, laquelle des deux le rendroit plus glorieux. Ce qu'en ressentoit ma Mere, qui l'aimoit vniquement, ne se peut repre-

fenter par paroles , non plus que le deüil du
 pere d'Iphigenie ; & à toute autre qu'à elle,
 de l'ame de laquelle la prudence ne desepara
 jamais , l'on eust aisément connu le tran-
 sport qu'une si excessiue ioye luy causoit.
 Mais elle moderant ses actions comme elle
 vouloit, montrant en apparence que le dis-
 cret ne fait rien qu'il ne veüille faire, sans
 s'amuser à publier sa ioye, & pousser les loüan-
 ges dehors qu'une action si belle d'un fils si
 parfait & si chery meritoit, print seulement
 les poincts de sa harangue qui concernoient
 les faits de la guerre, pour en faire deliberer
 aux Princes & Seigneurs là presents, & y
 prendre une bonne resolution, & pourvoir
 aux choses necessaires pour la continuation de
 cette guerre. A la disposition dequoy il fust
 necessaire de passer quelques iours en ce lieu;
 vn desquels la Reyne ma Mere se promenant
 dans le parc avec quelques Princes, mon fre-
 re d'Anjou me pria que nous nous prome-
 nassions en une allée à part, où estant il me
 parla ainsi; Ma sœur, la nourriture que nous
 auons prise ensemble ne nous oblige moins
 à nous aimer que la proximité. Aussi auez-
 vous pû connoistre qu'entre tous ceux que
 nous sommes de freres, i'ay tousiours eu plus
 d'inclination de vous vouloir du bien qu'à
 tout autre: & i'ay reconnu aussi que vostre
 naturel vous portoit à me rendre mesme ami-
 tié. Nous auons esté iusques icy naturelle-
 ment guidez à cela sans aucun dessein, &
 sans que telle vnion nous apportast aucune
 utilité, que le seul plaisir que nous auons de

conuerſer enſemble. Cela a eſté bon pour noſtre enfance : mais à cette heure il n'eſt plus temps de viure en enfans. Vous voyez les belles & grandes charges où Dieu m'a appellé, & où la Reyne noſtre bonne Mere m'a eſleué. Vous devez croire que vous eſtant la choſe du monde que i'ayme & cheris le plus, ie n'auray iamais grandeurs ny biens à quoy vous ne participiez. Je vous connois aſſez d'eſprit & de iugement pour me pouuoir ſeruir auprès de la Reyne ma Mere, pour me maintenir en la fortune où ie ſuis. Or mon principal appuy eſt d'eſtre conſerué en ſa bonne grace. Je crains que l'abſence m'y nuise, & toutesſois la guerre & la charge que i'ay me contraignent d'eſtre preſque touſiours eſloigné. Cependant le Roy mon frere eſt toujours auprès d'elle, la flatte, & luy complaiſt en tout. Je crains qu'à la longue cela ne m'apporte preiudice, & que le Roy mon frere deuenant grand, eſtant courageux comme il eſt, ne s'amuse touſiours à la chaſſe, mais deuenant ambitieux veuille changer celle des beſtes à celle des hommes, m'oſtant la charge de Lieutenant de Roy qu'il m'a donnée pour aller luy-meſme aux armées. Ce qui me ſeroit vne ruine & déplaiſir ſi grand, qu'auant que de receuoir vne telle cheute, i'eſſirois pluſtoſt vne cruelle mort. En cette apprehenſion ſongeant les moyens pour y remedier, ie trouue qu'il m'eſt neceſſaire d'auoir quelques perſonnes tres-fideles qui tiennent mon party auprès de la Reyne ma Mere. Je n'en connois point de propre comme vous,

que ie tiens comme vn second moy-mesme. Vous auez toutes les parties qui s'y peuuent desirer , l'esprit , le iugement , & la fidelité. Pourueu que vous me vouliez tant obliger que d'y apporter de la subjection (vous priant d'estre tousiours à son leuer , à son cabinet , & à son coucher , & bref tout le iour) cela l'obligera de se communiquer à vous , avec ce que ie luy témoigneray vostre capacité , & la consolation & seruice qu'elle en receura , & la supplieray de ne plus viure avec vous comme avec vn enfant , mais de s'en seruir en mon absence comme de moy. Ce que ie m'assure qu'elle fera. Parlez-luy avec assurance comme vous faites à moy , & croyez qu'elle vous aura agreable. Ce vous sera vn grand-heur & bon-heur d'estre aymée d'elle. Vous ferez beaucoup pour vous & pour moy ; & moy ie vous tiendray , apres Dieu , pour la conseruation de ma bonne fortune.

Ce langage me fust fort nouveau , pour auoir iusques alors vecu sans dessein , ne pensant qu'à danser ou aller à la chasse , n'ayant mesme la curiosité de m'habiller ny paroistre belle , pour n'estre en l'âge de telle ambition , & auoir esté nourrie avec telle contrainte auprès de la Reyne ma Mere , que non seulement ie ne luy osois parler ; mais quand elle me regardoit ie transissois , de peur d'auoir fait quelque chose qui luy déplût. Peu s'en fallut que ie ne luy répondisse comme Moÿse à Dieu en la vision du buisson ; *Que suis-je moy ? Enuoye celuy que tu dois enuoyer.* Toutefois trouuant en moy ce que ie ne pen-

fois pas qui y fut, des puissances excitées par l'objet de ses paroles qui auparavant m'estoient inconnuës, bien que née avec assez de courage, reuenant en moy de ce premier estonnement, ces paroles me pleurent, & me sembla à l'instant que i'estois transformée, & que i'estois deuenue quelque chose de plus que ie n'auois esté iusques alors. Tellement que ie commençay à prendre confiance de moy-mesme, & luy dis; Mon frere, si Dieu me donne la capacité & la hardiesse de parler à la Reyne ma Mere, comme i'ay la volonté de vous seruir en ce que vous desirez de moy, ne doutez point que vous n'en retiriez l'vtilité & le contentement que vous vous en estes proposé. Pour la subjection, ie la luy rendray telle que vous connoistrez que ie prefere vôtre bien à tous les plaisirs du monde. Vous aurez raison de vous asseurer de moy; car rien au monde ne vous honore & ayme tant que moy. Faites estat que moy estant auprès de la Reyne ma Mere vous y ferez vous-mesme, & que ie n'y seray que pour vous. Je proferay ces paroles trop mieux du cœur que de la bouche, ainsi que les effets le témoignerent. Car estant party de là, la Reyne m'appella à son cabinet, & me dit, Vostre frere m'a dit les discours que vous avez eu ensemble, & ne vous tient pour vn enfant. Aussi ne le veux-je plus faire. Ce me sera vn grand plaisir de vous parler comme à vostre frere. Rendez-vous subiecte auprès de moy, & ne craignez point de me parler librement; car ie le veux ainsi. Ces paroles firent ressentir à mon ame:

ce qu'elle n'auoit iamais ressentie, vn contentement si demesuré, qu'il me sembloit que tous les contentemens que i'auois eus iusques alors n'estoient que l'ombre de ce bien, regardant au passé d'un œil dédaigneux les exercices de mon enfance, la danse, la chasse, & les compagnies de mon âge, & les méprisant comme des choses trop folles & trop vaines. I'obeïs à cét agreable commandement, ne manquant vn seul iour d'estre des premieres à son leuer, & des dernieres à son coucher. Elle me faisoit cét honneur de me parler quelquefois deux ou trois heures, & Dieu me faisoit cette grace qu'elle restoit si satisfaite de moy, qu'elle ne s'en pouuoit assez louer à ses femmes. Je luy parlois tousiours de mon frere, & luy estoit aduertty de tout ce qui se passoit avec tant de fidelité, & que ie ne respirois autre chose que sa volonté.

Je fus en cette heureuse condition quelque temps auprès de la Reyne ma Mere, durant lequel la bataille de Montcontour se bailla; avec la nouvelle de laquelle mon frere d'Anjou, qui ne tendoit qu'à estre tousiours auprès de la Reyne ma Mere, luy mandoit qu'il s'en alloit assieger saint Iean d'Ange'y, & que la presence du Roy & d'elle seroit necessaire en ce siege. Elle plus desiruse que luy de le voir, se resolut soudain de partir, ne menant avec elle que sa troupe ordinaire, de laquelle i'estois, & i'allois d'une ioye extrêmement grande sans préuoir le malheur que la fortune m'y auoit préparé. Trop ieune

que i'estois & sans experience ie n'auois à suspecte cette prosperité; & pensant le bien duquel ie iouissois permanent, sans me douter d'aucun changement i'en faisois estat assésuré. Mais l'enuieuse fortune qui ne pût supporter la durée d'une si heureuse condition, me pre-paroit autant d'ennuy à cette arriuee, que ie me' promettois de plaisir par la fidelité de laquelle ie pensois auoir obligé mon frere. Mais depuis qu'il estoit party il auoit proche de luy le Guast, duquel il estoit tellement possédé, qu'il ne voyoit que par ses yeux, & ne parloit que par sa bouche. Ce mauuais homme né pour mal faire soudain fascina son esprit, & le remplit de mille tyranniques maximes; Qu'il ne falloit aymer ny se fier qu'à soy-mesme; Qu'il ne falloit ioindre personne à sa fortune, non pas mesme ny frere ny sœur, & autres tels beaux preceptes Machiauelistes. Lesquels imprimant en son esprit & les resoluant en pratique, soudain que nous fusmes arriuez, apres les premieres salutatiōs ma Mere se mit à se louer de moy, & luy dire combien fidellemēt ie l'auois seruy auprés d'elle. Il luy répondit froidement qu'il estoit bien aisé qu'il luy eust bien réussi, l'en ayant suppliée, mais que la prudence ne permettoit pas que l'on se pust seruir de mesmes expediēts en tout tēps, & que ce qui estoit necessaīre à vne certaine heure pourroit estre nuisible à vne autre. Elle luy demanda pourquoy il disoit cela. Sur ce, luy voyant le temps de l'inuētion qu'il auoit fabriquée pour me ruiner, luy dit que ie deuenois belle, & que Monsieur de Guyse me vouloit rechercher, &

que ses oncles aspiroient à me le faire espouser; Que si ie venois à y auoir de l'affection, il seroit à craindre que ie luy déconuissie tout ce qu'elle me diroit; Qu'elle sçauoit l'ambition de cette mai'on-là, & combien elle auoit toujours trauersé la nostre. Pour cette occasion il seroit bon qu'elle ne me parlast plus d'affaires, & que peu a peu elle se retirast de se familiariser avec moy. Dès le soir mesme ie reconnus le changement que ce pernicieux conseil auoit fait en elle; & voyant qu'elle craignoit de me parler deuant mon frere, m'ayant commandé trois ou quatre fois cependant qu'elle parloit à luy de m'aller coucher, i'attendis qu'il fust sorty de sa chambre, puis m'approchant d'elle ie la suppliy de me dire si par ignorance i'auois esté si malheureuse d'auoir fait chose qui luy eust déplû. Elle me le voulust du commencement dissimuler; enfin elle me dit: Ma fille, vostre frere est sage, il ne faut pas que vous luy sçachiez mauuais gré; ce que ie vous diray ne tend qu'à bien. Et me fist tout ce discours, me commandant que ie ne luy parlasse plus deuant mon frere. Ces paroles me furent autant de pointes dans le cœur, que les premieres lors qu'elle me receut en sa bonne grace, m'auoient esté de ioye. Je n'obmis rien à luy représenter de mon innocence; Que c'estoit chose dequoy ie n'auois iamais ouy parler; & quand il auroit ce dessein, il ne m'en parleroit iamais que soudain ie ne l'auertisse. Mais ie n'auançay rien; car l'impression des paroles de mon frere luy auoient tellement occupé l'esprit, qu'il n'y auoit plus lieu pour aucune rai-

son ny verité. Voyant cela , ie luy dis que ie ressentois moins le mal de la perte de mon bon-heur , que ie n'auois senty le bien de son acquisition : Que mon frere me l'ostoit comme il me l'auoit donné. Car il me l'auoit fait auoir sans merite , me loüant lors que ie n'en estois pas digne; & qu'il m'en priuoit aussi sans l'auoir démerité , sur vn sujet imaginaire qui n'auoit nul estre qu'en sa fantaisie; Que ie la suppliois de croire que ie conseruerois immortelle la souuenance de tout ce que mon frere me faisoit. Elle s'en courrouça , me commandant de ne luy en montrer nulle apparence. Depuis ce iour-là elle alla tousiours me diminuant sa faueur , faisant de son fils son idole , le voulant contenter en cela & en tout ce qu'il desiroit d'elle. Cét ennuy me pressant le cœur , & possédant toutes les facultez de mon ame , & rendant mon corps plus propre à receuoir la contagion du mauuais air qui estoit lors en l'armée , ie tombay à quelques iours de là extrêmement malade d'une grande fièvre continuë & du pourpre , maladie qui couroit lors , & qui auoit en mesme temps emporté les deux premiers Medecins du Roy & de la Reyne, Chappellain & Castelan, comme se voulant prendre aux bergers pour auoir meilleur marché du troupeau. Aussi en eschappa-t'il fort peu de ceux qui en furent atteints. Moy estant en cette extremité , la Reyne ma Mere qui scauoit vne partie de la cause , n'obmettoit rien pour me faire secourir , prenant la peine sans craindre le danger d'y venir à toute heure. Ce qui soulageoit
bien

bien mon mal : mais la dissimulation de mon frere me l'augmentoît bien autant , qui apres m'auoir fait vne si grande trahison , & rendu vne si grande ingratitude , ne bougeoit iour & nuict du cheuet de mon liêt , me seruant aussi officieusement que si nous eussions esté au temps de nostre plus grande amitié. Moy qui auois par commandement la bouche fermée , ne répondois que par souspirs à son hypocrisie , comme Brutus fit à Neron , lequel mourut par le poison que ce tyran luy auoit fait donner , luy témoignant assés que la cause de mon mal estoit la contagion des mauuais offices , & non celle de l'air infecté. Dieu eust pitié de moy , & me garantit de ce danger , & apres quinze iours passez l'armée partant l'on m'emporta dans des brancars , où tous les soirs arriuant à la couchée , ie trouuois le Roy Charles , qui prenoit la peine avec tous les honnestes gens de la Cour de porter ma litiere iusques au cheuet de mon liêt. En cét estat ie vins de S. Iean d'Angely à Angers, malade du corps ; mais beaucoup plus malade de l'ame , où pour mon malheur ie trouuay Monsieur de Guise & ses oncles arriuez. Ce qui réjoüit autant mon frere , pour donner couleur à son artifice , qu'il me donna d'apprehension d'accroistre ma peine. Lors mon frere pour mieux conduire sa trame venoit tous les iours à ma chambre , y menant Monsieur de Guise qu'il feignoit d'aimer fort. Et pour l'y faire penser , souuent en l'embrassant il luy disoit ; Pleust à Dieu que tu fusses mon frere. A quoy Monsieur de Guise montrait

ne point entendre. Mais moy qui sçauois la malice, perdois patience de n'oser luy reprocher sa dissimulation. Sur ce temps il se parla pour moy du mariage du Roy de Portugal, qui enuoya des Ambassadeurs pour me demander. La Reyne ma Mere me commanda de me parer pour les receuoir, ce que ie fis. Mais mon frere luy ayant fait accroire que ie ne voulois point de ce mariage, elle m'en parla le soir, m'en demandant ma volonté, pensant bien en cela trouuer vn sujet pour se courroucer à moy. Ie luy dis que ma volonté n'auoit iamais dépendu que de la sienne, & que tout ce qui luy seroit agreable me le seroit aussi. Elle me dit en colere, comme l'on l'y auoit posée, que ce que ie disois ie ne l'auois point dans le cœur, & qu'elle sçauoit bien que le Cardinal de Lorraine m'auoit persuadée de vouloir plustost son neveu. Ie la suppliy de venir à l'effect du mariage du Roy de Portugal, & lors elle verroit mon obeïssance. Tous les iours on luy disoit quelque chose de nouveau sur ce sujet, pour l'aigrir contre moy & me tourmenter; inuentions de la boutique de du Guast. De sorte que ie n'auois vn iour de repos; car d'vn costé le Roy d'Espagne empeschoit que mon mariage ne se fit, & de l'autre Monsieur de Guise estant à la Cour seruoit tousiours de pretexte pour fournir de suiet à me faire persecuter, bien que luy ny nul de ses parens ne m'eust iamais parlée, & qu'il y eust plus d'vn an qu'il auoit comencé la recherche de la Princesse de Porcean. Mais parce que ce mariage-là traïsnoit;

n'en reiettoit tousiours la cause sur ce qu'il
 spiroit au mien. Ce que voyant, ie m'adui-
 lay d'escrire à ma sœur madame de Lorraine,
 qui pouuoit tout en cette maison-là, pour la
 prier de faire que Monsieur de Guise s'en al-
 last de la Cour, & qu'il espoulast prompte-
 ment la Princesse de Porcean sa Maistresse, luy
 representant que cette inuention auoit esté
 faite autant pour la ruine de Monsieur de Gui-
 se & de toute sa maison, que pour la mienne.
 Ce qu'elle reconnust tres-bien, & vint bien-
 tost à la Cour, où elle fit faire ledit mariage;
 me déliurant par ce moyen de cette calom-
 nie, & faisant connoistre à la Reyne ma Mere
 la verité de ce que ie luy auois tousiours dit.
 Ce qui ferma la bouche à tous mes ennemis;
 & me donna repos. Cependant le Roy d'Es-
 pagne, qui ne veut que les siens s'allient hors
 de sa maison, rompit tout le mariage du Roy
 de Portugal, & ne s'en parla plus. Quelques
 iours apres il se parla du mariage du Prince
 de Nauarre, qui maintenant est nostre braue
 & magnanime Roy, & de moy. La Reyne ma
 mere estant vn iour à table en parla fort long-
 temps avec Monsieur de Meru, parce que la
 maison de Montmorancy estoient ceux qui
 en auoient porté les premieres paroles. Sor-
 tant de table il me dit qu'elle luy auoit dit de
 m'en parler. Je luy dis que c'estoit chose su-
 perflüe, n'ayant volonté que la sienne. Qu'à
 la verité ie la supplierois d'auoir égard com-
 bien i'estois Catholique, & qu'il me fasche-
 roit fort d'espouser personne qui ne fust de
 ma religion. Apres la Reyne allant à son ca-

binet m'appella , & me dit que Messieurs de Montmòrancy luy auoient proposé ce mariage , & qu'elle en vouloit bien sçauoir ma volonté. Je luy répondis n'auoir ny volonté ny eslection que la sienne , & que ie la suppliois se souuenir que i estois fort Catholique. Au bout de quelque temps les propos s'en continuans tousiours , la Reyne de Nauarre sa Mere vint à la Cour , où le mariage fust du tout accordé auant sa mort , à laquelle il se passa vn traiçt si plaisant, qui ne merite d'estre cité en l'Histoire , mais de le passer sous silence entre vous & moy. Madame de Neuers, de qui vous connoissiez l'humeur , estant venue avec Monsieur le Cardinal de Bourbon, Madame de Guise , Madame la Princesse de Condé , ses sœurs & moy au logis de la feuë Reyne de Nauarre à Paris , pour nous acquitter du dernier deuoir deu à sa dignité & à la proximité que nous luy auions , non avec les pompes & ceremonies de nostre religion : mais avec le petit appareil que permettoit la Huguenotterie ; à sçauoir elle dans son liçt ordinaire les rideaux ouuerts , sans lumiere, sans Prestres , sans croix , & sans eau beniste; & nous , nous tenans à cinq ou six pas de son liçt avec le reste de la compagnie , Madame de Neuers , qui en son viuant elle auoit haïe plus que les personnes du monde ; & elle le luy ayant bien rendu & de volonté & de parole , comme vous sçauiez qu'elle en sçauoit bien vsfer à ceux qu'elle haïssoit , part de nostre troupe , & avec plusieurs belles , humbles , & grandes reuerences s'approche de son liçt , &

luy prenans la main la luy baïse , puis avec vne grande reuerence pleine de respect se mit auprès de nous. Nous qui sçauions leur haine , estimans cela.

Quelques mois apres ledit Prince de Nauarre qui lors s'appelloit Roy de Nauarre , portant le deüil de la Reyne sa Mere , y vint accompagné de huiet cens Gentils-hommes, tous en deüil, qui fust receu du Roy & de de toute la Cour avec beaucoup d'honneur, & nos nopces se firent peu de iours apres avec autant de triomphe & de magnificence que nul autre de ma qualité ; le Roy de Nauarre & sa troupe y ayant laiffé & changé le deüil en habits tres-riches & beaux , & toute la Cour parée comme vous sçauiez , & le sçauerez trop mieux représenter ; moy habillée à la Royale avec la Couronne & Couët d'hermine mouchetée qui se met au deuant du corps , toute brillante des pierreries de la Couronne , & le grand manteau bleu à quatre aulnes de queue portée par trois Princesses ; les échaffaux dressés à la coustume des nopces des filles de France, depuis l'Euesché iusqu'à N. Dame, & parcz de drap d'or le peuple s'estouffant en bas à regarder passer sur cét échaffaut les nopces & toute la Cour, nous vinsmes à la porte de l'Eglise, où Monsieur le Cardinal de Bourbon qui faisoit l'office ce iour là , nous ayant receu pour dire les paroles accoustumées en tel cas nous passâmes sur le mesme échaffaut iusques à la tribune qui separe la nef d'avec le chœur, où il se trouua deux degrez, l'un pour descendre audit chœur , & l'autre pour sor-

tir de la nef hors de l'Eglise, Le Roy de Navarre s'en allant par celui de la nef hors de l'Eglise.....

Nous estans ainsi la fortune qui ne laisse jamais vne felicité entiere aux humains, changea bien-tost cét heureux estat de triomphe & de nopces en vn tout contraire, par cette blessure de l'Admiral, qui offensa tellement tous ceux de la Religion que cela les mit comme en vn desespoir. De sorte que l'aisné Pardaillan & quelques autres chefs des Huguenots en parlerent si haut à la Reine ma Mere, qu'ils luy firent penser qu'ils auoient quelque mauuaise intention. Par l'aduis de Monsieur de Guise & de mon frere le Roy de Pologne, qui depuis a esté Roy de France, il fut pris resolution de les preuenir. Conseil dequoy le Roy Charles ne fust nullement, lequel affectionnoit Monsieur de la Rochefoucault, Theligny, & la Nouë, & quelques autres des chefs de la Religion, desquels il se pensoit seruir en Flandre. Et à ce que ie luy ay depuis ouy dire à luy-mesme, il y eust beaucoup de peine à l'y faire consentir; & sans ce qu'on luy fit entendre qu'il y alloit de sa vie & de son Estat, il ne l'eust iamais fait. Et ayant sçeu l'attentat que Maureuel auoit fait à Monsieur l'Admiral du coup de pistolet qu'il luy auoit tiré par vne fenestre, dont le pensant tuer, il resta seulement blessé à l'espaule, le Roy Charles se doutant bien que ledit Maureuel auoit fait ce coup à la persuation de monsieur de Guise pour la vengeance de la mort de feu Monsieur de Guise son Pere, que ledit Admiral auoit fait tuer de mesme façon par Poltrot, il en fust en

si grâde colere contre Monsieur de Guise, qu'il iura qu'il en feroit iustice. Et si Monsieur de Guise ne se fust tenu caché tout ce iour-là, le Roy l'eust fait prendre. Et la Reine ma mere ne se vist iamais pins empeschée qu'à faire entendre audit Roy Charles que cela auoit esté fait pour le bien de son Estat, à cause que i'ay dit cy-dessus, de l'affection qu'il auoit à Monsieur l'Admiral, à la Nouë, & à Taligny, desquels il goustoit l'esprit & valeur, estant Prince si genereux qu'il ne s'affectionnoit qu'à ceux en qui il reconnoissoit telles qualitez. Et bien qu'ils eussent esté tres-pernicieux à son Estat, les renards auoient sçeu si bien feindre qu'ils auoient gagné le cœur de ce brave Prince, pour l'esperance de se rendre utiles à l'accroissement de son Estat, & en luy proposant de belles & glorieuses entreprises en Flandre, seul attrait en cette anie grande & Royale. De sorte que combien que la Reine ma Mere luy representast en ce cét accident que l'assassinat que l'Admiral auoit fait faire à Monsieur de Guise rendoit excusable son fils, si n'ayant pû auoir iustice il en auoit voulu prendre luy-mesme vengeance? qu'aussi l'assassinat qu'auoit fait ledit Admiral de Charry Maistre de camp de la garde du Roy, personne si valeureuse, & qui l'auoit si fidellement assistée pendant sa Regence, & la puerilité dudit Roy Charles, le rendoit digne de tel traitement, bien que telles paroles peussent faire iuger au Roy Charles que la vengeance de la mort dudit Charry n'estoit pas sortie du cœur de la Reine ma mere, son ame pas-

fionnée de douleur de la perte des personnes qu'il pensoit , comme i'ay dit , luy estre vn iour vtiles offusqua tellement son iugement, qu'il ne pust moderer ny changer ce passionné desir d'en faire iustice ; commandant tousiours qu'on cherchast Monsieur de Guise ; qu'on le representast , & qu'il ne vou'oit point qu'un tel acte demeurast impuny. Enfin comme Par-
daillan découurit par ses menaces au soupper de la Reine ma mere la mauuaise intention des Huguenots , & que la Reine vist que cét accident auoit mis les affaires en tels termes ; que si l'on ne preuenoit leur dessein , la nuit mesme ils attenteroient contre le Roy & elle ; elle prit resolution de faire ouuertement entendre audit Roy Charles la verité de tout , & le danger où il estoit ; que monsieur le Mareschal de Rais , de qui elle sçauoit qu'il l'apprenderoit mieux que de tout autre , comme de celuy qui luy estoit plus confident & plus fauorisé de luy : le vint trouuer en son cabinet le soir sur les neuf ou dix heures , & luy dit que comme son seruiteur tres fidelle il ne luy pouuoit celer le danger où il estoit s'il continuoit en la resolution qu'il auoit de faire Iustice de monsieur de Guise , & qu'il falloit qu'il sçeuſt que le coup qui auoit esté fait de l'Admiral n'auoit esté par monsieur de Guise seul , mais que mon frere le Roy de Pologne , depuis Roy de France , & la Reine ma mere auoient esté de la partie. Qu'il sçauoit l'extrême desplaisir que la Reine ma mere receust à l'assassinat de Charry, comme elle en auoit tres-grande raison , ayant lors peu de tels seruiteurs qui ne dépendissent

que d'elle, estant comme il sçauoit, du temps de sa puerilité toute la France partie, les Catholiques pour Monsieur de Guise, & les Huguenots pour le Prince de Condé, tendans les vns & les autres à luy oster la Couronne, qui ne luy auoit esté conseruée apres Dieu, que par par la prudence & vigilance de la Reine sa Mere, qui en cette extremité ne s'estoit trouuée plus fidellement assisté que dudit Charry; Que deslors il sçauoit qu'elle auoit iuré de se venger dudit assassinat. Qu'aussi voyoit elle que ledit Admiral ne seroit iamais que tres-pernecieux en cét Estat, & quelque apparence qu'il fist de luy auoir de l'affection, & de vouloir seruir sa Majesté en Flandres, qu'il n'auoit autre dessein que de troubler la France; Que son dessein d'elle n'auoit esté en cét affaire, que d'oster cette peste de ce Royaume l'Admiral seul; mais que le malheur auoit voulu que Maurenel auoit failly son coup, & que les Huguenots en estoient entrez en tel desespoir, que ne s'en prenant pas seulement à Monsieur de Guise, mais à la Reine sa Mere; & au Roy de Pologne son frere, ils croyoient aussi que luy mesme en fut consentant, & auoient resolu de recourir aux armes la nuit mesme. De sorte qu'il voyoit sa Majesté en vn tres-grand danger, fust ou des Catholiques à cause de Monsieur de Guise, ou des Huguenots pour les raisons susdites. Le Roy Charles qui estoit tres-prudent, & qui auoit esté tousiours tres-obeissant à la Reine ma Mere, & Prince tres-Catholique; voyant aussi de quoy il y alloit, prist soudain

resolution de se joindre à la Reine sa Mere, & se conformer à sa vo'onté, & garantir sa personne des Huguenots par les Catholiques; non sans toutefois extrême regret de ne pou- uoir sauuer Taligny, la Nouë, & Monsieur de la Roche-foucault. Et lors allant trouuer la Reine sa Mere, enuoya querir Monsieur de Guise, & tous les autres Princes & Capitaines Catholiques, où fust pris resolution de faire la nuit mesme le massacre de la saint Barthelemy. Et mettans soudain la main à l'œuure, toutes les chesnes rendues, & le tocsin sonnant, chacun courut sus en son quartier, selon l'ordre donné, tant à l'Admiral qu'à tous les Huguenots. Monsieur de Guise donna au logis de l'Admiral, à la chambre duquel Besme Gentil-homme Allemand estant monté, après l'auoir d'agué le jetta par les fenestres à son maistre Monsieur de Guise. Pour moy, l'on ne me disoit rien de tout ce- cy. Je voyois tout le monde en action, les Huguenots desesperez de cette blessure; Messieurs de Guise craignans qu'on n'en voulust faire justice fûchetans tous à l'oreille. Les Huguenots me tenoient suspecte parce que i'estois Catholique, & les Catholiques parce que i'auois espousé le Roy de Navarre, qui estoit Huguenot. De sorte que personne ne m'en disoit rien, iusqu'au soir qu'estint au coucher de la Reyne ma Mere assise sur vn coffre, auprès de ma sœur de Lorraine que ie voyois fort triste, la Reine ma Mere parlant à quelques vns m'apperceust, & me dit que ie m'en allasse coucher. Comme ie faisois la re-

uerence, ma sœur me prend par le bras, & m'arreste, & se prenant fort à pleurer me dist; Mon dieu ma sœur n'y allez pas. Ce qui m'effraya extremement. La Reyne ma Mere s'en apperceust, & appellant ma sœur se courrouça fort à elle & luy deffendit de me rien dire. Ma sœur luy dist qu'il n'y auoit point d'apparence de m'enuoyer sacrifier comme cela, & que sans doute s'ils découuroient quelque chose, ils se vängeroient de moy. La Reyne ma Mere répond, que s'il plaisoit à Dieu, ie n'aurois point de mal, mais quoy que ce fut, il falloit que i'allasse, de peur de leur faire soupçonner quelque chose.....

Ie voyois bien qu'ils se contestoient & n'entendois pas leurs parolles. Elle me commanda encore rudement que m'en allasse coucher. Ma sœur fondant en larmes me dist bon soir, sans m'oser dire autre chose; & moy ie m'en allay toute transie & éperdue, sans me pouuoir imaginer ce que i'auois à craindre. Soudain que ie fus en mon cabinet, ie me mis à prier Dieu qu'il luy plût me prendre en sa protection, & qu'il me gardast, sans sçauoir de quoy ny de qui. Sur cela le Roy mon mary qui s'estoit mis au lit, me manda que ie m'en allasse coucher. Ce que ie fis, & trouuay son lit entouré de trente ou quarante Huguenots que ie ne connoissois point encore; car il y auoit fort peu de temps que i'estois mariée. Toute la nuit ils ne firent que parler de l'accident qui estoit aduenu à Monsieur l'Admiral, se resoluans dès qu'il seroit iour de demander iustice au Roy de Monsieur de Guise, & que si on ne la leur

faisoit, ils se la feroient eux-mesmes. Moy i'auois tousiours dans leur cœur les larmes de ma sœur & ne pouuois dormir pour l'apprehension en laquelle elle m'auoit mise sans sçauoir dequoy. La nuit se passa de cette façon sans fermer l'œil. Au point du iour le Roy mon mary dist qu'il vouloit aller iouer à la paume attendant que le Roy Charles fust éveillé, se resoluant soudain de luy-demander iustice. Il sort de ma chambre; & tous ses Gentils-hommes aussi. Moy voyant qu'il estoit iour & estimant que le danger que ma sœur m'auoit dit fust passé, vaincuë du sommeil ie dis à ma nourrisse qu'elle fermast la porte pour pouuoir dormir à mon aise. Vne heure apres, comme i'estois la plus endormie, voicy vn homme frappant des pieds & des mains à la porte, & criant, Nauarre, Nauarre. Ma nourrice pensant que ce fust le Roy mon mary, court vistement à la porte. Ce fust vn Gentil-homme nommé Monsieur Tejan qui auoit vn coup dépee dans le coude & vn coup de halebarde dans le bras; & estoit encores poursuiuy de quatre Archers qui entrerent tous apres luy en ma chambre. Luy se voulant garantir se ietta dessus mon lit. Moy sentant ces hommes qui me tenoient, ie me iette à la ruelle, & luy apres moy, me tenant tousiours à trauers du corps. Je ne connoissois point cét homme, & ne sçauois s'il venoit là pour m'offenser, ou si les Archers en vouloient à luy ou à moy. Nous crions tous deux, & estions aussi effrayez l'vn que l'autre. Enfin Dieu voulut que Monsieur de Nançay Capitaine des gar-

des y vinst, qui me trouuant en cét estat-là, encor qu'il y eust de la compassion, ne se pût tenir de rire: & se courrouça fort aux archers de cette indiscretion, les fit sortir, & me donna la vie de ce pauvre homme qui me tenoit; lequel ie fis coucher & penser dans mon cabinet iusques à tant qu'il fust du tout guery. Et changeant de chemise, parce qu'il m'auoit tout couuert de sang. Monsieur de Nançay me conta ce qui se passoit, & m'assëura que le Roy mon mary estoit dans la chambre du Roy, & qu'il n'auroit nul mal. Et me faisant ietter vn manteau de nuit sur moy, il m'emmena dans la chambre de ma sœur Madame de Lorraine, où i'arriuay plus morte que viue, & entrant dans l'antichambre, de laquelle les portes estoient toutes ouuertes, vn Gentil-homme nommé Bourle se sauuant des archers qui le poursuiuoient, fust percé d'un coup de halebard à trois pas de moy. Je tombay de l'autre costé presque éuanoüie entre les bras de Monsieur de Nançay, & pensois que ce coup nous eust percez tous deux. Et estant quelque peu remise i'entray en la petite chambre où couchoit ma sœur. Comme i'estois-là, Monsieur de Mioffans premier Gentil-homme du Roy mon mary, & Armagnac son premier valet de chambre m'y vindrent trouuer pour me prier de leur sauuer la vie. Je m'allay ietter à genoux deuant le Roy & la Reyne ma Mere pour les leur demander, ce qu'enfin ils m'accorderent. Cinq ou six iours apres ceux qui auoient commencé cette partie connoissans, qu'ils auoient failly à leur principal dessein, n'en voulant

point tant aux Huguenots qu'aux Princes du sang, portoient impatiemment que le Roy mon mary & le Prince de Condé fussent demeurés. Et connoissans qu'estant mon mary nul ne voudroit attenter contre luy, ils ouydrent vne autre rame. Ils vont persuader à la Reyne ma Mere qu'il me falloit démarier. En cette resolution estant allée vn iour de feste à son leuer que nous deuions faire nos Pasques, elle me prend à serment de luy dire verité, & me demanda si le Roy mon mary estoit homme, me disant que si cela n'estoit elle auoit moyen de me démarier. Je la suppliai de croire que ie ne me connoissois pas en ce qu'elle me demandoit (aussi pouuois- ie dire alors comme cette Romaine, à qui son mary se courrouçant de ce qu'elle ne l'auoit aduertie qu'il auoit l'halaine mauuaise, luy respondit qu'elle croyoit que tous les hommes l'eussent semblable, ne s'estant iamais approchée d'autre homme que de luy) mais quoy que ce fust, puis qu'elle m'y auoit mise i'y voulois demeurer; me doutant bien que ce qu'on vouloit m'en separer estoit pour luy faire vn mauuais tour.

Nous accompagnâmes le Roy de Pologne iusques à Beaumont, lequel quelques mois auant de partir de France s'eslâya par tous moyens de me faire oublier les mauuais offices de son ingratitude, & de remettre nostre amitié en la mesme perfection qu'elle auoit esté en nos premiers ans, m'y voulant obliger par serment & promesses en me disant à Dieu. Sa sortie de France, & la maladie du Roy Charles, qui commença presque en mesme

temps, esueilla l'esprit de deux parties de ce Royaume, faisans diuers projets sur cét Estat. Les Huguenots ayans à la mort de l'Admiral fait obliger par escrit signé le Roy mon mary & mon frere d'Alençon à la vengeance de cette mort (ayants gagné auant la saint Barthelemy mondit frere sous l'esperance de l'establir en Flandre) leur persuadent comme le Roy & la Reyne ma Mere reuiendroient en France de se desrober passant en Champagne, pour se ioinde à certaines troupes qui les deuoient venir prendre là. Monsieur de Miossans Gentil-homme Catholique ayant aduis de cette entreprise, qui estoit pernicieuse au Roy son maistre, m'en aduertit pour empescher le mauuais effet qu'il eust apporté tant de maux à eux & à cét Estat soudain i'allay trouuer le Roy & la Reyne ma Mere, & leur dis que i'auois chose à leur communiquer qui leur importoit fort, & que ie ne la leur dirois iamais qu'il ne leur pleust me promettre que eela ne porteroit aucun preiudice à ceux que ie leur nommerois, & qu'ils y remedieroient sans faire semblant de rien sçauoir. Lors ie leur dis que mon frere & le Roy mon mary s'en deuoient le lendemain aller à des troupes de Huguenots qui les venoient chercher à cause de l'obligation qu'ils auoient fait à la mort de l'Admiral, qui estoit bien excusable par leurs enfans, & que ie les suppliois leur pardonner, & sans leur en monstrer nulle apparence leur empescher de s'en ailer. Ce qu'ils m'accorderent, & fust l'affaire conduit par telle prudence, que sans qu'ils pussent sçauoir d'où

leur venoit cét empeschement ils n'eurent iamais moyen d'eschapper. Cela estant passé nous arriuasmes à saint Germain, où nous fismes vn grand seiour à cause de la maladie du Roy. Durant lequel temps mon frere d'Alençon employoit toutes sortes de recherches & moyens pour se rendre agreable à moy afin que ie luy vouässe amitié, comme i'auois fait au Roy Charles. Car iusques alors, pource qu'il auoit tousiours esté nourry hors de la Cour, nous ne nous estions pas gueres veus, & n'auions pas grande familiarité. Enfin m'y voyant conuiee par tant de soumissions & de suietions & d'affection qu'il me témoignoit, ie me resolus de l'aimer & embrasser ce qui le concernoit; mais toutefois avec telle condition, que ce seroit sans preiudice de ce que ie deuois au Roy Charles mon bon frere que i'honorois sur toutes choses. Il me continua cette bien-veillance, me l'ayant tesmoignée iusques à la fin.

¶ Durant ce temps la maladie du Roy Charles augmentant tousiours, les Huguenots ne cessioient iamais de rechercher des nouuelles, pretendäns encor de retirer mon frere le Duc d'Alençon & le Roy mon mary de la Cour. Ce qui ne vint à ma connoissance comme la premiere fois. Mais, toutesfois Dieu permit que la mesche se découurit à la Reyne ma Mere, si pres de l'effet, que les troupes des Huguenots deuoient arriuer ce iour-là aupres de saint Germain. Nous fusmes contrains de partir deux heures apres minuit, & mettre le Roy Charles dans vne litiere pour gagner Pa-

ris ; la Reyne ma Mere mettant dans son chariot mon frere & le Roy mon mary , qui cette fois ne furent traittez si doucement que l'autre. Car le Roy s'en alla au bois de Vincennes, d'où il ne leur permit plus de sortir. Et le temps augmentant tousiours l'aigreur de ce mal produisoit tousiours des nouveaux aduis au Roy pour accroistre la meffiance & mécontentement qu'il auoit d'eux , en quoy les artifices de ceux qui auoient tousiours desiré la ruine de nostre maison luy aydoient , comme ie croy , beaucoup. Ces meffiances passerent si auant que Messieurs les Mareschaux de Montmorancy & de Loffé en furent retenus prisonniers au bois de Vincennes , & la Mole & le Comte de Coçonas en partirent de leur vie. Les choses en vindrent à tels termes que l'on députa des Commissaires de la Cour de Parlement pour ouïr mon frere & le Roy mon mary, lequel n'ayant lors personne de conseil auprès de luy , me commanda de dresser par escrit ce qu'il auoit à respondre , afin que par ce qu'il diroit il ne mist ny luy ny personne en peine. Dieu me fist la grace de le dresser si bien qu'il en demeura satisfait, & les Commissaires estonnez de le voir si bien préparé. Et voyant que par la mort de la Mole & du Comte de Coçonas ils se trouuoient chargez en sorte que l'on craignoit de leur vie, ie me resolus (encor que ie fusse si bien auprès du Roy qu'il n'aimoit rien tant que moy) pour leur sauuer la vie de perdre ma fortune : ayant deliberé, comme ie sortois & entrois librement en coches sans que les gardes regardassent de-

dans , ny que l'on fit oster le masque à mes femmes, d'en desguiser l'un d'eux en femme & le sortir dans ma coche. Et pource qu'ils estoient trop esclaires & des gardes , & qu'il suffisoit qu'il y en eut vn d'eux dehors pour asseurer la vie de l'autre , iamais ils ne se purent accorder lequel d'est qui sortiroit , chacun voulant estre eceluy-là , & ne voulant demeurer. De sorte que ce dessein ne se pust executer. Mais Dieu y remedia par vn moyen bien miserable pour moy. Car il me priua du Roy Charles , tout l'appuy & support de ma vie , vn frere duquel ie n'auois receu que bien , & qui en toutes les persecutions que mon frere d'Anjou m'auoit faites à Angers , m'auoit tousiours assistée . & aduertie , & conseillée. Bref ie perdis en luy tout ce que ie pouuois perdre. Apres ce desastre , malheureux pour la France & pour moy , nous allasmes à Lyon au deuant du Roy de Pologne , lequel possédé encore par le Guast , rendist de mesmes causes mesmes effets , & croyant aux aduis de ce pernicieux esprit, qu'il auoit laissé en France pour maintenir son party , conçeut vne extreme jalousie contre mon frere d'Alençon , ayant pour suspecte & portant impatiemment l'union de luy & du Roy mon mary , estimant que i'en fusse le lien & le seul moyen qui maintenoit leur amitié , & que les plus propres expediens pour les diuiser estoient d'un costé de me broüiller & mettre en mauuais ménage avec le Roy mon mary , & d'autre de faire que Madame de Sauue , qu'ils seruoient tous deux , les ménageast tous deux de telle façon qu'ils entraissent en extreme ia-

lousie l'un de l'autre. Cét abominable dessein , source & origine de tant d'ennuis , de trauerses , & de maux que mon frere & moy auons depuis soufferts , fust poursuiuy avec autant d'animosité , de ruses & d'artifice , qu'il auoit esté pernicieusement inuenté. Quelques vns tiennent que Dieu a en particulière protection les grands , & qu'aux esprits où il reluit quelque excellence non commune , il leur donne par des bons genies quelques secrets aduertissemens des accidens qui leur sont preparez ou en bien ou en mal , comme à la Reyne ma Mere , que iustement l'on peut mettre de ce nombre, il s'en est veu plusieurs exemples, mesme la nuit deuant la miserable course elle songea qu'elle voyoit le feu Roy mon Pere blessé en l'œil , comme il fut , & estant éueillée elle le supplia plusieurs fois de ne vouloir point courir ce iour-là , & vouloir se contenter de voir le plaisir du tournoy sans en vouloir estre. Mais l'inéuitable destinée ne permit tant de bien à ce Royaume qu'il püst receuoir cette vtile conseil. Elle n'a aussi iamais perdu aucun de ses enfans qu'elle n'aye veu vne fort grande flamme , à laquelle soudain elle s'escrioit ; Dieu garde mes enfans : & incontinent apres elle entendoit la triste nouuelle qui par ce feu luy auoit esté augurée. En sa maladie de Metz où par vne fièvre pestilentielle & le charbon elle fust à l'extremité , qu'elle auoit prise allant visiter les religions des femmes, comme il y en a beaucoup en cette ville-là , lesquelles auoient esté depuis peu infectées de cette contagion ; dequoy elle fust garantie miraculeusement ,

Dieu la redonnant à cét Estat qui en auoit encore tant de besoin , par la diligence de Monsieur Castelan son Medecin , qui nouveau Esculape fit lors vne signalée preuue de l'excel-
lence de son art. Elle réuant , & estant assistée autour de son liét du Roy Charles mon frere : & de ma sœur & mon frere de Lorraine , de plusieurs Messieurs du Conseil , & de force Dames & Princesses , qui la tenans comme hors d'esperance ne l'abandonnoient point , s'escrie continuant ses réneries , comme si elle eut veu donner la bataille de Iarnac ? Voyez comme ils fuyent ? Mon fils a la victoire ; Hé mon Dieu releuez mon fils , il est par terre ; Voyez-vous dans cette haye le Prince de Condé mort. Tous ceux qui estoient-là croyoient qu'elle resuoit , & que sçachant que mon frere d'Aniou estoit en terme de donner la bataille elle n'eust que cela en teste. Mais la nuit apres Monsieur de Lossès luy en apportant la nouvelle , comme chose tres-desirée , en quoy il pensoit beaucoup meriter. Vous estes fâcheux , luy dit-elle , de m'auoir éueillée pour cela , ie le sçauois bien : Ne l'auois-je pas veu deuant hyer ? Lors on reconnust que ce n'estoit point réuerie de la fièvre , mais vn aduertissement particulier que Dieu donne aux personnes illustres & rares. L'histoire nous en fournit tant d'exemples aux anciens Payens , comme le fantosme de Brutus , & plusieurs autres , que ie ne décriray , n'estant mon intention d'orner ces Memoires , mais seulement narrer la vérité , & les auancer promptement , afin que plustost vous les receuiez. De ces diuins

aduertissemens ie ne me veux estimer digne, toutefois pour ne me faire comme ingrate des graces que i'ay receuës de Dieu que ie dois & veux confesser toute ma vie, pour luy en rendre graces, & que chacun le louë aux merueilles des effets de sa puillance; bonté, & misericorde qu'il luy a plû faire en moy, i'aduouieray n'auoir iamais esté proche de quelques signalez accidens, ou sinistres, ou heureux, que ie n'en aye eu quelque aduertissement, ou en songe ou autrement, & puis bien dire ce vers,

*De mon bien ou mon mal mon esprit m'est
oracle.*

Ce que i'espreuay lors de l'arriuée du Roy de Pologne, la Reyne ma Mere estant allée au deuant de luy. Cependant qu'ils s'embrassoient & faisoient les reciproques bien-venueës, bien que ce fust en vn temps si chaud qu'en la presse où nous estions on s'estoufoit, il me prit vn frisson si grand avec vn tremblement si vniuersel, que celuy qui m'aydoit s'en apperceut. I'eus beaucoup de peine à le cacher, quand apres auoir laislé la Reyne ma Mere, le Roy me vinst à me salüer. Cét augure me toucha au cœur, toutefois il se passa quelques iours sans que le Roy découurit la haine & le mauuais dessein que le malicieux Guast luy auoit fait conceuoir contre moy, par le rapport qu'il luy auoit fait que depuis la mort du Roy i'auois tenu le party de mon frere d'Alençon en son absence & l'auois fait affectionner au Roy mon mary. Pourquoy espient tousiours vne occasion pour paruenir à l'intention predite de rompre l'amitié

de mon frere d'Alençon & du Roy mon mary , en nous mettant en mauuais ménage le Roy mon mary & moy , & les broüillant tous deux sur le fuiet de la ialouſie de leur cōmun amour de Madame de Sauue , vne apresdinée la Reyne ma mere eſtant entrée en ſon cabinet pour faire quelques longues deſpeches, Madame de Neuers voſtre couſine , Madame de Rays auſſi voſtre couſine , Bourdeille , & Surgeres me demanderent ſi ie me voulois aller promener à la Ville. Sur ce'la Madamoifelle de Montigny , niepce de Madame d'Vſez, nous diſt que l'Abbaye de ſainct Pierre eſtoit vne fort belle religion. Nous nous reſoluſmes d'y aller. Elle nous pria qu'elle viſt avec nous , parce qu'elle y auoit vne tante , & que l'entrée n'y eſt pas libre ſinon qu'avec les grandes. Elle y viſt ; & comme nous montions en chariot , encore qu'il fuſt tout plein de nous ſix , & de Madame de Curton , Dame d'honneur qui alloit touſiours avec moy , Liancourt premier Eſcuyer du Roy & Camille ſ'y trouuerent, qui ſe ietterent ſur les portieres du chariot de Torigny, où ſe tenant comme ils peurent, & gaufſans, comme ils eſtoient d'humeur bouffonne, dirent qu'ils vouloient venir voir ces belles Religieuſes. La Compagnie de Madamoifelle de Montigny , qui ne nous eſtoit aucunement familiere, & d'eux deux, qui eſtoient confidens du Roy , fuſt , que ie croy , vne prouidence de Dieu pour me garantir de la çalounnie que l'on me vouloit imputer. Nous allaſmes à cette Religion , & mon chariot , qui eſtoit aſſez reconnoiſſable pour eſtre doré , & de velours jaune

garny d'argent, nous attendit à la place, autour de laquelle y auoit plusieurs Gentils-hommes logez. Pendant que nous estions dans Sainct Pierre, le Roy ayant seulement avec luy le Roy mon mary, d'O, & le gros Ruffé, s'en allant voir Quelus qui estoit malade, passant par cette place & voyant vn chariot vuide se retourna vers le Roy mon mary & luy dist; Voyez, voila le chariot de vostre femme, & voila le logis de Bidé, qui estoit lors malade (ainsi se nommoit aussi celuy qui a depuis serui vostre cousine.) Le gage; dit-il, qu'elle y est, & commanda au gros Ruffé, instrument propre de telle malice pour estre amy de du Guast, d'y aller voir. Lequel n'y ayant rien trouué, & ne voulant toutesfois que cette verité empeschast le dessein du Roy, luy dist tout haut deuant le Roy mon mary; Les oiseaux y ont esté, mais ils n'y sont plus. Cela souffrist assez pour donner suiet de s'entretenir iusques au logis. Le Roy mon mary témoignant en cela la bonté & l'entendement dequoy il s'est tousiours monstre accompagné, & detestant en son cœur cette malice, iugea aisément à quelle fin il le faisoit. Et le Roy se hastant de retourner auant moy pour persuader à la Reyne ma Mere cette intention, & m'en faire receuoir vn affront, i'arriuy qu'il auoit eu tout loisir de faire ce mauuais effet, & que mesme la Reyne ma Mere en auoit parlé fort estrangement deuant des Dames, partie par creance, & partie pour plaire à ce fils qu'elle idolastroit. Moy reuenant apres sans scauoir rien de tout cecy, i'allay descendre en ma chambre avec toute la

troupe susdite qui m'auoit accompagnée à S. Pierre, & y trouuay le Roy mon mary, qui soudain qu'il me vit se prist à rire, & me dist; Allez chez la Reyne vostre mere, & ie m'assure que vous en reuiendrez bien en colere. Je luy demanday pourquoy, & ce qu'il y auoit. Il me dit, ie ne vous le diray pas, mais suffise à vous que ie n'en crois rien, & que ce sont inuentions pour nous broüiller vous & moy, pensant par ce moyen me separer de l'amitié de Monsieur vostre frere. Voyant que ie n'en pouuois tirer autre chose, ie m'en vais chez la Reyne ma Mere. Entrant en la salle ie trouuay Monsieur de Guyse, qui preuoyant, n'estoit pas marry de la diuision qu'il voyoit arriuer en nostre maison, esperant bien que du vaisseau brisé il en recueilliroyt les pieces. Il me dist; Je vous attendois icy pour vous aduertir que la Reyne vous a presté vne dangereuse charité, & me fit tout le discours susdit qu'il auoit appris de d'O, qui estant lors fort amy de vostre cousine, l'auoit dit à Monsieur de Guyse pour nous en aduertir. I'entray en la chambre de la Reyne ma Mere, où elle n'estoit pas. Je trouuay Madame de Nemours, & toutes les autres Princesses & Dames qui me dirent; Mon Dieu, Madame la Reyne vostre Mere est en si grande cholere contre vous. Je ne vous conseille pas de vous presenter deuant elle. Non, ce dis-je si i'auois fait ce que le Roy luy a dit. Mais en estant du tout innocente, il faut que ie luy parle pour l'en éclaircir. I'entray dans son Cabinet, qui n'étoit fait que d'une cloison de bois, de sorte que l'on pouuoit aisement entendre tout ce qui se disoit.

Soudain

Soudain qu'elle me vit elle commença à ietter son feu, & ire tout ce qu'une cholere outrée & demesurée peut ietter dehors. Je luy representay la verité, & que nous estions dix ou douze; & la suppliay de s'en enquerire, & ne croire pas celles qui m'estoient amies & familiares, mais Madame de Montigny qui ne me hâtoit point, & Liancourt & Camille qui ne dépendoient que du roy. Elle n'a point d'oreille pour la verité ny pour la raison, elle n'en veut point recevoir fust ou pour estre preoccupée du faux, ou bien pour cōplaire à ce fils, que d'affection, de deuoir, d'esperance, & de crainte elle idolastroit, & ne cesse de tanter, crier, & menacer. Et luy disant que cette charité m'auoit esté prestée par le roy, elle se met encore plus en cholere, me voulât faire croire que c'estoit vn sien valet de chambre qui passant par là m'y auoit veuë. Et voyant que cette couuerture estoit grossiere, & que ie la receuois pour telle, & restois infiniment offensé du roy, cela la tourmentoit & esguillonnoit dauantage. Ce qui estoit ouy de sa chambre toute pleine de gens. Sortât de là avec le despit que l'on peut penser, ie trouuay en ma chambre le roy mon mary qui me dist; Et bien, n'avez-vous pas trouué ce que ie vous auois dit: Et me voyant si affligée; Ne vous tourmentez pas de cela, dit-il, Liancourt & Camille se trouuerent au coucher du Roy, qui luy diront le tort qu'il vous a fait, & m'assure que demain la Reyne vostre Mere sera bien empeschée à faire les accords. Je luy dis, Monsieur, j'ay receu vn affront trop public de cette calomnie pour pardonner à ceux qui me

l'ont causée; mais toutes les injures ne me font rien au prix du tort qu'on m'a voulu faire me voulant procurer vn si grand malheur que de me mettre mal avec vous. Il me répondit ; Il s'y est Dieu mercy failly. Je luy dis Ouy Dieu mercy & vostre bon naturel. Mais de ce mal si faut il que nous en tirions vn bien , que cecy nous serue d'aduertissement à l'vn & à l'autre pour auoir l'œil ouuert à tous les artifices que le Roy pourra faire pour nous mettre mal ensemble. Car il faut croire puis qu'il a dessein qu'il ne s'arrestera pas à cestuy-cy, & ne cessera qu'il n'ait rompu l'amitié de mon frere & de vous. Sur cela mon frere arriua , & les fis par nouveau serment obliger à la continuation de leur amitié. Mais quel serment peut valoir en amour ; Le lendemain matin vn Banquier Italien qui estoit seruiteur de mon frere, pria mon dit frere le Roy mon mary , & moy , & plusieurs autres Princesses & Dames d'aller dîner en vn beau iardin qu'il auoit à la ville. Mais ayant rousiours gardé ce respect à la reyne ma mere , tant que i'ay esté auprès d'elle , fille & mariée , de n'aller en aucun lieu sans luy en demander congé, ie l'allay trouuer en la salle reuenant de la messe pour auoir sa permission d'aller à ce festin. Elle me faisant vn refus public , dist que i'allasse où ie voudrois , qu'elle ne s'en soucioit pas. Si cét affront fust resenty d'un courage comme le mien, ie le laisse à iuger à ceux qui comme vous ont connu mon humeur. Pendant que nous estions en ce festin , le Roy , qui auoit parlé à Liancourt , à Camille , & à Madamoïse de

Montigny , connut l'erreur où la malice de ruffé l'auoit fait tomber , & ne se trouuant moins en peine à la r'habiller qu'il auoit esté prompt , à la receuoir & à la publier , venant trouuer la Reyne ma Mere luy cōfessà le vray , & la pria de r'habiller cela en quelque façõ que ie ne luy demeurassè pas ennemie ; craignant fort , parce qu'il me voyoit auoir de l'entendement, que ie ne me sçeussè plus à propos reuancher qu'il ne m'auoit sçeueu offenser. Reuenus que nous fûmes du festin, la prophetie du Roy mon mary fust veritable. La Reyne ma Mere m'enuoya querir en son Cabinet de derriere , qui estoit proche de celuy du roy , où elle me dist qu'elle auoit sçeueu la verité de tout, & que ie luy auois dit vray ; Qu'il n'estoit rien de tout ce que le valet de chambre qui luy auoit fait ce rapport luy auoit dit; Que c'estoit vn mauuais homme, & qu'elle le chasseroit. Et connoissât à ma mine que ne receuois pas cette couuerture, elle s'efforça par tout moyen de m'oster l'opinion que ce fust le roy qui me prestoit cette charité. Et voyant qu'elle n'y auoit rien, le roy entrât dans le Cabinet m'en fit force excuses , disant qu'on le luy auoit fait accroire. Et me faisant toutes les satisfactions & demōstratiōs. d'amitié qui se pouuoient faire. Cela passé, apres auoir demeuré quelque temps à Lyon nous allâmes en Auignon. Le Guast n'osant plus inuenter de telles impostures, & voyant que ie ne luy donnois aucune prise en mes actions pour par la ialousie me mettre mal avec le roy mon mari & esbranler l'amitié de mon frere & de luy se seruiust d'yne autre voye, qui estoit de ma-

dame de Sauue, la gagnant tellement qu'elle se gouuernoit du tout par luy, & vsant de ses instructions non moins pernicieuses que celle de la Celestine, elle rendit l'amour de mon frere & du Roy mon mary (auparauant tiede & lente comme de personnes si ieunes) à vne telle extremité, qu'oublians toute ambition, tout deuoir & tout dessein, s'ils n'auoient plus autre chose en l'esprit que la recherche de cette femme; Et en vinrent à vne si grande & vehemente jalousie l'un de l'autre, qu'écors qu'elle fust recherchée de Monsieur de Guyse, de du Gualt, de Souuray & plusieurs autres, qui estoient tous plus aymez d'elle qu'eux, ils ne s'en soucioient pas, & ne craignoient ces deux beaux-freres que la recherche de l'un & de l'autre. Et cette femme pour mieux joier son jeu, persuada au Roy mon mary que i'en estois jalouse, & pour cette cause ie tenois le party de mon frere. Nous croyons aisément ce qui nous est dit par des personnes que nous ayons; Il prend cette creance, il s'éloigne de moy, & s'en cache plus que tout autre; ce que iusques alors il n'auoit fait; Car quoy qu'il en eust eu la fantaisie, il m'en auoit tousiours parlé aussi librement qu'à vne sœur, connoissant bien que ie n'en estois aucunement jalouse, ne desirant que son contentement. Moy voyant ce que i'auois le plus craint estre aduenu, qui estoit l'éloignement de sa bonne grace, pour la priuation de sa franchise dequoy il auoit iusques alors vsé avec moy, & que la méfiance qui priue de la familiarité est le principe de la haine, soit entre parens ou amis, &

connoissant d'ailleurs que si ie pouuois diuertir mon frere de l'affection de Madame de Sauue , i'osterois le fondement de l'artifice que le Guast auoit fabriqué à nostre diuision & ruine.....

susdite à l'endroit de mon frere , vsant de tous moyens que ie pûs pour l'en tirer. Ce qui eust seruy à tout autre qui n'eust eu l'ame faichinée par l'amour & les ruses de ces fines personnes. Mon frere , qui en toute autre chose ne croioit rien que moy , ne pust jamais se regagner soy-mesme pour son salut & le mien , tants forts estoient les charmes de cette Circé, aydez de ce diabolique esprit, de du Guast. De façon qu'au lieu de tirer profit de mes paroles, il les redisoit toutes à cette femme. Que peut on celer à celuy que l'on aime ? Elle s'en animoit contre moy, & seruoit avec plus d'affection au dessein de du Guast, & pour s'en venger dispoisoit tousiours dauantage le Roy mon mary à me haïr & s'estranger de moy, de sorte qu'il ne me parloit plus. Il reuenoit de chez elle fort tard, & pour l'empescher de me voir elle luy commandoit de se trouuer au leuer de la Reyne , où elle estoit subiette d'aller , & apres tout le iour il ne bougeoit plus d'avec elle. Mon frere n'apportoit moins de soin à la rechercher , elle leur faisant accroire à tous deux qu'ils estoient vniquement aimez d'elle. Ce qui n'auançoit moins leur ialousie & leur diuision que leur ruine. Nous fîmes vn long seiour en Auignon , vn tour par la Bourgogne & la Champagne pour aller à Rheims aux nopces du Roy , & de là venir à Paris , où les choses

se comporterent tousiours de cette façon. La trame de du Guast alloit par ces moyens tousiours s'auançant à nostre diuision & ruine. Estans à Paris, mon frere approcha de luy Bussi, en faisant autant d'estime que de sa valeur le meritoit. Il estoit tousiours aupres de mon frere, & par consequent avec moy, mon frere & moy estans presque tousiours ensemble, & ordonnant à tous ses seruiteurs de ne m'honorer & rechercher moins que luy. Tous les hommes & gens de sa suite accomplissoient cet agreable commandement avec tant de subietion, qu'ils ne me rendoient moins de seruice qu'à luy. Vostre tante voyant cela, m'a souuent dit que cette belle vnion de mon frere & de moy luy faisoit resllouenir du temps de Monsieur d'Orleans mon oncle & de Madame de Sauoye ma tante. Le Guast, qui estoit vn poltron de ce temps, y donnant interpretation contraire; pensa que la fortune luy offroit vn beau moyen pour se haster plus viste d'arriuer au but de son dessein, & par le moyen de Madame de Sauue s'estant introduit en la bonne grace du Roy mon mary, tâcha par toute voye de luy persuader que Bussi me seruiroit. Et voyant qu'il n'auançoit rien, estant assez aduertty par ses gens, qui estoient tousiours avec moy, de mes deportemens qui ne tendoient à rien de semblable, il s'adressa au Roy, qu'il trouua plus facile à persuader, tant pour le peu de bien qu'il vouloit à mon frere & à moy, nostre amitié luy estant suspecte & odieuse, que pour la haine qu'il auoit à Bussi, qui l'ayant

autrefois fuiuy, l'auoit quitté pour se dedier à mon frere. Acquisition qui accroissoit autant la gloire de mon frere que l'enuiede nos ennemis, pour n'y auoir rien en ce siecle - là de son sexe & de sa qualité de semblable en valeur, reputation, grace & esprit; En quoy quelques - vns disoient que s'il falloit croire la transimulation des ames, comme quelques Philosophes ont tenu, que sans doute celle de Hardelay vostre braue frere animoit celle de Bussi. Le Roy imbu de ceia par le Guast, en parla à la Reyne ma Mere, la conuiant à en parler au Roy mon Mary, & tâchant de le mettre aux mesmes aigreurs qu'il l'auoit mis à Lyon. Mais elle voyant le peu d'apparence qu'il y auoit l'en rejeta, luy disant, ie ne sçay qui sont les broüillons qui vous mettent telles opinions en la fantaisie. Ma fille est mal-heureuse d'estre venue en vn tel siecle. De nostre temps nous parlions librement à tout le monde, & tous les honnestes gens qui suiuoient le Roy vostre pere, Monsieur le Dauphin & Monsieur d'Orleans vos Oncles, estoient d'ordinaire à la Chambre de madame Marguerite vostre tante & de moy, & personne ne le trouuoit estrange, comme aussi n'y auoit - il pas de quoy. Bussi voit ma fille deuant vous, deuant son mary en sa chambre, deuant tous le gens de son mary, & deuant tout le monde. Ce n'est pas en cachette n'y à porte fermée. Bussi est personne de qualité, & le premier auprès de vostre frere. Qu'y a t'il à penser; en sçauiez - vous autre chose que par vne calomnie; A Lion vous

me luy auez fait faire vn affront tres - grand ; duquel ie crains bien qu'elle ne se ressentir toute sa vie. Le Roy demeurant tout estonné, Madame, dit-il, ie n'en parle qu'apres les autres. Elle respondit ; Qui sont ces autres ? Mon fils, ce sont gens qui vous veulent mettre mal avec tous les vostres. Le Roy s'en estant allé elle me raconta le tout, & me dit ; Vous estes née dans vn miserable temps, & appellant vostre tante Madame de Dampierre elle se mit à discourir avec elle de l'honneste liberté des plaisirs qu'ils auoient de ce temps-là, sans estre sujets comme nous à la médifance. Le Guast voyant la mine esuentée, & qu'elle n'auoit pris feu de ce costé là, comme il desiroit, s'adresse à certains Gentils-hommes qui suiuoient lors le Roy mon mary, qui iusques alors auoient esté compagnons de Bussi, & depuis deuenus ses ennemis, pour la jalousie que leur apportoit son auancement & sa gloire. Ceux-cy joignans à cette enuieuse haine vne zele inconsidéré au seruice de leur Maistre, ou pour mieux dire, couurans leur enuie de ce pretexte, se resolurent vn soir sortant tard du coucher de son Maistre pour se retirer en son logis, de l'assassiner. Et comme les honnestes gens qui estoient auprès de mon frere auoient accoustumé de l'accompagner, ils sçauoient qu'ils ne le trouueroient avec moins de quinze ou vingt hōnestes hommes, & que bien que pour la blessure qu'il auoit au bras droit depuis peu de iours qu'il s'estoit battu contre Saint Val, il ne portast point d'épée, sa presence seroit suffisante pour

redoubler le courage à ceux qui estoient avec luy ; ce que redoutans , & voulans faire leur entreprise assésurée, ils resolurent de l'attaquer avec deux ou trois cens hommes , le voile de la nuit couurant la honte d'un tel assassinat. Le Guast qui cōmandoit au regiment des gardes, leur fournit de soldats , & se mettans en cinq ou six troupes en la plus prochaine rue de son logis où il falloit qu'il passast, le chargent esteignant les torches & flambeaux. Apres vne salue d'arquebusades & pistoletades qui eust suffi , non à attraper vne troupe quinze ou vingt hommes , mais à deffaire vn regiment, ils viennent aux mains avec sa troupe , taschant tousiours dans l'obscurité de la nuit à le remarquer pour ne le faillir , & ne le connoissans à vne escharpe colombine où il portoit son bras droit blessé , bien a propos pour eux , qui en eussent senty la force , qui furent toutes fois bien soustenus de cette petite troupe d'honnestes gens qui estoient avec luy , à qui l'inopinée rencontre ny l'horreur de la nuit n'osta le cœur ny le iugement ; mais faisans autant de preuue de leur valeur que de l'affection qu'ils auoient à leur amy , à force d'armes le passerent iusques à son logis, sans perdre aucun de leur troupe, qu'un Gentil homme qui auoit esté nourry avec luy , qui ayant esté blessé auparauant à un bras portoit vne escharpe colombine comme luy , mais toutesfois bien differente pour n'estre enrichie comme celle de son maistre ; toutesfois en l'obscurité de la nuit où le transport où l'animosité de ces assassins qui auoient le mot de donner tous à

l'escharpe colombine , fist que toute la troupe se ietta sur ce pauvre Gentil-homme , pensant que ce fust Bussi , & le laissèrent pour mort en la ruë. Vn Gentil-homme Italien qui estoit à mon frere y estant , de premier abord l'effroy l'ayant pris il s'en accourt tout sanglâ dans le Loure , & iusques à la chambre de mon frere qui estoit couché , criant que l'on assassinoit Bussi. Mon frere soudain y voulut aller. De bonne fortune ie n'estois point encore couchée , & estois logée si pres de mon frere , que i'ouïs cét homme effrayé crier par les degrez cette espouuanteable nouuelle aussi-tost que luy. Soudain ie cours en sa chambre pour l'épescher de sortir , & enuoya y prier la Reyne ma Mere d'y venir pour le retenir , voyant que la iuste douleur qu'il sentoit l'emportoit tellement hors de luy-mesme , que sans consideration il se fust precipité à tous dangers pour courir à la vengeance. Nous le retenons à toute peine , la Reyne ma Mere luy representans qu'il n'y auoit nulle apparence de sortir seul comme il étoit pendant la nuit que l'obscurité couure toute meschanceté ; Que le Guast estoit peut estre assez meschant d'auoir fait cette partie expressement pour le faire sortir mal à propos , afin de le faire tomber en quelque accident. Au desespoir qu'il estoit ces paroles eussent eu peu de force. Mais elle y vsant de son autorité l'arresta ; & commanda aux portiers que l'on ne le laissast sortir , prenant la peine de demeurer avec luy iusques à ce qu'il sceut la verité de tout. Bussi que Dieu auoit garanty miraculeusement de ce danger ,

ne s'estant troublé pour ce hazard , son ame n'estant point susceptible de la peur , estant né pour estre la terreur de ses ennemis , la gloire de son Maistre , & l'esperance de ses amis , entré qu'il fust en son logis, soudain il se souuint de la peine en quoy seroit son maistre si la nouvelle de cette rencontre estoit portée iusques à luy incertainement , & craignant que cela le fist jetter dans les filets de ses ennemis, comme sans doute il eust fait , si la Reyne mere ne l'en eust empesché , enuoya soudain vn des siens , qui apporta la nouvelle à mon frere de la verité du tout. Et le iour estant venu , Bussi sans crainte de ses ennemis reuint dans le Louure avec la façon aussi braue&aussi ioyeuse , que si cét attentat luy eust esté vn tournoy pour plaisir. Mon frere aussi aise de le reuoir , que plein de dépit & de vengeance, témoigna assez , comme il ressentoit l'offense qui luy auoit esté faite de l'auoir voulu priuer du plus braue&plus digne seruiteur dont Prince de sa qualité eust iamais connoissance , bien que du Guast s'attaquoit à Bussi, pour ne s'oser prendre du premiere abord à luy. - mesme. La Reyne ma Mere , la plus prudente & aduisée qui ait iamais esté , connoissant de quel poids estoient tels effets , & preuoyant qu'ils pourroient enfin mettre ses deux enfans mal ensemble ; conseilla mon frere que pour leuer tel pretexte, il fit que pour vn temps Bussi s'eloignât de la Cour ; à quoy mon frere consentit par la priere que ie luy en fis, voyant bien que s'il demcuroit le Guast le mettroit tousiours en jeu , & le feroit seruir de couuerture à son per-

pernicieux dessein , qui estoit de maintenir mon frere & le Roy mon mary mal ensemble , comme il luy auoit mis par les artifices susdits. Bussi qui n'auoit autre volôté que celle de son Maistre , partist accompagné de la plus braue noblese qui fut à la Cour qui suiuoit mô frere. Ce sujet estant aisé au Guast , & voyant que le Roy mon mary ayât eu en ce mesme temps pendât la nuict vne fort grande foiblesse , en laquelle il demeura éuanoüy l'espace d'vne heure (qui luy venoit , comme ie croy , d'excez qu'il auoit faits avec les femmes ; car ie ne l'y auois iamais veu sujet) où ie l'auois seruy & assisté comme le deuoir me le commandoit ; dequoy il restoit si content de moy qu'il s'en louoit à tout le monde , disant que sans que ie m'en estois apperçeuë que i'auois soudain couru à le secourir , & appeller mes femmes & ses gens, il estoit mort & qu'à cette cause il m'en faisoit beaucoup meilleur chere , & que depuis l'amitié de luy & de mon frere commençoit à se renouër , estimant tousiours que i'en estois la cause , & que ie leur estois (comme l'on voit en toutes les choses naturelles , mais plus apparemment aux serpens coupez] vn certain beaume naturel qui reünit & rejoint les parties séparées ; Pour suiuañt toûjours la pointe de son premier & pernicieux dessein , & recherchant de fabriquer quelque nouuelle invention pour nous rebroüiller le Roy mon mary & moy , mit à la teste du Roy , qui depuis peu de iours auoit osté par le mesme artifice de du Guast à la Reine sa sacrée Princeesse, tres vertueuse & bonne , vne fille qu'elle ay-

moit fort , & qui auoit esté nourrie avec elle , nommée Changi, qu'il deuoit faire que le Roy mon Mary m'en fist de mesme, m'ostant celle que i'aimois le plus , nommée Torigny , sans autre raison , sinon qu'il ne falloit point laisser à de ieunes Princesses des filles en qui elles eussent particuliere amitié. Le Roy persuadé de ce mauuais homme en parla plusieurs fois à mon mari ; qui luy respondit qu'il scauoit bien qu'il me feroit vn cruel desplaisir ; Que si i'aimois Torigny, i'en auois occasion Qu'outre ce qu'elle auoit esté nourrie avec la Reyne d'Espagne ma sœur, & avec moy depuis mon enfance , elle auoit beaucoup d'entendement , & que mesme elle l'auoit beaucoup seruy en sa captiuité du bois de Vincennes , Qu'il seroit ingrat s'il ne s'en ressouuenoit , & qu'il auoit autresfois veu que sa Majesté en faisoit grand estat plusieurs fois. Il s'en deffendit de cette façon ; mais enfin le Guast persistant tousiours à pousser le Roy , & iusques à luy faire dire au Roy , mon mary qu'il ne l'aimeroit iamais si dans le lendemain il ne m'auoit osté Torigny, il fust contraint à son grand regret, comme depuis il me l'a auoüé, de m'en prier & me le commander. Ce qui me fust si aigre , que ie ne me pûs empescher de luy tesmoigner par mes larmes combien i'en receuois de desplaisir : luy remonstrant que ce qui m'en affligoit le plus n'estoit point l'esloignement de la presence d'vne personne qui depuis mon enfance s'estoit tousiours rendue subiette & vtile aupres de moy, mais que sachant comme ie l'aimois ie n'ignorois pas combien son

partement si precipité porteroit de prejudice a ma reputation. Ne pouuant receuoir ces raisons , pour la promesse qu'il auoit fait au Roy de me faire ce desplaisir , elle partist le iour mesme , se retirant chez vn sien cousin, nommé monsieur Chastelas. Je restay si offensée de cette indignité à la suite de tant d'autres, que ne pouuant plus resister à la iuste douleur que ie ressentois, qui bannissant toute prudence de moy , m'abandonnoit à l'ennuy , ie ne me pûs plus forcer de rechercher le Roy mon mary. De sorte que le Guast & Madame de Sauue d'vn costé l'estrangeant de moy , & moy m'esloignant aussi , nous ne couchions plus & ne parlions plus ensemble.





L I V R E

D E V X I E S M E .

QVELQUES iours apres quelques bons seruiteurs du Roy mon mary luy ayant fait connoistre l'artifice , par le moyen duquel on le menoit à sa ruine , le mettant malauec mon frere & moy , pour le separer de ceux de qui il deuoit esperer le plus d'appuy , pour apres le laisser-là , & ne tenir conte de luy. Comme le Roy commençoit à n'en faire pas grand estat & à le mépriser , ils le firent parler à mon frere, qui depuis le partement de Bussi n'auoit pas amandé sa condition (car le Guast tous les iours luy faisoit receuoir quelques nouvelles indignitez) & connoissans qu'ils estoient tous deux en mesme prédicament à la Cour aussi defauorisez l'un que l'autre , que le Guast seul gouuernoit le monde , qu'il falloit qu'ils mendiasent de luy ce qu'ils vouloient obtenir auprès du Roy ; que s'ils demandoient quelque chose ils estoient refusez avec mépris ; que si quelqu'un se rendoit leur seruiteur, il estoit aussi-tost ruiné, & attaqué de mille querelles que l'on luy suscitoit ; ils se resolurent, voyant que leur des-vnion estoit leur ruine, de se reuinir & se retirer de la Cour, pour, ayant assemblé leurs seruiteurs &

amis, demander au Roy vne condition & vn traitement digne de leur qualité; mon frere n'ayant eu iusques à lors son appennage, & s'entretenant seulement de certaines pensions mal assignées, qui venoient seulement quand il plaisoit au Guast; & le Roy mon mary ne jouissant nullement de son Gouuernement de Guyenne, ne luy estant permis d'y aller ny en aucunes de ses terres. Cette resolution estant prise entr'eux, mon frere m'en parla, me disant qu'à cette heure ils estoient bien ensemble, & qu'il desiroit que nous fussions bien le Roy mon mary & moy, & qu'il me prioit d'oublier tout ce qui s'estoit passé; Que le Roy mon mary luy auoit dit qu'il en auoit vn extrême regret, & qu'il connoissoit bien que nos ennemis auoient esté plus fins que nous; mais qu'il se resoluoit de m'aimer, & de me donner plus de contentement de luy. Il me prioit aussi de mon costé de l'aimer, & de l'assister en ses affaires en son absence. Ayant pris resolution tous deux ensemble que mon frere partiroit le premier, se déroband dans vn carrosse, comme il pourroit; & qu'à quelques iours de là le Roy mon mary feignant d'aller à la chasse le suiuroit (regrettans beaucoup qu'ils ne me pouuoient emmener avec eux, toutesfois s'assurant qu'on ne me scauroit faire du déplaisir les scachans dehors; aussi qu'ils firent bien-tost paroistre que leur intention n'estoit point de troubler la France, mais seulement d'establiir vne condition digne de leur qualité, & se mettre en seureté; car parmy ces trauerses ils n'estoient pas sans crainte de

leur vie , fust ou que veritablement ils fussent en danger, ou que ceux qui desiroiēt la diuision & ruine de nostre maison pour s'en preualoir, leur fissent donner des allarmes par les continuels aduertissemens qu'ils en receuoient,) le soir venu, peu auant le soupper du Roy, mon frere changeāt de manteau & le mettant autour du nez, sort, seulement suiuy d'un des siens qui n'estoit pas reconnu; & s'en va à pied iusques à la porte saint Honoré, où il trouua Simie avec le carrosse d'une Dame, qu'il auoit emprunté pour cet effet, dans lequel il se mist, & va iusques à quelques maisons à un quart de lieuë de Paris, où il trouua des cheuaux qui l'attendoient, sur lesquels montant, à quelque lieuë de là il trouua deux ou trois cens cheuaux de ses seruiteurs qui l'attendoient au rendez-vous qu'il leur auoit donné. L'on ne s'apperceust point de son partement que sur les neuf heures du soir. Le Roy & la Reyne ma Mere me demanderent pourquoy il n'auoit point souppé avec eux, & s'il estoit malade. Je leur dis que ie ne l'auois point veu depuis l'apres-dinée. Ils enuoyerent en sa chambre voir ce qu'il faisoit. On leur vint dire qu'il n'y estoit pas. Ils disent qu'on le cherche par toutes les chambres des Dames où il auoit accoustumé d'aller. On cherche par le chasteau, on cherche par la ville, on ne le trouue point. A cette heure-là l'allarme s'eschauffe. Le Roy se met en cholere, se courrouce, menace, enuoye querir tous les Princes & Seigneurs de la Cour, leur cōmande de monter à cheual & le luy ramener vif ou mort, disant qu'il s'en va troubler son

Estat pour luy faire la guerre , & qu'il luy fera connoistre la follic qu'il faisoit de s'attaquer à vn Roy si puissant que luy. Plusieurs de ces Princes & Seigneurs refuserent cette commission, remonstrant au Roy de quelle importance elle estoit ; Qu'ils voudroient mettre leur vie en ce qui seroit du seruice du Roy , comme ils sçauoient estre de leur deuoir ; mais d'aller contre Monsieur son frere, ils sçauoient bien que le Roy leur en sçauroit vn iour mauuais gré , & qu'il s'assëurast que mon frere n'entreprendroit rien qui pust desplaire à sa Majesté , ny qui pust nuire a son Estat ; Que peut estre c'estoit vn mescontentement qui l'auoit conuié à s'esloigner de la Cour ; Qu'il leur sembloit que le Roy deuoit enuoyer deuers luy , pour s'informer de l'occasion qui l'auoit meu à partir, auant que prendre resolution à toute rigueur cōme celle-cy. Quelques autres accepterent, & se preparerēt pour monter à cheual. Ils ne pūrent faire telle diligence qu'ils pūssent partir plustost que sur le point du iour ; qui fust cause qu'ils ne trouuerent point mon frere , & furent contraints de reuenir pour n'estre pas en equipage de guerre. Le Roy pour ce depart ne monstra pas meilleur visage au Roy mon mary , mais, en faisant aussi peu d'estat qu'à l'accoustumée le tenoit tousiours de mesme façon. Ce qui le confirmoit en la resolution qu'il auoit prise avec mon frere ; de sorte que peu de iours apres il partit feignant d'aller à la chasse. Moy le lendemain du depart de mon frere les pleurs qui m'auoient accompagnée toute la nuit , m'es-

meurent vn si grand rhume sur la moitié du visage, que i'en fus, avec vne grosse fièvre arrestée dās le lit pour quelques iours, fort malade & avec beaucoup de douleurs. Durāt laquelle maladie le Roy mon mary, ou qu'il fut occupé à disposer de son parlement, ou qu'ayant à laisser bien-tost la Cour, il voulust donner ce temps qu'il auoit à y estre à la seule volupté de joiyr de la presence de sa Maistresse Madame de Sauue, ne pensant auoir le loisir de me venir voir en ma chambre, & reuenant pour se retirer à l'accoustumée à vne ou deux heures apres minuiet, couchant en deux lits, comme nous couchions touiours, ie ne l'entendois point venir, & se leuant auant que ie fusse éueillée pour se trouuer, comme i'ay dit cy-deuant au leuer de Madame ma Mere, où Madame de Sauue alloit, il ne se souuenoit point de parler à moy comme il auoit promis à mon frere, & partit de cette façon sans me dire adieu. Ie ne laissay pas de demeurer soupçonnée du Roy que i'estois la seule cause de ce parlement, & jettant feu contre moy, s'il n'eust esté retenu de la Reynema Mere, sa colere ie crois luy eust fait executer contre ma vie quelque cruauté; mais estant retenu par elle, & n'osant faire pis, soudain il dit à la Reyne ma Mere que pour le moins il me falloit dōner des gardes, pour empescher que ie ne suiuisse le Roy mon mary, & aussi pour en garder que persōne ne communiquast avec moy, afin que ie ne les aduertisse de ce qui se passoit à la Cour. La Reyne ma Mere voulant faire toutes choses avec douceur, luy dit qu'elle le trouuoit bon.

ainſi (bien aïſe d'auoir pû rabattre iuſques au premier mouuement de ſa colere) mais qu'elle me viendroit trouuer pour me diſpoſer à ne trouuer ſi rude ce traitement-là ; Que ces aigreurs ne demeureroient touſiours en ces termes ; Que toutes les choſes du monde auoient deux faces : Que cette premiere , qui eſtoit triſte & affreuſe , eſtant tournée , quand nous viendrons à voir la ſecõde plus agreable & plus tranquille à nouueaux euenemens , on prendroit nouueau conſeil : Que lors peut-eſtre on auroit beſoin de ſe ſeruir de moy : Que comme la prudence conſeilloit de viure avec ſes amis , comme deuant vn iour eſtre ſes ennemis , pour ne leur cõfier rien de trop , qu'auiſſi l'amitié venant à ſe rompre , & pouuant nuire , elle ordonnoit d'vſer de ſes ennemis , comme pouuans eſtre vn iour amis. Ces remonſtrances empeschèrent bien le Roy de me faire ennuy , (ce qu'il euſt bien voulu) mais le Guast luy donnant l'inuention de décharger ailleurs ſa colere , fit que ſoudain , pour me faire le plus cruel déplaiſir qui ſe pouuoit imaginer il enuoya des gens à la maiſon de Chaſtelas , couſin de Torigny , pour ſous ombre de le prendre l'amener au Roy , le noyer en vne riuiera qui eſtoit près de là. Eux arriuez Chaſtelas les laiſſe librement entrer dans la maiſon , ne ſe doutant de rien. Eux ſoudain la voyant dedans , les plus forts vſans avec autant d'indiscretion que d'imprudẽce de la ruineuſe charge qui leur auoit eſté donnée , prennent Torigny , le lient , l'enferment dans vne chambre , attendans de partir que leurs

cheuaux eussent repeu; Cependant vsans à la Françoisé sans se garder de rien, se gorgeans iusques au creuer de tout ce qui estoit de meilleur en cette maison. Chastelas qui estoit homme aduisé, n'estant pas marry qu'aux déçës de son bien on pût gagner ce temps pour retarder le partement de sa cousine, esperant que qui a temps a vie, & que Dieu, peut-estre, changeroit le cœur du Roy, qui contremanderoit ces gens icy pour ne me vouloir si aigrement offenser, & n'osant ledit Chastelas entreprendre par autre voye de les empescher, bien qu'il auoit des amis assez pour le faire. Mais Dieu qui a tousiours regardé mon affliction pour me garantir des dangers & des déplaisirs que mes ennemis me pourchassoient, plus à propos que moy-mesme ie ne l'e eusse pu requerir quand i'eusse sçeu cette entreprise que i'ignorois, prepara vn inespéré secours pour deliurer Torigny des mains de ces scelerats, qui fut tel. Quelques valets & chambrières s'en estans fuis pour la crainte de ces satellites qui battoient & frapportoient là dedans comme en vne maison de Pillage, estans à vn quart de lieuë de la maison, Dieu guida par là la Ferté & Auantigny avec leurs troupes, qui estoient bien deux cens cheuaux, qui s'alloient ioindre à l'Armée de mon frere, & fit que la Ferté reconnust parmy cette troupe de payfans vn homme éploré, qui estoit à Chastelas, & luy demanda ce qu'il auoit, & s'il y auoit quelques gens-d'armes qui leur eussent fait quelque tort. Le valet luy respond que non, & que la cause qui les rendoit ainsi tourmentez, estoit

l'extremité en quoy il auoit laissé son maistre pour la prise de sa cousine. Soudain la Ferté & Auantigny se resolurent de me faire ce bon office de deliurer Torigny, loüians Dieu de leur auoir offert vne si belle occasion de me pouuoir tesmoigner l'affection qu'ils m'auoient tousiours eüe; & hastans le pas eux & toutes leurs troupes arriuerent si à propos à la maison dudit Chastelas, qu'ils trouuerent ces soldats sur le point qu'ils vouloient mettre Torigny sur vn cheual pour l'emmener noyer. Entrans donc tous à cheual l'espée à la main dans la court, & criants; Arrestez-vous, bourreaux, si vous luy faites mal vous estes morts, ils commencerent à les charger; & eux se met-tans à fuir laisserēt leur prisonnier aussi transportée de ioye, que translie de frayeur, & après auoir rendu graces à Dieu & à eux d'vn si salutaire & si necessaire secours, faisant apprester le chariot de sa cousine de Chastelas, elle s'en va avec sondit cousin accompagnée de l'escorte de ces honnestes gens trouuer mon frere; qui fust tres-aïse, ne me pouuant auoir aupres de luy, d'y auoir vne personne que i'aimasse comme elle. Elle y fust tant que le danger dura, traittée & respectée comme si elle eust esté aupres de moy. Pendant que le Roy faisoit cette belle despeche pour sacrifier Torigny à son ire, la Reyne ma Mere, qui n'en sçauoit rien, m'estoit venuë trouuer en ma chambre que ie m'abillois encore, faisant estat, bien que ie fusse encor mal de mon rhume, mais plus malade en l'ame qu'au corps de l'ennuy qui me possèdoit, de sortir ce iour-là

de ma chambre, pour voir vn peu le cours du monde sur ces nouueaux accidens, estant toujours en peine de ce qu'on entreprendroit contre mon frere & le Roy mon mary. Elle me dit; Ma fille, vous n'auiez que faire de vous haster de vous habiller; Ne vous faschez point ie vous prie de ce que i'ay à vous dire; vous auez de l'entendement, ie m'assieure que vous ne trouuerez point estrange que le Roy se sente offensé contre vostre frere & vostre mary, & que sçachant l'amitié qui est entre vous, croyant que vous sçauiez leur partement, il soit resolu de vous tenir pour ostage de leur depart. Il sçait combien vostre mary vous aime, & ne peut auoir vn meilleur gage de luy que vous. Pour cette cause il a commandé que l'on vous mit des gardes, pour vous empescher que vous ne sortiez de vostre chambre. Aussi que ceux de son conseil luy ont représenté que si vous estiez libre parmy nous, vous decouuririez tout ce qui se deliberoit contre vostre frere & vostre mary, & les aduertiriez; ie vous prie de ne le trouuer mauuais. Cecy, si Dieu plaist, ne durera gueres. Ne vous faschez point, aussi ie n'ose si souuent vous venir voir; car ie craindrois d'en donner soupçon au Roy; mais assieurez vous que ie ne permettray point qu'il vous soit fait aucun déplaisir, & que ie feray tout ce que ie pourray pour mettre la paix entre vos freres. Je luy representay cōbien estoit grande l'indignité qu'on me faisoit en cela. Je ne voulois pas defauolier que mon frere m'auoit tousiours cōmuniqué tous ses iustes mécontentemens; mais pour le Roy

mon mary, depuis qu'il m'auoit osté Thorigny nous n'auions point parlé ensemble; Que mesme il ne m'auoit point veuë en ma maladie & ne m'auoit point dit adieu. Elle me répond; Ce sont petites querelles de mary à femme; mais on sçait bien qu'avec des douces lettres il vous regagnera le cœur, & que s'il vous mande de l'aller trouuer vous iriez; ce que le Roy mon fils ne veut pas. Elle s'en retournât, je demeuray en cét estat quelques mois, sans que personne, ny mesme mes plus priuez amis m'osassent venir voir, craignans de se ruiner. A la Cour, l'aduersité est tousiours seule, comme la prosperité est accompagnée, & la persecution assistée des vrais & entiers amis. Le seul braue Grillon fust celuy qui méprisant toutes deffenses & toutes défaueurs, vingt cinq ou six fois en ma chambre, estonnant tellement de crainte les Cerberes que l'on auoit mis à ma porte, qu'ils n'osèrent iamais le dire, ny luy refuser le passage. Durant ce temps-là le Roy mon mary estant arriué en son Gouvernement, & ayant joint ses seruiteurs & amis, chacun luy remonstra le tort qu'il auoit eu d'estre party sans me dire adieu, luy disant que i'auois de l'entendement pour le pouuoir seruir, & qu'il falloit qu'il me regagnast, Qu'il retireroit beaucoup d'vtilité de mon amitié & de ma presence, lors que les choses estant pacifiées, il me pourroit auoir auprès de luy. Il fut aisé à se persuader en cela, estant éloigné de sa Circé Madame de Sauue. Ses charmes ayans perdu par l'absence leur force (ce qui le rendoit sans raison pour recon-

noistre

noistre clairement les artifices de nos ennemis, & que la diuision qu'ils auoient trouuée entre nous, ne luy procuroit moins de ruine qu'à moy (il m'escriuist vne tres-honneste lettre, où il me prioit d'oublier tout ce qui s'étoit passé entre nous, & croire qu'il me vouloit aimer, & me le faire paroître plus qu'il n'auoit iamais fait; me commandant aussi de le tenir aduertý de l'estat des affaires qui se passoient où i'estois, de mon estat, & de celuy de mon frere: car ils estoient éloignez, bien qu'amis d'intelligence mon frere estant vers la Champagne, & le Roy mon mary en Gascogne. Je receus cette lettre estant encore captiue, qui m'apporta beaucoup de consolation & soulagement, & ne manquay depuis (bien que les gardes eussent charge de ne me laisser écrire) aydée de la necessité, mere de l'inuention, de luy faire souuent tenir de mes lettres. Quelques iours apres que ie fus arrestée, mon frere sceut ma captiuité, qui laigrit tellement, que s'il n'eust eu l'affection de sa patrie dans le cœur, autāt en racinée comme il auoit de part & d'interest à cet estat, il eust fait vne si cruelle guerre (comme il en auoit le moyen, ayant lors vne belle armée) que le peuple eust porté la peine des effets de leur Prince; mais retenu par le deuoir de cette naturelle affection, il escriuit à la Reyne ma Mere, que si l'on me traittoit ainsi on le mettoit au dernier desespoir. Elle craignant de voir venir les aigreurs de cette guerre à cette extremité qu'elle n'euff le moyen de la pacifier, remonstra au Roy de quelle importance cette guerre luy estoit, &

se trouua disposé à receuoir ses raisons, son ire estant moderée par la connoissance du peril où il se trouuoit, estant attaqué en Gascogne, Dauphiné, Languedoc & Poictou, & du Roy mon mary, & des Huguenots : qui tenoient plusieurs belles places, & de mon frere en Champagne, qui auoit vne grosse armée composée de la plus belle & gaillarde Noblesse qui fust en France; & n'ayant pû depuis le depart de mon frere, par prieres, commandement ny menaces, faire monter personne à cheual contre mon frere, tous les Princes & Seigneurs de France, redoutant sagement de mettre le doigt entre deux pierres. Tout considéré, le Roy preste l'oreille aux remonstrances de la Reyne ma mere, & se rend non moins desireux qu'elle de faire vne paix, la priant de s'y employer & d'en trouer le moyen. Elle soudain se dispose d'aller trouuer mon frere, representant au Roy qu'il estoit necessaire qu'elle m'y menast; mais le Roy n'y voulust consentir, estimant que ie luy seruois d'un grand ostage. Elle donc s'en va sans moy & sans m'en parler; & mon frere voyant que ie n'y estois pas luy representa le iuste mécontentement qu'il auoit, & les indignitez & mauuais traitemens qu'il auoit receus à la Cour, y joignant celuy de l'injure qu'on m'auoit faite, m'ayant retenuë captiue, & la cruauté, que pour m'offenser on auoit voulu faire à Torigny, disant qu'il n'écouteroit iamais nulle ouuerture de paix, que le tort que l'on m'auoit fait ne fust réparé, & qu'il ne me vist satisfaite & en liberté. La Reyne ma mere voyant cette responce reuint, & repre-

fenta au Roy ce que luy auoit dit mon frere,
 qu'il estoit neceſſaire, s'il vouloit vne paix
 qu'elle y retournaſt, mais que d'y aller ſâs moy
 ſon voyage ſeroit encore inutile, & croiſtroit
 pluſtoſt le mal que de le diminuer; Qu'auffi de
 m'y mener ſans m'auoir premier contentée, i'y
 nuirois pluſtoſt que d'y ſeruir, & que meſme il
 ſeroit à craindre qu'elle n'eût de la peine à me
 ramener, & que ie ne vouluſſe aller trouuer
 mon mary; Qu'il falloir m'oſter les gardes, &
 trouuer moyen de me faire oublier le traitem-
 ment qu'on m'auoit fait, ce que le Roy trouua
 bon, & ſ'y affectionna autant qu'elle. Soudain
 elle m'enuoye querir, me diſant qu'elle auoit
 tant fait qu'elle auoit diſpoſé les choſes à la
 voye d'une paix; Que c'eſtoit le bien de cét
 Eſtat: Qu'elle ſçauoit que mon frere & moy
 auions touſiours deſiré; Qu'il ſe pouuoit faire
 vne paix ſi auantageuſe pour mon frere, qu'il
 auroit occaſion de reſter content, & hors de la
 tyrannie de du Gaſt, & de tous autres tels
 malicieux qui pourroient poſſeder le Roy;
 Qu'en outre tenant la main à faire vn bon ac-
 cord entre le Roy & mon frere, ie la deliurerois
 d'un mortel ennuy qui la poſſedoit, ſe trou-
 uant en tel eſtat qu'elle ne pouuoit ſans mor-
 telle offenſe, receuoir la nouuelle de la victoi-
 re de l'un ou de l'autre de ſes fils; Qu'elle
 me prioit que l'iniure que j'auois receuë ne
 me fit deſirer pluſtoſt la vengeance que la
 paix; Que le Roy en eſtoit marry, qu'elle
 l'en auoit veu pleurer; & qu'il m'en feroit
 telle ſatisfaction que i'en reſterois contente.
 Je luy reſpondis que ie ne prefererois iamais

bien particulier au bien de mes freres & de
cét Estat, pour le repos & contentement du-
quel je me voudrois sacrifier. Que ie ne souhit-
tois rien tant qu'une bonne paix, & que j'y vou-
drois servir de tout mon pouuoir. Le Roy en-
tra sur cela en son cabinet, qui avec vne infi-
nité de belles paroles tascha à me satisfaire, &
me conuia à son amitié, voyant que ny mes
façons, ny mes paroles ne demonstroient aucun
ressentiment de l'injure que j'auois receüe. Ce
que ie faisois plus pour le mépris de l'offense
que pour la satisfaction; ayant passé le temps
de ma captiuité au plaisir de la lecture, où ie
commençay lors à me plaire; n'ayant cette obli-
gatiō à la fortune; mais plustost à la prouiden-
ce diuine, qui dès lors cōmença à me produire
vn si bon remede pour le soulagement des en-
nuis qui m'estoient preparez à l'aduenir. Ce
qui m'estoit aussi vn acheminement à la deuo-
ion, lisant en ce beau liure vniuersel de la natu-
re tant de merueilles de son Createur. Car toute
ame bien née faisant de cette connoissance vne
eschelle, de laquelle Dieu est le dernier & le
plus haut eschelon, rauie se dresse à l'adoration
de la merueilleuse lumiere & splendeur de cette
incomprehensible Essence; & faisant vn cercle
parfait ne se plaist plus à autre chose qu'à sui-
ure cette chaisne d'H'omere, cette agreable en-
cyclopedie, qui part de Dieu mesme principe &
fin de toutes choses. Et la tristesse contraire à la
joye qui emporte hors de nous les pensées de
nos actions, reueille nostre ame en soy-mesme,
qui rassemblant toutes ses forces pour rejeter
le mal & rechercher le bien, pense & repense

sans cesse pour choisir ce souuerain biē, auquel pour assēurance elle puisse trouuer quelque tranquillité; qui sont de belles dispositions pour venir à la connoissance & amour de Dieu. Je receus ces deux biens de la tristesse & de la solitude à ma premiere captiuité, de me plaie à l'estude, & m'adonner à la deuotion, bien que ie ne les eusse iamais gonstées entre les vanitez & magnificences de ma prospere fortune. Le Roy, comme i'ay dit, ne voyant en moy nulle apparence de mécontentement, me dist que la Reyne ma Mere s'en alloit trouuer mon frere en Champagne pour traiter vne paix, qu'il me prioit de l'accompagner, & y apporter tous les bons offices que ie pourrois ? & qu'il scauoit que mon frere auoit plus de creance en moy qu'en tout autre. Que de ce qui viendrait de bien en cela il m'en donneroit l'honneur, & m'en resteroit obligé. Je luy promis ce que ie voulois faire, car c'estoit le bien de mon frere, & celuy de l'Estat, qui estoit de m'y employer en sorte qu'il en resteroit contēt. La Reyne ma Mere part, & moy avec elle, pour aller à Sens; la conference se deuant faire en la maison d'un Gentil-hōme à vne lieuē de-là. Le lendemain nous allasmes au lieu de la conference. Mon frere s'y trouua, accompagné de quelques vnes de ses troupes, & des principaux Seigneurs & Princes Cathbriques de son armée, entre lesquels estoit le Duc Casimir, & le Colonel Poux, qui luy auoient amené six mille Raïstres, par le moyen de ceux de la Religion qui s'étoiet joints avec mon frere à cause du Roy mō mary. L'on gaita là plusieurs jours de la paix,

y ayant plusieurs disputes sur les articles, principalement sur ceux qui concernoient ceux de la Religion auxquels on accorda des conditions plus auantageuses qu'on n'auoit enuie de leur tenir, comme il parut bien depuis; le faisant la Reyne ma mere pour auoir la paix, renvoyer les Réistres, & retirer mon frere d'avec ceux desquel il n'auoit moins d'enuie de se separer, pour auoir toûjours esté tres-bon Catholique, & ne s'estre serui des Huguenots que par necessité. En cette paix il fut donné partage à mon frere selon sa qualité; à quoy il vouloit que ie fusse comprise, me faisant lors establir l'assignat de mon dot en terres: & Monsieur de Beauuais, qui estoit deputé pour son parti; y insistoit fort pour moy. Mais la Reyne ma mere me pria que ie ne le permisse, & qu'elle m'asseuroit que j'aurois du Roy ce que ie luy demanderois. Ce qui me fit les prier de ne m'y comprendre, & que j'aymois mieux auoir de gré ce que j'aurois du Roy & de la Reyne ma mere, estimant qu'il me seroit plus assuré. La paix estant concludé, les assurances prises d'une part & d'autre, la Reyne ma mere se disposant a s'en retourner, ie receus lettres du Roy mon mari, par lesquelles il me faisoit paroistre qu'il auoit desir de me voir, me priant, soudain que ie verrois la paix faite de demander mon congé pour le venir trouuer. I'en suppliay la Reyne ma mere. Mais elle tascha de m'en auertir, me disant que lors qu'apres la S. Batthelemy ie ne voulus receuoir la propositiõ qu'elle me fit de me separer de nostre mariage, elle loüa lors mon intention, parce qu'il s'estoit fait Catho;

lique. Mais qu'à cette heure qu'il s'estoit fait Huguenot; elle ne me pourroit permettre que i'y allasse. Et voyant que i'insistois pour auoir mon congé, elle avec la larme à l'œil dist, que si ie ne reuenois avec elle ie la ruinerois; Que le Roy croiroit qu'elle me l'auroit fait faire, & qu'elle luy auoit promis de me ramener, & qu'elle feroit que i'y demeurerois iusqu'à ce que mon frere y fut; Qu'il y viendrait bien tost, & qu'elle me feroit donner mon congé. Nous retournaſmes à Paris trouuer le Roy, qui nous receust avec contentement d'auoir la paix; mais toutesfois agreant peu les auantageuses conditions des Huguenots, & se deliberant si-tost qu'il auroit mon frere à la Cour, de trouuer vne inuentiō pour rentrer en guerre contre eux, pour ne les laisser jouir de ce qu'à regret, on leur auoit accordé pour en retirer mô-frere; lequel demoura vn mois ou deux pour dōner ordre à licentier les Reistres, & le reste de son armée. Il arriua apres à la Cour avec toute la Noblesse Catholique. Le Roy les receut avec honneur, montrāt auoir contentemēt de le reuoir; & fit bōne chere aussi à Buſsi, car le Guast estoit mort, ayant esté tué par vn iugement de Dieu lors qu'il suoit vne diete, cōme aussi c'estoit vn corps gasté de toutes sortes de vilenies, qui fut dōné à la pourriturē, qui dés-long-temps le possèdoit, & son ame aux Demons, à qui il auoit fait hommage par magie & toutes sortes de méchancetez. Ce fusil de haine & de diuision, estant osté du monde, & le Roy n'ayāt son esprit bandé qu'à la ruine des Huguenots; se voulāt seruir de mon

frere contre-eux, pour rendre mon frere & eux irreconciliables, & craignant qu'à cette raison y'allasse trouver le Roy mon mary, nous faisoit à l'un & à l'autre toutes sorte de caresses, & de bõne chere pour nous faire plaire à la Cour. Et voyant qu'en ce mesme temps Monsieur de Duras estoit arriué de la part du Roy mon mary pour me venir querir, & que ie le pressois fort de me laisser aller, qu'il n'y auoit plus lieu de me refuser, il me dist [montrant que c'estoit l'amitié qu'il me portoit, & la connoissance qu'il auoit de l'ornement que ie donnois à la Cour qui faisoit qu'il ne pouuoit permettre que ie m'éloignasse que le plus tard qu'il pourroit] qu'il me vouloit conduire iusques à Poictiers, & renuoya Monsieur de Duras avec cette assurance. Il demeura quelques-iours à partir de Paris, retardant à me refuser ouuertement mon congé qu'il eut toutes choses preste pour pouuoir declarer la guerre, comme il l'auoit desleignée aux Huguenots, & par consequent au Roy mon mary. Et pour y trouver vn pretexte, on fait courir le bruit que les Catholiques se plaignoient des aduantageuses conditions que l'on auoit accordées aux Huguenots à la paix de Sens. Ce murmure & mescontentement des Catholiques passe si auant, qu'ils viennent à se liguier à la Cour, par les Prouinces, & par les Villes, s'enrolans & signans, & faisans grand bruit, raciment du sceu du Roy, montrans vouloir élire Monsieur de Guise. Il ne se parle d'autre chose à la Cour depuis Paris iusques à Blois, où le Roy auoit fait conuoyer les Estats; pen-

dant l'ouuerture desquels le Roy appella mon frere dans son Cabinet avec la Reyne ma mere, & quelques-uns de messieurs de son Conseil. Il leur représenta de quelle importace étoit pour son Estat & pour son autorité la Ligue que les Catholiques commençoient, mesmes s'ils venoient à se faire des Chefs, & qu'ils élussent ceux de Guise; Qu'il y alloit du leur plus que de tous autres (entendant de mon frere & de luy;) Que les Catholiques auoient raison de se plaindre, & que son deuoir & sa conscience l'obligeoient à mécontenter plustost les Huguenots que les Catholiques; Qu'il prioit & conjuroit mon frere comme fils de France, & bon Catholique qu'il estoit, de le vouloir conseiller & assister en cét affaire, où il y alloit du hazard de sa Couronne & de la Religion Catholique: Adjoustant à cela qu'il luy sembloit que pour couper le chemin à cette dâgereeuse Ligue, luy-mesme s'en deuoit faire le chef, & pour monstrier combien il auoit de zele à sa Religion, & les empescher d'élire d'autre chef la signer le premier comme chef, & la faire signer à mon frere, & à tous les Princes & Seigneurs, Gouverneurs, & autres ayant charge en son Royaume. Mon frere ne pût que luy offrir le seruice qu'il deuoit à sa Majesté, & à la conseruation de la Religion Catholique: Le Roy ayant pris l'assurâce de l'assistance de mon frere en cette occasiô, qui estoit la principale fin où tendoit l'artifice de cette Ligue, soudain fait appeller tous les Princes & Seigneurs de sa Cour, se fait apporter le roolle de ladite Ligue, y signe le premier comme chef, & y fait signer mon frere

& tous les autres qui n'y auoient encore signé. Le lendemain ils ouurent les Estats, ayant pris l'avis de Messieurs les Euesques de Lyon, d'Ambrun, & de Vienne, & des autres Prelats qui estoient à la Cour, qui luy persuaderent qu'apres le serment qu'il auoit fait à son sacre, nul serment qu'il pût faire aux heretiques ne pouuoit estre valable, ledit serment de son sacre l'affranchissant de toutes les promesses qu'il auoit pû faire aux Huguenots. Ce qu'ayant prononcé à l'ouuerture des Estats, & ayant déclaré la guerre aux Huguenots, il renuoya Genissac le Huguenot, qui depuis peu de iours estoit-là de la part du Roy mon mary pour auancer mon parlement, avec paroles rudes & pleines de menasses, luy disant qu'il auoit donné sa sœur à vn Catholique, non à vn Huguenot, & que si le Roy mon mary auoit enuie de m'auoir qu'il se fit Catholique. Toutes sortes de preparatifs à la guerre se fîrent, & ne se parla à la Cour que de guerre, & pour rendre mon frere plus irréconciliable avec les Huguenots, le Roy le fait Chef d'une de ses armées. Genissac m'estant venu dire le rude congé que le Roy luy auoit donné, ie m'en vais droit au cabinet de la Reyne ma mere, où le Roy estoit, pour me plaindre de ce qu'il m'auoit iusques alors abusée, m'ayant toujours empesché d'aller trouuer le Roy mon mary, & ayant feint de partir de Paris pour me conduire à Poictiers pour faire vn effet si contraire. Je luy representay que ie ne m'estois pas mariée pour plaisir ny de ma volonté, Que ç'auoit esté de la volôté du Roy Charles, de la Reyne ma mere, & de luy ; Que

puis qu'ils me l'auoient donné, ils ne me pou-
uoient point empescher de courir ma fortune;
Que i'y voulois aller; & que s'ils ne me le per-
mettoient, ie me déroberoïs, & y irois de quel-
que façon que ce fust au hazard de ma vie. Le
Roy me respondit; Il n'est plus temps, ma
sœur, de m'importuner de ce congé. l'auoré
ce que vous dites, que i'ay retardé exprés pour
vous le refuser du tout. Car depuis que le Roy
de Nauarre s'est refait Huguenot, ie n'ay ia-
mais trouué bon que vous y allassiez. Ce que
nous en faisoës la Reyne ma mere & moy, c'est
pour vostre bié. Je veux faire la guerre aux Hu-
guenots, & exterminer cette misérable religion
qui nous a fait tant de mal; & que vous, qui
estes Catholique, & qui estes ma sœur, fussiez
entre leurs mains cōme ostage de moy, il n'y
a point d'apparéce. Et qui sçait si pour me fai-
re vne indignité irreparable ils voudroient se
venger sur vostre vie du mal que ie leur feray?
Non, non, vous n'irez point, & si vous taschez
à vous dérober, comme vous dites, faites estat
que vous aurez & moy & la Reyne ma mere
pour cruels ennemis; & que nous vous ferōs res-
sétir nostre inimitié autāt que nous en aurons
de pouuoir, & que vous empirerez la condi-
tion de vostre mary plustost que de l'amender.
Ie me retiray auec beaucoup de déplaisir de cet-
te cruelle sentence; & prenant auis des princi-
paux de la Cour, de mes amis & amies, ils me
représenterent qu'il me seroit mal seant de de-
meurer en vne Cour si ennemie du Roy mon
mary, & d'où l'on luy feroit si ouuertement la
guerre; & qu'ils me conseilloient pendant que

cette guerre dureroit de me tenir hors de la Cour; mesme qu'il me seroit plus honorable de trouuer, s'il estoit possible, quelque pretexte pour sortir du Royaume, ou sous couleur de pelerinage, ou pour visiter quelqu'un de mes parens. Madame la Princesse de la Roche-sur-Yon, estoit de ceux que j'auois assemblez pour prendre leur auis, qui estoit sur son parlement pour aller aux eaux de Spa. mon frere aussi y estoit present, qui auoit amené avec luy Mondoucet, qui auoit esté Agent du Roy en Flandre, & en estât depuis peu reuenu, auoit représenté au Roy combien les Flamâs souffroiēt à regret l'vsurpation que l'Espagnol faisoit sur les loix de France, de la domination & souueraineté de Flandre; Que plusieurs Seigneurs & Communantez de Villes l'auoient chargé de luy faire entendre combien ils auoiēt le cœur François, & que tous luy tendoient les bras. Mondoucet voyant que le Roy méprisoit cēt auis, n'ayant rien en teste que les Huguenots, à qui il vouloit faire ressentir le déplaisir qu'ils luy auoient fait d'auoir assisté mon frere, qui ayant vn vray naturel de Prince, n'aimoit qu'à entreprēdre choses grandes, estât plus né à conquerir qu'à conseruer, lequel embrassa soudain cette entreprise, qui luy plust d'autant plus qu'il voyoit qu'il ne faisoit rien d'injuste, voulāt seulement racquerir à la France ce qui luy estoit vsurpé par l'Espagnol. Mondoucet pour cette cause s'étoit mis au seruice de mon frere, qui le renuoyoit en Flandre, sous couleur d'accompagner Madame la Princesse de la Roche-sur-Yon aux

eaux de Spa; lequel voyant que chacun cher-
 choit quelque pretexte apparent pour me pou-
 uoir tirer hors de France durant cette guerre,
 qui (disoit en Sauoye, qui disoit en Lorraine,
 qui à S. Claude, qui à nostre Dame de Loret-
 te) dit tout bas à mon frere; Monsieur, si la
 Reyne de Nauarre pouuoit feindre d'auoir
 quelque mal á quoy les eaux de Spa; où va Ma-
 dame la Princeesse de la Roche-sur-Yon, pussent
 seruir, cela viendrait bien á propos pour vostre
 entreprise de Flandre; où elle pourroit faire vn
 beau coup. Mon frere le trouua fort bon, &
 fut fort aise de cette couuerture, & s'écria sou-
 dain; O! Reine, ne cherchez plus, il faut
 que vous ailliez aux eaux de Spa, où va Mada-
 me la Princeesse. Je vous ay veu quelquefois
 vne Eresipele au bras; il faut que vous disiez
 que lors les Medecins vous l'auoient ordonné,
 mais que la saison n'y estoit pas si propre; Qu'à
 cette heure c'est la saison, & que vous suppliez
 le Roy de vous permettre d'y aller. Mon frere
 ne se declara pas dauantage deuant cette com-
 pagnie pourquoy il le desiroit, á cause que M.
 le Cardinal de Bourbon y estoit, qu'il tenoit
 pour Guisart & Espagnol. Mais moy, ie l'en-
 tendois soudain, me doutant bien que c'estoit
 pour l'entremise de Flandre, de quoy Mondou-
 cet nous auoit parlé à tous deux. Toute la cõ-
 pagnie fut de cõt auis; & madame la Princeesse
 de la Roche-sur-Yon, qui y deuoit aller, &
 qui m'aimoit fort, en receut fort grand plaisir,
 & me promit de m'y accompagner, & de se
 trouuer avec moy quand i'en parlerois à la
 Reyne ma mere pour le luy faire trouuer bon.

Le lendemain ie trouuay la Reyne seule, & luy representay le mal & déplaisir que ce m'étoit de voir le Roy mon mary en guerre contre le Roy, & de me voir éloigné de luy; Que pendat que cette guerre dureroit il ne m'estoit ni honorable, ni bien seant de demeurer à la Cour; Que si i'y demeurois ie ne pouuois éuiter de ces deux malheurs l'un, ou que le Roy mon mary penseroit que i'y fusse pour mō plaisir, & que ie ne le seruirois pas comme ie deuois, ou que le Roy prendroit soupçon de moy, & croiroit que i'aduertiroy toujours le Roy mō mary. Que l'un & l'autre me produiroient beaucoup de mal; Que ie la suppliois de trouuer bō que ie m'éloignasse de la Cour pour l'éuiter; Qu'il y auoit quelque temps que les Medecins m'auoient ordonné les eaux de Spa pour l'ereuèle que i'auois au bras, à quoy depuis si long-temps i'estois suiette: & que la saison à cette heure y estât propre, il me sembloit que si elle le trouuoit bon, ce voyage estoit bien à propos pour m'éloigner en cette saison, nō seulement de la Cour, mais de la France, pour faire cōnoistre au Roy mon mary, que ne pouuât estre avec luy pour la deffiance du Roy, ie ne voulois point estre au lieu où on luy faisoit la guerre; Que i'esperois qu'elle par sa prudence disposeroit les choses avec le temps, de telle façon, que le Roy mō mary obtiendrait vne paix du Roy, & rentteroit en sa bonne grace; Que i'attendois cette heureuse nouuellē pour lors venir prendre congé d'eux pour m'en aller trouuer le Roy mon mary; & qu'en ce voyage de Spa Madame la Princesse de la Roche-sur-Yon,

qui estoit là presente, me faisoit cét hõneur de m'accompagner. Elle approuua cette conditiõ, & me dit qu'elle estoit fort aise que i eusse pris cét auis; Que le mauuois conseil que ces Euesques auoient donné au Roy, de ne tenir ses promesses, & rompre tout ce qu'elle auoit promis, & contracté pour luy, luy auoit pour plusieurs considerations apporté beaucoup de déplaisir; mesme voyant que cét impetueux torrent entraisoit avec soy, & ruinoit les plus capables & meilleurs seruiteurs que le Roy eust en son Conseil, (car le Roy en esloigna quatre ou cinq des plus apparens & plus entiers) mais qu'entre tout cela, ce qui luy trouuailloit le plus l'esprit, estoit de voir ce que ie luy representois, que ie ne pouois euitter, demeurant à la Cour, l'vn de ces deux malheurs; ou que le Roy mon mary ne l'auroit agreable, & s'en prendroit à moy; ou que le Roy entreroit en desfiance de moy, pensant que j'aduertiroy le Roy mon mary; Qu'elle persuaderoit au Roy de trouuer bon ce voyage. Ce qu'elle fit, & le Roy m'en parla sans monstrier d'en estre en colere; estât assez content de m'auoir pû empescher d'aller trouuer le Roy mon mary, qn'il haïssoit lors plus qu'aucune chose du monde, & commanda que l'on dépeschaft vn courrier à Dom Jean d'Austriche; qui commandoit pour le Roy d'Espagne en Flandre, pour le prier de me bailler les passeports necessaires pour passer libtement aux Pais de son autorité, parce qu'il falloit bien auant passer dans la Flandre pour aller aux eaux de Spa; qui sont aux terres de l'Euesché de Liege. Cela re-

solu nous nous séparâmes tous à peu de iours
 de là (lesquels mon frere employa à m'instruire
 des offices qu'il desiroit de moy pour son en-
 treprise de Flandre) le Roy & la Reyne ma me-
 re s'en allâs à Poictiers, pour estre plus près de
 l'armée de Monsieur de Mayenne qui assiegeoit
 Broüage, & qui de là deuoit passer en Gascogne
 pour faire la guerre au Roy m^o mary, m^o fre-
 re s'en allât avec l'autre armée, dequoy il étoit
 Chef, assieger Issoire, & les autres villes qu'il
 prit en ce temps-là; & moy en Flandre accom-
 pagnée de Madame la Princesse de la Roche
 sur-Yon, de Madame de Tournon, ma Dame
 d'honneur, de Madame de Moüy de Picardie, de
 Madame la Chastelaine de Millon, de Mada-
 moiselle d'Atrie; de Mademoiselle de Tourn^o,
 & de sept ou huit autres filles & d'hômes, de
 Monsieur le Cardinal de Lenoncourt, de Mon-
 sieur l'Euesque de Langres, de M. de Moüy,
 Seigneur de Picardie, maintenant beau-pere
 d'un frere de la Reyne Loüyse, nommé le
 Comte de Chaligny, de mon premier Maistre
 d'Hostel, de mes premiers Escuyers, & autres
 Gentils-hommes de ma Maison. Cette com-
 pagnie plût tant aux estrangers qui la virent,
 & la trouuerent si leste, qu'ils en eurent la
 France en beaucoup plus d'admiration. I'al-
 lois en vne litiere faite à pilliers, doublez
 de velours incarnadin d'Espagne en broderie
 d'or & de soye nouée à diuise. Cette litiere
 estoit toute vitrée, & les vitres toutes faites
 à deuise; y ayant, ou à la doublure ou aux
 vitres, quarante deuises toutes differentes,
 avec les mots en Espagnol & en Italien, sur le

Soleil & ses effets ; laquelle estoit suiuite de la litiere de Madame de la Roche - fut - Yon , & de celle de Madame de Tournon ma Dame d'honneur , & de dix filles à cheual avec leur gouuernante , & de six carrosses ou charriots , où alloit le reste des Dames & femmes d'elle , & de moy. Je passay par la Picardie , où les villes auoient commandement du Roy de me receuoir selon que j'auoit cét honneur de luy estre , & me firent tout l'honneur que j'eusse pû desirer. Estant arriué au Chastelet , qui est vn Fort à trois lieuës de la frontiere de Cambresis , l'Euesque de Cambray , qui estoit lors terre de l'Eglise , qui ne reconnoissoit le Roy d'Espagne que pour protecteur m'enuoyz vn Gentil - homme pour sçauoir l'heure à laquelle ie partirois , pour venir au deuant de moy iusques à l'entrée de ses terres , où ie le trouuay tres-bien accompagné de gens qui auoient les hahits & l'apparence de vrais Flamands, cōme il sont fort grossiers en ce quartier - là. L'Euesque estoit de la maison de Barlemont, vne des principales de Flandre, mais qui auoit le cœur Espagnol , comme ils ont montré , ayants esté ceux qui ont le plus assisté Dom Iean. Il ne laissa de me receuoir avec beaucoup d'honneur , & non moins de ceremonies Espagnol. Je trouuay cette ville de Cambray , bien qu'elle ne soit bastie de si bonne estoffe que les nostres de France, beaucoup plus agreable , pour y estre les ruës & places beeaucoup mieux proportionnées , & disposées comme elles sont, & les Eglises tres-grandes & belles, ornement commun à toutes.

les villes de Flandre. Ce que ie reconnus en
cette ville d'estime & de marque, sur la citadel-
le, des plus belles & des mieux acheuées de la
Chrestienté. Ce que depuis le fit bien épron-
ner aux Espagnols, estant sous l'obeissance de
mon frere. Vn honneste hōme nommé Mon-
sieur d'Ainsi, en estoit lors Gouverneur, lequel
en grace, en apparence, & en toutes belles par-
ties requises à vn parfait Cheualier n'en deuoit
rien à nos plus parfaits Courtisans, ne partici-
pant nullement de cette naturelle rusticité qui
semble estre propre aux Flamans. L'Euesque
nous fit festin, & nous donna après souper le
plaisir du bal, où il fit venir toutes les Dames
de la ville; auquel ne se trouuant, & s'estant
retiré soudain après souper, pour estre, comme
i'ay dit, d'umeur ceremonieuse & Espagnole,
Monsieur d'Ainsi estant le plus apparent de la
troupe, il le laissa pour m'entretenir durant le
bal, & me mener après à la colation de confi-
tures; imprudemment, ce me semble, veu qu'il
auoit la charge de la citadelle. I'en parle com-
me sçauante à mes dépens, pour auoir plus ap-
pris que ie n'en desirerois, comme il se faut cō-
porter à la garde d'une place. La souuenāce de
mon frere ne me partāt iamais de l'esprit, pour
n'affectionner rien tant que luy, ie me ressou-
uiens lors des instructiōs qu'il m'auoit dōnées,
& voyant la belle occasion qui m'estoit offerte
pour luy faire vn bon seruice en son entreprise
de Flandre, cette ville de Cambray, & cette ci-
tadelle en estans comme la clef, ie ne la laissay
perdre, & employay tout ce que Dieu m'auoit
donné d'esprit à rendre Monsieur d'Ainsi affe-

REYNE MARGVERITE. 91

tionné à la France, & particulièrement à mon frere, Dieu permit qu'il me reüssit, si bien que se plaist en mon discours, il delibera de me voir le plus long-temps qu'il pourroit, & de m'accompagner tant que ie serois en Flandre, & pourcét effet demanda congé à son Maistre de venir avec moy iusques à namur, où Dom Jean d'Austriche m'attendoit, disant qu'il desiroit de voir des triomphes de cette reception. Ce Flamand espagnolisé fut neantmoins si mal aisé que de le luy permettre. Pendant ce voyage qui dura dix ou douze iours, il me parla le plus souuent qu'il pouuoit, monstrant ouuertement qu'il auoit le cœur tout François, & qu'il ne respiroit que l'heure d'auoir vn si brave Prince que mon frere pour Maistre & Seigneur, méprisant la sujection & domination de son Euesque, qui bien qu'il fust son Souuerain n'estoit que Gentil-homme comme luy, mais beaucoup son inferieur aux qualitez & graces de l'esprit & du corps.

Partant de Cambray, i'allé couchier à Valenciennes, terre de Flandre, où Monsieur le Comte de Lalaïn, Monsieur de Montigny son frere, & plusieurs autres Gentils-hommes, au nombre de deux ou trois cens, vindrent au deuant de moy pour me receuoir au sortir des terres de Cambresis, iusques où l'Euesque de Cambray m'auoit conduitte. Estant arriué à Valenciennes, ville qui cede en force à Cambray, & non en l'ornement des belies places & des belles Eglises, où les fontaines & les horologes, avec industrie propre aux Alle-mans, ne donnoient peu de merueille à nos

François ne leur estant commun de voir des horologes représenter vne agreable musique de voix avec autant de sortes de personnes que le petit chasteau que l'õ alloit voir au faux-bourg S. Germain. Monsieur le Comte de Lalain, cette ville estant de son gouvernement, fit festin aux Seigneurs & Gentils-hõmes de sa troupe, remettant à Mons à traiter les Dames, où sa femme, sa belle sœur Madame d'Aurec, & toutes les plus apparentes & galâtes Dames m'attendoient pour me recevoir, & où le Comte & toute sa troupe me conduisit le lendemain. Il se disoit estre parët du Roy mon mary, & étoit personne de grande autorité & de grands moyens, auquel la dominatiõ d'Espagne auoit touõjours esté odieuse, en estant tres-offensé depuis la mort du Comte d'Egmont, qui luy étoit proche parent. Et bien qu'il eust maintenu son gouuement sans estre entré en la ligue du Prince d'Orange ny des Huguenots, estant Seigneur tres-Catholique, il n'auoit neantmoins iamais voulu voir Dom Iean, ny permettre que luy ny aucun de la part de l'espagnol entrast en son gouuement: Dom Iean ne l'ayant osé forcer de faire au contraire, craignant s'il l'attaquoit de faire joindre le ligue des Catholiques de Flandre, que l'on nomme la ligue des Estats à celle du Prince d'Orange & des Huguenots, preuoyant bien que cela luy donneroit autant de peine comme depuis ceux qui ont esté pour le Roy d'Espagne l'ont esprouué. Le Comte de Lalain estant tel, ne pouuoit assez faire de demonstratiõ du plaisir qu'il auoit de me voir-là; & quand son Prince natu-

rel y eust esté, il ne l'eust pû recevoir avec plus d'honneur & de démonstration de bien-veillance & d'affection. Arriuant à Mons à la maison du Comte de Lalain, où il me fist loger, ie trouuay à la Cour la Comtesse de Lalain sa femme, avec bien quatre-vingts ou cent Dames du pays ou de la Ville, de qui ie fus receuë, non comme Princeesse estrangere, mais comme si i'eusse esté leur naturelle Dame; le naturel des Flamandes estant d'estre priuées, familières & joyeuses: & la Comtesse de Lalain tenant de ce naturel; ayant dauantage vn esprit grand & élevé, dequoy elle ne ressembloit moins à vostre cousine que du visage & de la façon; cela me donna soudain assurance qu'il me seroit aisé de faire amitié estroite avec elle. L'heure du souper venue, nous allons au festin & au bal que le Comte de Lalain continua tant que ie fus à Mons, qui fut plus que ie ne pensois, estimant deuoir partir le lendemain; Mais cette honneste femme me contraignit de passer vne semaine avec eux, ce que ie ne voulois faire, craignant de les incommoder; mais il ne me fust possible de le persuader à son mary ny à elle: qui encore à toute force me laisserent partir au bout de huit iours. Viuant avec telle priuauté avec elle, elle demeura à mon coucher fort tard, & y eust demeuré dauantage; mais elle faisoit chose peu commune à personnes de telle qualité: ce qui toutefois rémoigne vne nature accompagnée d'une grande bonté. Elle nourrissoit son petit fils de son lait; de sorte qu'estant le lendemain au festin assise tout auprès de moy à la table, qui est le lieu où ceux

de ce pais-là se communiquent plus de franchise, n'ayant l'esprit bandé qu'à mon but, qui n'estoit que d'anancer le dessein de mon frere; Elle parée & toute couverte de pierreries, & de broderies, avec vne robille à l'Espagnole de roise d'or noire, avec les bandes de broderie de canetille d'or & d'argent; & vn pourpoint de toile d'argent blanc en broderie d'or avec des gros boutons de diamans (habit propre à l'office de nourrice) l'on luy apporta à la table son petit fils, emmaillotté aussi richemēt qu'estoit vestuē la nourrice, pour luy donner à teter; Elle le met entre nous deux sur la table, & librement se déboutonne, baillant son petit tetin à son petit, ce qui eust esté inciuilité à quelqu'autre: mais elle le faisoit avec tant de grace & de naïfueté, cōme toutes ses actions en estoient accompagnées, qu'elle en receut autāt de louanges que la cōpagnie de plaisir. Les tables leuées le bal commença en la mesme sale que nous estions, qui estoit grande & belle, où estans assises l'une auprès de l'autre, ie luy dis qu'encore que le contentement que ie receuois lors en cette compagnie se pût mettre au nombre de ceux qui m'en auoiēt plus fait ressentir, ie souhaittois presque de ne l'auoir point receu pour le déplaisir que ie receurois partant d'auec elle, de voir que la fortune nous tiēdroit pour iamais priuez du plaisir de nous voir ensemble; Que ie tenois pour vn des malheurs de ma vie que le Ciel ne nous eust fait naistre elle & moy d'une mesme patrie; ce que ie disois pour la faire entrer aux discours qui pouuoient seruir au dessein de mon frere; Elle m'

respondit; Ce pais a esté autrefois de France, & à cette cause l'on y plaide encore en François, & cette affection naturelle n'est pas encore sortie du cœur de la pluspart de nous. Pour moy ie n'ay plus autre chose en l'ame depuis que i'ay eu l'honneur de vous voir. Ce pais a esté autrefois affectiōné à la Maisō d'Austriche, mais cette affection nous a esté arrachée en la mort du Comte d'Egmont M. de Horne, de Monsieur de Montigny, & des autres Seigneurs qui furent lors défaits qui estoient nos proches parens, & appartenans à la pluspart de la Noblesse de ce pais. Nous n'avons rien de plus odieux que la domination de ces Espagnols, & ne souhaitons rien tant que de nous deliurer de leur tyrannie, & ne sçaurions toutesfois comme y proceder, pource que ce pais est diuisé à cause des différentes Religions; Que si nous estions tous bien vnīs, nous aurīōs bien-tost jetté l'Espagnol dehors; mais cette diuision nous rend trop foibles. Que plût à Dieu qu'il prist enuie au Roy de France vostre frere de racquerir ce pais qui est sien d'ancienneté, nous luy rendrions tous les bras. Elle me disoit cecy à l'improuist, mais premeditément pour trouuer du costé de la France quelque remede à leurs maux. Moy me voyant le chemin ouuert à ce que ie desirois, ie luy respondis; Le Roy de France mon frere n'est d'humeur pour entreprendre des guerres estrangeres, mesmes ayant en son Royaume le party des Huguenots, qui est si fort que cela l'empeschera toujours de rien entreprendre dehors; Mais mon frere Monsieur d'Alençon, qui ne doit rien en valeur,

prudence & bonté aux Roys mes peres & freres : entendroit bien á cette entreprise , & n'auroit moins de moyens que le Roy de France mon frere de vous y secourir. Il est nourry aux armes, & estimé vn des meilleurs Capitaines de nostre temps, estant mesme á cette heu-
Commandant de l'armée du Roy contre les Huguenots, avec laquelle il a pris depuis que ie suis partie sur eux vne tres-forte ville nommée Iffoires & quelques autres. Vous ne sçauriez appeller le Prince de qui le secours vous soit plus vtile, pour vous estre si voisin, & auoir vn si grand Royaume que celuy de France, á la deuotiõ duquel il peut & tirer moyens & toutes commoditez necessaire á cette guerre ; & s'il receuoit le bon office de Monsieur le Cõpte vótre mary, vous vo⁹ pouuez asseurer qu'il auroit telle part á sa fortune qu'il voudroit , mon frere estant d'vn naturel doux, non ingrat , qui ne se plaist qu'á reconnoistre vn seruice ou vn bon office receu. Il honnore & cherit les gens d'honneur & de valeur ; aussi est-il suiuy de tout ce qui est de meilleur en France. Ie croy que l'on traittera bien-tost d'vne paix en France avec les Huguenots, & qu'à mon retour en France ie la pourray trouuer faite. Si Monsieur le Comte vótre mary est en cecy de mesme opinion que vous , & de mesme volonté , qu'il aduise s'il veut que i'y dispose mon frere , & ie m'asseure que ce pays , & vótre maison en particuliere , en receura toute felicité. Que si mon frere s'establiroit par vótre moyen icy , vous pouuez croire que vous m'y reuerriez souuent , estant nostre amitié telle qu'il n'y en eust iamais vne
de

de frere à sœur si parfaite. Elle receut avec beaucoup de contentement cette ouuerture, & me dist qu'elle ne m'auoit pas parlé de cette façon à l'auenture; mais voyant l'honneur que ie luy faisois de l'aimer, elle auoit biẽ resolu de ne me laisser partir de là qu'elle ne me découurit l'estat auquel il estoit, & qu'ils ne me requissent de leur apporter du costé de France quelque remede pour les affranchir de la crainte où ils viuoient de se voir en vne perpetuelle guerre, ou reduits sous la tyrannie Espagnole; me priant que ie trouuasse bon qu'elle decourit à son mary tous les propos que nous auions eu, & qu'ils m'en pussent parler le lendemain tous deux ensemble; ce que ie trouuay tres-bon. Nous passâmes cette après-dinée en tels discours & en tous autres que ie pensois seruir à ce dessein; à quoy ie voyois qu'elle prenoit vn grand plaisir. Le bal estant finy nous allâmes oïyr Vespres aux Chanoinesses, qui est vn Ordre de Religieuses dequoy nous n'auons point en Frâce; Ce sont toutes Damoiselles que l'on y met petites, pour faire profiter leur mariage iusques à ce qu'elles soient en âge de se marier. Elles ne logent pas en dortoir, mais en maisons séparées, toutefois toutes dans vn enclos comme les Chanoines, en chaque maison il y en a trois, ou quatre, ou cinq, ou six ieunes avec vne vieille, lesquelles vieilles il y en a quelque nōbre qui ne se marient point: ny aussi l'Abesse. Elles portent seulement l'habit de Religio le matin au Service de l'Eglise; & l'après-dinée à Vespres, & soudain que le Service est dit elles quittent l'habit, & s'habill-

lent comme les autres filles à marier allans par les festins & par les bals librement comme les autres; de sorte qu'elles s'habillent quatre fois le iour. Elles se trouuerent tous les iours au festin & au bal, & y danserent d'ordinaire. Il tar-
doit à la Comtesse de Lalain que le soir ne fut
venu pour faire entendre à son mary le bon
commencemēt qu'elle auoit donné à leurs af-
faires. Ce qu'ayant fait la nuit suiuiante, le len-
demain elle m'amena son mary, qui me fit vn
grand discours des iustes occasions qu'il auoit
de s'affranchir de la tyrannie del'Espagnol. En
quoy il ne pensoit point entreprendre contre
son Prince naturel, sçachant que la souueraine-
té de Flandre appartenoit au Roy de France. Il
me representa les moyens qu'il y auoit d'esta-
blir mon frere en Flandre, ayant tout le Hai-
naut à sa deuotion, qui s'estendoit jusques biē
près de Bruxelles. Il n'estoit en peine que du
Cambresis, qui estoit entre la Flādre & le Hai-
naut, & me dist qu'il seroit bon de gagner M.
d'Ainsi. Mais ie luy dis que ie le priois luy
mesme de s'y employer, & qu'il le pourroit
mieux faire que moy estant son voisin & amy.
L'ayant donc assuré de l'estat qu'il pourroit
faire de l'amitié & bien-veillance de mon fre-
re, à la fortune duquel il participeroit autant
de grandeur & d'autorité qu'un si grand & si
signalé seruice receu d'une personne de sa qua-
lité le meritoit, nous resolûmes qu'à mon re-
tour ie m'arresterois chez moy à la Fere, où
mon frere viendrait, & que Monsieur de Mon-
tigny, frere dudit Comte de Lalain, viendrait
traiter avec mon frere de cette affaire. Pendant

REYNE MARGVERITE. 99

que ie fus là ie le cōfirmay & fortifiay toujours en cette volonté , à quoy sa femme apportoit non moins d'affection que moy. Et le iour venu qu'il me faloit partir de cette belle compagnie de Mons; Ce ne fut sās reciproque regret, & de toutes les Dames Flamādes & de moy, & sur tout de la Comtesse de Lalain, pour l'amitié tres-grāde qu'elle m'auoit voüée, & me fit promettre qu'à mon retour ie passerois par là. Je luy donnay vn carquan de pierreries, & à son mary vn cordon & enseigne de pierreries, qui furent estimez de grande valeur; mais beaucoup chers d'eux, pour partir de la main d'une personne qu'ils aimoient cōme moy. Toutes les Dames demurerent là, fors Madame d'Aurec, qui vient à Namur, où j'allay coucher ce iour-là. Son mary & son beau-frere Monsieur le Duc d'Arscot y estoient, y ayans toujours demuré depuis la paix entre le Roy d'Espagne & les Estats de Flandre; Car bien qu'ils fussent du party des Estats, le Duc d'Arscot estoit vn vieil Courtisan des plus galants qui fussent de la Cour du Roy Philippes, du temps qu'il estoit en Flandre & en Angleterre, qui se plaçoit tousiours à la Cour auprès des grands. Le Comte de Lalain avec toute la Noblesse me conduisit le plus auant qu'il pût bien deux lieues hors de son gouuernement. & jusques à tant que l'on vit paroistre la troupe d'Dom Iean. Lors il prit congé de moy, pource que, cōme i'ay dit, ils ne se voioient point, Monsieur d'Ainsi seulement vint avec moy pour estre son Maistre, l'Euesque du Cambray du party d'Espagne. Cette belle & grande troupe

s'en eſtât retournée, ayant fait peu de chemin, ie trouuay Dom Iean d'Auſtriche accôpagné de force eſtaſiers ; mais ſeulement de vingt ou trente cheuaux, accompagné des Seigneurs le Duc d'Arſcot, Monſieur, d'Aurec, le Marquiſ de Varanbon, & le jeune Balançon, Gouverneur pour le Roy d'Eſpagne du Comté de Bourgogne, qui galants & honneſtes hômes eſtoient venus en poſte pour ſe trouuer-là à mon paſſage. Des domeſtiques de Dom Iean il n'en auoit de nom & d'apparêce qu'un, Ludo- uic de Gonzague, qui ſe diſoit parent du Duc de Mantouë. Le reſte eſtoit de petites gens de mauuaife mine, n'y ayant nulle Nobleſſe de Flandre. Il mit pied à terre pour me ſaluer dâs ma littiere, qui eſtoit releuée & toute couuerte. Ie le ſalüay à la Françoisſe, luy, le Duc d'Arſcot, & Monſieur d'Aurec. Après quelques honneſtes paroles il remonta à cheual, parlant touj ours à moy juſques à la ville, où nous ne pûmes arriuer qu'il ne fuſt ſoir, pour ne m'auoir les Dames de Mons permis de partir que le plus tard qu'elles pûrent ; meſmes m'ayans amuſé dans ma littiere plus d'une heure à la conſiderer, prenâs un extrême plaſir à ſe faire donner l'intelligence des deuifes. L'ordre toutesfois fuſt ſi beau à Namur, comme les Eſpagnols ſont excellens en cela & la ville ſi éclaircie, que les fenêſtres & boutiques eſtans pleines de lumiere l'on voyoit luire un nouveau iour. Ce ſoir Dom Iean fit ſeruir, & moy & mes gens dans les logis & les chambres, eſtimant qu'après une longue journée, il n'eſtoit

raisonnable de nous incommoder d'aller à vn festin. La maison où il me logea estoit accommodée pour me receuoir, où l'on auoit trouué moyen d'y faire vne belle & grande sale, & vn appartement pour moy de chambre & de cabinets, le tout tēdu des plus beaux, riches, & superbles meubles que ie pēse iamais auoir veus, estās toutes les tapisseries de velours ou de satin, avec de grosses colonnes faites de toilles d'argent, couuertes de broderie de gros cordons & de godrons de broderie d'or, éleuez de la plus riche & belle façon qui se peut voir, & au milieu de ces colonnes des grādes personnes habillées à l'antique, & faites de la mesme broderie. M. le Cardinal de Lenoncourt, qui auoit l'esprit curieux & delicat, s'estant rendu familier du Duc d'Arscot, vieil courtisan, comme j'ay dit, d'humeur galante & belle, tout l'honneur certes de la troupe de Dom Iean, considerant vn iour que nous fūmes là, ces magnifiques & superbes meubles, luy dist, Ces meubles me semblent plūtoſt d'un grand Roy, que d'un jeune Prince à marier tel qu'est Dom Iean. Le Duc d'Arscot luy respondit, Ils ont esté faits aussi de fortune, & non de preuoyance ni d'abondance, les étoffes luy ayant esté enuoyées par vn Bassa du grand Seigneur, duquel en la notable victoire qu'il eut contre le Turc, il auoit eu pour prisonniers les enfans. Et le Seigneur Dom Iean luy ayant fait courtoisie de les luy renuoyer, & sans rançon, le Bassa pour reuanche luy fit present d'un grand nombre d'étoffes de soye, d'or, & d'argent, qui luy arri-

uerent estant à Milan, où l'on approprie mieux telle chose. il en fit faire les tapisseries que vous voyez, & pour la souuenance de la glorieuse façon dequoy il les auoit acquises; il fit faire le liét & la tente de la chambre de la Reyne en broderie des batailles nouvelles representans la glorieuse victoire de la bataille qu'il auoit gagnée sur les Turcs. Le matin estant venu, Dom Iean nous fit ouïr vne Messe à la façon d'Espagne, avec musique, violons, & cornets; & allas de là au festin de la grande sale; nous disnâmes luy & moy seule en vne table, la table du festin où estoient les Dames & Seigneurs éloignée trois pas de la nostre, où Madame d'Aurec-faisoit l'honneur de la maison pour Dom Iean, luy se faisoit donner à boire à genoux par Ludouic de Gózague. Les tables levées le bal commença, qui dura toute l'après-dinée. Le soir se passa de cette façon Dom Iean parlant toujours à moy, & me disant souuent qu'il voyoit en moy la ressemblance de la Reyne sa Signora, qui estoit la feue Reyne ma sœur qu'il auoit beaucoup honorée, me témoignant par tout l'honneur & courtoisie qu'il pouuoit faire à moy, & à toute ma troupe. qu'il receuoit tres-grand plaisir de me voir là. Les batteaux où ie deuois aller par la riuiera de Meuse jusques au Liege, ne pouuans estre si-tost prests, ie fus contrainte de séjourner le lendemain, où ayant passé toute la matinée comme le iour de deuant, l'après-dinée nous mettans dans vn tres-beau batteau sur la riuiera, euironné d'autres batteaux pleins de hauts bois, cornets, & violons, nous abordâmes en vne Isle, où

Dom Iean auoit fait apprester le festin dans vne belle sale faite de lierre, accomodée de cabinets autour remplis de musique, & de haut bois, & autres instruments, qui dura tout le long du souper. Les tables leuées, le bal ayant duré quelque heure, nous nous en retournasmes dans le même batteau qui nous auoit conduits jusques-là, & lequel Dom Iean m'auoit fait preparer pour mon voyage. Le matin voulant partir Dom Iean m'accompagna jusques dans le batteau, & après vn honnesté & courtois adieu, me bailla pour m'accompagner jusques à Huy où j'allois coucher, première ville de l'Euesque de Liege, Monsieur & Madame d'Aurec. Dom Iean sorty, Monsieur d'ainfi, qui demeura le dernier dans le batteau, & n'auoit congé de son Maître de me conduire plus oing, prend congé de moy avec autant de regrets que de protestations de stre à iamais seruiteur de mon frere, & de moy. La fortune enuieuse & trestesse ne pouuant supporter la gloire d'une si heureuse fortune qui m'auoit accompagnée jusque-là en ce voyage, me donna deux sinistres augures des trauerses que pour contenter son enuie elle me preparoit à mon retour, dont le premier fut, que soudain que le batteau commença à s'éloigner du bord Madamoiselle de Tournon ma Dame d'honneur, Damoiselle tres-vertueuse, & accompagnée des graces que j'aimois fort, prit vn mal si estrange, que tout soudain il la mit aux hauts cris pour la violente douleur qu'elle ressentoit, qui produisoit d'un serrement de cœur qui fut tel

que les Medecins n'eurent iamais moyē d'empescher que peu de iours après que ie fus arri-
uée au Liege la mort ne la rauist. I'en diray la
funeste Histoire en son lieu, pour estre re-
marquable. L'autre est, qu'arriuant à Huy,
ville située sur le penchant d'une montagne,
il s'émūt vn torrent si imperieux; descendant
des rauagnes d'eau de la mōtagne en la riuie-
re, que la grossissant tout d'un coup, comme
nostre bateau arriuait nous n'eumes presque
le loisir de sauter à terre, & courir tant que
nous pûmes pour gagner le haut de la monta-
gne, que la riuere fust aussi-tost que nous à la
plus haute rue auprès de mon logis qui estoit
le plus haut, où il nous fallut nous contenter
ce soir-là de ce que le Maître de la maison
pouuoit auoir, n'ayant moyen de pouuoir tirer
des bateaux ni gens, ni mes hardes, ni moins
d'aller par la ville, qui estoit comme sumergée
dans ce deluge, duquel elle ne fut avec moins
de merueille deliurée que faisie; car au point
du iour l'eau estoit toute retirée, & remise en
son lieu naturel. Partant de là, Monsieur &
madame d'aurec s'en retournerent à Namur
trouuer Dom Iean, & moy ie me remis dans
mon bateau pour aller ce iour-là coucher au
Liege, où l'Euesque, qui en est Seigneur, me
receut avec tout l'honneur, & la demonstra-
tion de bonne volonté, qu'une personne
courtoise & bien affectionnée peut témoi-
gner. C'estoit vn Seigneur accompagné de
beaucoup de vertu, de prudence, & de bonté:
& qui parloit bien François, agreable de sa per-
sonne, honorable, magnifique, & de com

pagnie fort agreable, accompagné d'un Chapitre, & de plusieurs Chanoines, tous fils de Ducs, Comtes, & de grands Seigneurs d'Allemagne, parce que cét Euesché, qui est un Estat souverain de grand reuenu, & rempli de beaucoup de bonne villes, s'obtient par election, & faut qu'ils demeurent un an residens, & qu'ils soient nobles pour estre receus Chanoines. La ville est plus grande que Lyon, & est presque en mesme assiete, la riuere de Meuse passant au milieu; tres-bien bastie, n'y ayant maison de Chanoine qui ne paroisse un beau Palais; les ruës grandes & larges; les places belles, accompagnées de tres-belles fontaines; les Eglises ornées de tant de marbre, qui se tire près de là, qu'elles en paroissent toutes; les horologes faites avec l'industrie d'Allemagne, chantans & representans toutes sortes de musique, & de personnages. L'Euesque m'ayant receuë sortant de mon bateau, me conduisit en son plus beau Palais, tres-magnifique, accompagné de tres-belles fontaines, & de plusieurs jardins & galeries; le tout tant peint, tant doré, & accompagné avec tant de marbre, qu'il n'y a rien de plus magnifique & de plus delicieux. Les eaux de Spa n'estans qu'à trois ou quatre lieues de là, & n'y ayant qu'auprés un petit village de trois ou quatre petites maisons, Madame la Princesse de la Roche-sur-Yon fut conseillée par les Medecins de demeurer au Liege, & d'y faire apporter son eau, l'assurant qu'elle auroit autant de force & de vertu estant apportée la nuit auant que le Soleil fust leué Dequoy ie fus fort aise,

pour faire nostre séjour en lieu plus commode, & en si bonne compagnie. Car outre celle de la Grace (ainsi appelle-t'on l'Euesque de Liege, comme on appelle vn Roy sa Majesté, & vn Prince son Altesse) le bruit ayant couru que ie passois par là, plusieurs Seigneurs & Dames d'Allemagne y estoient venus pour me voir, & entr'autres Madame la Comtesse d'Arenberg (qui est celle qui auoit eu l'honneur de conduire la Reyne Elizabeth à ses nopces à Mezières, lors qu'elle vint épouser le Roy Charles mon frere, & sa sœur aînée au Roy d'Espagne son mary) femme qui estoit tenue en grande estime de l'Imperatrice, de l'Empereur, & de tous les Princes Chrestiens; sa sœur Madame la Lantgraue; Madame d'Arenberg sa fille; Monsieur d'Arenberg son fils, tres-honneste & galant homme, vifue image de son pere, qui amenât le secours d'Espagne au Roy Charles mon frere s'en retourna avec beaucoup d'honneur & de reputation. Cette arriuée toute plaine d'honneur & de joye, eust esté encore plus agreable sans le malheur de la mort qui arriua à Mademoiselle de Tournon; de qui l'Histoire estant si remarquable, ie ne puis omettre à la raconter faisant cette digression à mon discours. Madame de Tournon, qui estoit lors ma Dame d'honneur, qui auoit lors plusieurs filles, desquelles l'aînée auoit épousé Monsieur de Bilançon, Gouverneur pour le Roy d'Espagne au Comté de Bourgogne, & s'en allant à son ménage pria sa mere Madame de Tournon de luy bailler sa sœur Mademoiselle de Tournon pour la nourrir avec el-

le ; & luy tenir compagnie en ce País où elle estoit esloignée de tous ses parents. La mere la luy accorde ; & y ayant demeuré quelques années en se faisant agreable & belle (car sa principale beauté estoit sa vertu & sa grace) Monsieur le Marquis de Varanbon, de qui j'ay parlé cy-deuant , lequel estoit destiné à estre d'Eglise, demeurant avec son frere Monsieur de Balançon en mesme maison, deuint par l'ordinaire frequentatiō qu'il auoit avec Madamoiselle de Tournon fort amoureux d'elle, & n'estant point obligé à l'Eglise il desira l'espuser. Il en parle aux parents d'elle & de luy. Ceux du costé d'elle le trouuerent bon ; mais son frere Monsieur de Balançon , estimant plus vtile qu'il fust d'Eglise , fait tant qu'il empescha cela ; s'opiniastrant à luy faire prendre la robe longue Madame de Tournon , tres-sage & tres prudente femme , s'offensant de cela , osta sa fille Madamoiselle de Tournon d'avec sa sœur Madame de Balançon , & la prit avec elle. Et comme elle estoit femme vn peu terrible & rude , sans auoir égard que cette fille estoit grande , & meritoit vn plus doux traitement , elle la gourmande & crie sans cesse, ne luy laissant presque iamais l'œil sec , bien qu'elle ne fit nulle action qui ne fut tres-loüable . Mais c'estoit la seuerité naturelle de sa mere. Elle ne souhaittant que de se voir hors de cette tyrannie , receut vne certaine ioye quand elle vit que j'allois en Flandre , pensant bien que le Marquis de Varanbon s'y trouueroit comme il fit , & qu'estant lors en estat de se remarier, ayant du tout quitté la robe lon-

gue, il la demanderoit à sa mere, & que par le moyen de ce mariage elle se trouueroit deliurée des rigueurs de sa mere. A Namur le Marquis de Varenbon, & le jeune Balançon son frere s'y trouuerent, comme j'ay dit. Le jeune de Balançon, qui n'estoit pas de beaucoup si agreable que l'autre, accoste cette fille, la recherche, & le Marquis de Varanbon, tant que nous fûmes à Namur, ne fit pas seulement semblant de la connoistre. Le dépit, le regret, l'ennuy luy serrent tellemēt le cœur, elle s'étāt contrainte de faire bonne mine tant qu'il fut present sans mōstrer de s'en soucier, que soudain qu'ils furent hors du batteau où ils nous dirent adieu, elle se trouua tellement saisie qu'elle ne pût plus respirer qu'en criant, & avec des douleurs mortelles. N'ayant nulle autre cause de son mal, la jeunesse combat huit ou dix iours la mort, qui armée de dépit se rend enfin victorieuse, la rauissant à sa mere & à moy, qui n'eûsmes mōins de deuil l'une que l'autre. Car sa mere, bien qu'elle fust fort rude, l'aimoit vniquement. Ses funeraillles estans commandées les plus honorables qu'il se pouuoit faire, pour estre de grāde maison comme elle estoit, mesme appartenant à la Reyne mere, le iour venu de son enterrement, l'on ordonne quatre Gentils-hommes des miens pour porter le corps; l'un desquels estoit la Boëssiere (qui l'auoit pendāt sa vie passionnément adorée sans le luy auoir osé decouurir, pour la vertu qu'il connoissoit en elle, & pour l'inégalité) qui lors alloit portant ce mortel faix, & qui mouroit autant de fois de sa mort

qu'il estoit mort de son amour. Ce funeste convoiy estant au milieu de la rue qui alloit à la grande Eglise, le Marquis de Varenbon, coupable de ce triste accident, quelques iours après mon partement de Namur s'estant repenty de sa cruauté, & son ancienne flamme s'estât de nouveau rallumée (ô-estrange fait!) par l'absence, qui par la presence ne pouvoit estre émeuë, se resout de venir demander à sa mere, se confiant peut-estre en la bonne fortune qui l'accompagne, d'estre aimé de toutes celles qu'il recherche, comme il a paru depuis peu en vne grâde qu'il a épousée contre la volôté de ses parens, & se promettât que sa faute luy seroit aisément pardonnée de sa Maistressë, repetant souuent ces mots Italiens. *Che la forza d'amore non risguarda ad delitto*, prie Dom Jean de luy donner vne commissiõ vers moy, & venant en diligence, arriue justement sur le point que ce corps aussi malheureux qu'innocent & glorieux en sa virginité, étoit au milieu de cette rue. La presse de cette pompe l'empesche de passer; Il regarde que c'est; Il auise de loin au milieu d'une grande & triste troupe des personnes en deuil, & vn drapeau blanc couuert de chapeaux de fleurs. Il demande que c'est. Quelqu'un de la ville luy respondit que c'estoit vn enterremēt. Luy trop curieux, s'auance iusqu'aux premiers du convoiy, & importunément pressé de luy dire de qui c'est. O mortelle responce! L'amour ainsi vengeur de l'ingrate inconstance, veut faire éprouuer à son ame, ce que par son dédaigneux oubly il a fait souffrir au corps de sa Maistressë les traits

de la mort. Cét ignorant qu'il pressoit luy respond que c'est le corps de Madamoiselle de Tournon. A ce mot il se pasme & tombe de cheual. Il le faut emporter en vn logis comme mort ; voulant plus justement en cette extremité luy rendre l'union en la mort que trop tard en la vie il luy auoit accordée. Son ame, que ie croy, allant dans le tombeau requerir pardon à celle que son dédaigneux oubly y auoit mise, le laissa quelque temps sans aucune apparence de vie, & estant reuenu l'anima de nouveau pour luy faire esprouuer la mort, qui d'une seule fois n'eust assez puny son ingratitude. Ce triste Office estant acheué, me voyant en vne compagnie estrangere, ie ne voulois l'ennuyer de la tristesse que ie ressentois de la perte d'une si honneste fille, & estant conuiee ou par l'Euesque (dit sa Grace) ou par ses Chanoines, d'aller en festin en diuerses maisons & diuers jardins, comme il y en a dans la ville & dehors de tres beaux, i'y allay tous les iours accompagnée de l'Euesque, Dames & Seigneurs estrangers comme i'ay dit, lesquels venoient tous les matins en ma chambre pour m'accompagner au jardin où j'allois pour prendre mon eau ; car il faut la prendre en se promenant. Et bien que le Medecin qui me l'auoit ordonnée estoit mon frere, elle ne laissa toutesfois de me faire bien, ayant depuis demeuré six ou sept ans sans me sentir de l'ex-sipele de mon bras. Partant de là, nous passions la iournée ensemble, allans disner à quelque festin, où après le bal, nous allions à Vespres en quelque Re-

ligion; & l'aprèsdîner se passoit de mesure au bal, ou dessus l'eau, avec la musique. Six semaines s'écoulerent de la façon, qui est le temps ordinaire que l'on a accoustumé de prendre des eaux, & qui estoit ordonné à Madame la Princesse de la Roche-sur-Yon. Voulant partir pour retourner en France, Madame d'Aurec arriva, qui s'en alloit retrouver son mary en Lorraine, qui nous dist l'estrange changement qui estoit arrivé à Namur, & en tout ce pais là depuis mon passage; que le iour mesme que ie partis de Namur, Dom Jean sortant de son bateau & montant à cheval, prenant pretexte de vouloir aller à la chasse, passa devant la porte du chasteau de Namur, lequel il ne tenoit encore, & feignant par occasion, s'estant trouué devant la porte, de vouloir entrer pour le voir, s'en estoit saisi, & en avoit tiré le Capitaine que les Estats y tenoient, contre la convention qu'il avoit avec les Estats, & outre ce, s'estoit saisi du Duc d'Arscot, de Monsieur d'Aurec, & d'elle; Que toutesfois après plusieurs remonstrances & prieres il avoit laissé aller son beau frere & son mary; la retenant elle jusques à lors pour luy servir d'ostage de leur déportement; Que tout le pais estoit en feu & en armes. Il y avoit trois partis, celuy des Estats qui estoient les Catholiques de Flandre; celuy du Prince d'Orange, & de Huguenots qui n'estoient qu'un, & celuy d'Espagne, où commandoit Dom Jean. Me voyant tellement embarquée qu'il falloit que ie passasse entre les mains des uns & des autres, & mon frere m'ayant envoyé un Gentil-homme

me nommé Lescar, par lequel il m'escriuoit; Que depuis mon partement de la Cour, Dieu luy auoit fait la grace de si bien seruir le Roy en sa charge de l'armée qui luy auoit esté commise, qu'il auoit pris toutes les villes qu'il luy auoit commandé d'attaquer, & chassé tous les Huguenots de toutes les Prouinces pour lesquelles son armée estoit destinée; Qu'il estoit reuenu de la Cour de Poictiers, où le Roy estoit pendant le siege de Broüage, pour estre plus près pour secourir Monsieur de Mayenne de ce qui luy seroit necessaire; Que comme la Cour est vn Prothée qui change de forme à toute heure, y arriuant touïours de nouuelle-
tez, il l'auoit trouuée toute changée; Que l'on n'y attoit non plus fait d'estat de luy que s'il n'eust rien fait pour le seruice du Roy; Que Bussi, à qui le Roy faisoit bonne chere auant que partir, & qui auoit seruy le Roy en cette guerre, de sa personne & de ses amis, jusques à y auoir perdu son frere à l'assaut d'Issôire, estoit aussi défauorisé & persecuté de lenuie qu'il auoit esté du temps de du Gualt; Que l'on leur faisoit tous les tours à l'un & à l'autre des indignitez; Que les mignons qui estoient auprès du Roy, auoient fait pratiquer quatre ou cinq des plus honnestes hommes qu'il eust, qui estoient Maugiron, la Valette, Maulcon, Linarrot, & quelques autres, pour quiter son seruice & se mettré à celui du Roy; Que le Roy se repentoit fort de m'auoir permis de faire ce voyage de Flandre, & que l'on taschoit à mon retour, en haine de luy, de me faire prendre, ou par les Espagnols, les ayant auertis de ce

Que ie traitois en Flandre pour luy , ou par les Huguenots , pour se vanger du mal qu'ils auoient receu de luy, leur ayant fait la guerre après l'auoir assisté. Tout ce que dessus considéré ne me donnoit peu à penser, voyât que non seulement il falloit que ie passasse ou entre les vns ou entre les autres ; mais que mesme les principaux de ma compagnie estoient affectiōnez, ou aux Espagnols ou aux Huguenots, M. le Cardinal de Lenoncourt ayant autrefois esté soupçonné de fauoriser le party des Huguenots & Monsieur Descarts , duquel Monsieur l'Euesque de Lizieux estoit frere , ayant aussi esté quelquefois suspect d'auoir le Cœur Espagnol. En ces doutes pleins de contrarietez ie ne m'en pûs cōmuniquer qu'à Madame la Princesse de la Roche - sur - Yon , & à Madame de Tournon, qui connoissans le danger où nous estions, & voyans qu'il nous falloit cinq ou six iournées jusques à la Fere, passans tousiours à la misericorde des vns ou des autres , me respondent la larme à l'œil , que Dieu seul nous pouuoir sauuer de ce danger ; Que ie me recommandasse bien à luy , & puis que ie fissè ce qu'il m'inspireroit ; Que pour elles , encore que l'une fust malade & l'autre vieille , ie ne feignisse à faire de longues traites ; & qu'elles s'accommoderoient à tout pour me tirer de ce hazard. I'en parlay à l'Euesque de Liege , qui me seruit certes de pere , & me bailla son grand Maistre avec ses cheuaux pour me conduire si loin que ie voudrois. Et comme il nous estoit necessaire d'auoir vn passeport du Prince d'Orange , j'y enuoyay Mons

doucet, qui luy estoit confident, & ressentoit vn peu de cette Religion; il ne reuint point; le l'attends deux ou trois iours, & croy que si ie l'eusse attendu, j'y fusse encores. Estant toujours conseillée de Monsieur le Cardinal de Lenoncourt, & du Cheualier Saluiati mon premier Escuyer, qui estoient d'une mesme caballe, de ne partir point sans auoir passeport, & voyant qu'on me dressoit quelque autre chose de bien contraire, ie me resolus de partir le lendemain matin. Eux voyans que sur ce pretexte on ne me pouuoit plus arrester, le Cheualier Saluiati intelligent avec mon Tresorier, qui estoit aussi couuertement Huguenot, luy fait dire qu'il n'auoit point d'argent pour payer les hostes, (chose qui estoit entierement fausse ; car estant arriuée à la Fère ie voulois voir le compte, & se trouua de l'argent que l'on auoit pris pour faire le voyage de reste encore pour faire aller ma maison plus de six semaines, & fait que l'on retient mes cheuaux, me faisant avec le danger cét affrôt public. Madame la Princesse de la Roche-sur-Yon ne pouuant supporter cette indignité & voyât le hazard où l'on me mettoit, preste, l'argent qui estoit necessaire; & eux demeurans confus, ie passe, après auoir fait present à Monsieur l'Euesque d'un diamant de trois mille escus, & à ses seruiteurs de chaines d'or ou de bagues, & vins à Huy n'ayant pour passeport que l'esperance que i'auois en Dieu. Cette ville estoit, comme i'ay dit, des terres de l'Euesque du Liege, mais toutesfois tumultueuse & murinée, (comme tous ces peu,

ples-la se sentoient de la reuolte generale des Pais-bas) & ne reconnoissoit plus son Euesque, à cause qu'il viuoit neutre, & elle tenoit le party des Estats; De sorte que sans reconnoistre le grand Maistre de l'Euesque de Liege, qui estoit; avec nous, ayant l'allarme que Dom Jean estoit saisi du cahalteau de Namur sur mon passage, soudain que nous fûmes logez ils sonnent le tocsin, & traînent l'artillerie par les ruës, & les barricades contre mon logis, tendans les chaisnes, afin que nous ne nous pussions joindre ensemble, & nous tindrent toute la nuit en ces alteres, sans auoir moyen de parler à aucun d'eux, estant tout petit peuple, gens brutaux & sans raison. Le matin ils nous laisserent sortir, ayans bordé toute la ruë de gens armez. Nous allâmes de là coucher à Dinan, où par malheur ils auoient fait ce iour mesme les Boutgmaistres, qui sont comme Consuls en Gascogne & en France. Tout y estoit ce iour-là en débauche; tout le monde yvre; point de Magistrats connus; bref vn vray cahos de confusion. Et pour empirer dauantage nostre condition le grand Maistre de l'Euesque de Liege leur auoit autrefois fait la guerre, & estoit tenu d'eux pour mortel ennemy. Cette ville, quand ils sont en leur sens rassis, tenoit pour les Estats; mais Bachus y dominant, ils ne tenoient pas pour eux-mesmes, & ne reconnoissoient personne. Soudain qu'ils nous voyent approcher les faux-bourgs avec vne troupe grande comme estoit la mienne, les voilà allarmez. Ils quittent les verres pour courir aux armes; & tout en tumulte; au lieu

de nous ouurir ils fermerēt la barriere. I'auois enuoyé deuant vn Gentil-hōme avec les Fourriers & Marechal des logis, pour les prier de nous donner passage; mais ie les trouuay tous arrestez là, qui crioient sans estre entendus. Enfin ie me leue debout dans la litiere, & ostāt mon masque, ie fais signe au plus apparēt que ie veux parler à luy; & estant venu à moy, ie le priay de faire faire silence, afin que ie pusse estre entendu; ce qu'estant fait avec toute peine, ie leur representay qui j'estois, & l'occasion de mon voyage; que tant s'en faut que ie leur voulusse apporter du mal par ma venue, que ie ne voudrois pas seulement leur en donner le soupçon; Que ie les priois de me laisser entrer moy & mes femmes, & si peu de gens qu'ils voudroient pour cette nuit, & que le reste ils le l'aisassent dans le faux-bourg. Ils se contenterent de cette proposition, & me l'accordent. Ainsi j'entray dans leur ville avec les plus apparens de ma troupe, du nombre desquels fut le grand Maistre de l'Euesque de Liege, qui par malheur fut reconnu comme j'entrois en mon logis, accompagné de tout ce peuple yvre & armé. Lors ils commencent à luy crier iniures, & à vouloir charger ce bon homme, qui estoit vn vieillard venerable de quatre-vingts ans, ayans la barbe blanche iusques à la ceinture. Je le fis entrer dans mon logis, où ces yvrognes faisoient pleuvoir les harquebusades contre les murailles, qui n'estoient que de terre. Voyant ce tumulte, ie manday si l'hoste de la maison n'estoit point là dedans; il se trouue de bonne fortune; Je le

prie qu'il se mette à la fenestre, & qu'il me fasse parler aux plus apparens; ce qu'à toute peine il veut faire. Enfin ayāt assez crié par les fenestres les Bourgmaistres viennent parler à moy si saouls qu'ils ne sçauoient ce qu'ils disoient, Enfin leur assleurāt que ie n'auois point sçeu que ce grand Maistre leur fust ennemy, leur remonstrant de quelle importance il leur estoit d'offenser vne personne de ma qualité, qui estoit amie de to^s les principaux Seigneurs des Estats, & que ie m'assleurois que Monsieur le Comte de Lalain & tous les autres Chefs trouueroient fort mauuaise la reception qu'ils m'auoient faite; oyans nommer Monsieur de Lalain ils changerent tous, & luy porterent tous plus de respect qu'à tous les Roys à qui j'appartenois. Le plus vieil d'entr'eux me demande en se fouriant & begayant, si j'estois donc amie de Monsieur le Comte de Lalain, & moy voyāt que sa parenté me seruoit plus que celle de tous les Potentats de la Chrestienté, ie luy respondis; Oüy, ie suis son amie & sa parente aussi. Lors ils me font la reuerence & me baillent la main, & m'offrent autant de courtoisie comme ils m'auoient fait d'insolence, me priant de les excuser, & me promettans qu'ils ne demanderoiēt rien à ce bon homme le grend Maistre, & qu'ils le laisseroient sortir avec moy. Le matin venu comme ie voulois aller à la Messe, l'Agent que le Roy tenoit auprès de Dom Iean, nommé du Bois, lequel estoit fort Espagnol, arriue, me disant qu'il auoit des lettres du Roy pour me venir trouuer & me conduire seurement à mon re-

tour, Qu'à cette fin il auoit prié Dom Iean de luy bailier Barlemont avec vne troupe de cauallerie, pour me faire escorte & me mener seurement à Namur, & qu'il falloit que ie priaſſe ceux de la ville de laiſſer Monsieur de Barlemont, qui estoit Seigneur du païs, & ſa troupe, afin qu'il me puſt conduire. Ce qu'ils faiſoient à double fin, l'vne, pour ſe faiſir de la ville, & l'autre pour me faire tomber entre les mains des Eſpagnols. Je me trouuay lors en fort grande peine, & le communiquant à Monsieur le Cardinal de Lenoncourt, qui n'auoit pas enuie de tomber entre les mains de l'Eſpagnol nō plus que moy, nous aduiſâmes qu'il falloit ſçauoir de ceux de la ville ſ'il y auoit quelque chemin par lequel ie puſſe éuiter cette troupe de Monsieur de Barlemont & baillant ce petit Agent, nommé du Bois, à amuſer Monsieur de Lenoncourt, ie paſſe en vne autre chambre, où ie fis venir ceux de la ville & leur faire connoiſtre que ſ'ils laiſſoient entrer la troupe de Monsieur de Barlemont, ils estoient perdus, parce qu'ils ſe faiſiroient de la ville pour Dom Iean; Que ie les conſeillois de ſ'armer, & ſe tenir preſts à leur porte, montrans contenance de gens auertis, & qui ne ſe veulent laiſſer ſurprendre? Qu'ils laiſſaſſent entrer ſeulement Monsieur de Barlemont, & rien dauantage. Ils prirent bien mes raiſons & me crurent, m'offrans d'employer leurs vies pour mon ſeruiſe, & me baillans vn guide pour me mener par vn chemin auquel ie mettrois la riuere entre les troupes de Dom Iean & moy, & les laiſſerois ſi loing

Qu'ils ne me pourroient plus atteindre, aiant toujours par maisons ou villes, tenant le party des Estats. Ayant pris cette resolution avec eux, ie les enuoye faire entrer Monsieur de Barlemont tout seul, lequel estant entré leur veut persuader de laisser entrer sa troupe; mais voyans cela ils se mutinerent de sorte que peu s'en fallust qu'ils ne le massacrasent, luy disant que s'il ne la faisoit retirer hors de la veuë de leur ville qu'ils y feroient tirer l'artillerie; ce qu'ils faisoient afin de me donner temps de passer l'eau autant que cette troupe me pust atteindre. Monsieur de Barlemont estant entré, luy & l'Agent du Bois font ce qu'ils peuvent pour me persuader d'aller à Namur où Dom Jean m'attendoit. Je monstre de vouloir faire ce qu'on me conseilloit, & après auoir oüy la Messe, & fait vn dîner court, ie sors de mon logis, accompagnée de deux ou trois cens de la ville en armes, & parlant toujours à Monsieur de Barlemont, & à l'Agent du Bois, ie prens mon chemin droit à la porte de la riuere, qui estoit au contraire du chemin de Namur, sur lequel estoit la troupe de Monsieur de Barlemont. Eux s'en auisans me dirent que ie n'allois pas bien, & moy les menant toujours de paroles, j'arriuay à la porte de la ville, de laquelle sortant accompagnée d'une bonne partie de ceux de la ville, ie double le pas vers la riuere, & monte dans le batteau, y faisant promptement entrer tous les miens, Monsieur de Barlemont & l'Agent du Bois me crians tousiours du bord de l'eau que ie ne faisois pas bien; que ce n'estoit point l'intention

du Roy, qui vouloit que ie passasse par Namur. Nonobstant leurs crieries nous passons promptement l'eau, & pendant que l'on passoit à deux ou trois voyages nos litteres & nos cheuaux, ceux de la Ville, exprés pour me donner temps, amusent par mille crieres & mille plaintes Monsieur de Barkemont & l'Agent du Bois, les arraisonnans en leur patois sur le tort que Dom Jean auoit d'auoir faussé sa foy aux Estats, & rompu la paix? & sur les vielles querelles de la mort du Compte d'Egmont, & le menaçant tousiours que si sa troupe paroïssoit auprès de la Ville, ils feroient tirer l'artillerie. Ils me donnerent temps de méloigner? en telle sorte que ie n'auois plus à craindre cette troupe; guidée de Dieu & de l'homme qu'ils m'auoient baillé; Je logeay ce soir là en vn Chasteau fort nommé Fleurines, qui estoit à vn Cētil-homme qui tenoit le party des Estats, & lequel i'auois veu avec le Cōte de Lalain. Le mal - heur fut tel que ledit Gentil-homme ne s'y trouua point, & n'y auoit que sa femme. Et comme nous fusmes entrez dans la basse-court, la trouuant toute ouuerte, elle prit l'alarme, & s'enfuit dans son donjon, leuant le pont, resoluë, quoy que nous luy pussions dire, de ne nous point laisser entrer. Cependāt trois cens Gentils-hommes que Dom Ieā auoit enuoyez pour nous couper chemin, & pour se saisir dudit Chasteau de Fleurines, sçachans que i'y allois loger, paroïssoient sur vn petit haut à mille pas de là, & estimans que nous fussions entrez dans le donjō, ayans pū cōnoistre de là que nous estions tous
entrez

REYNE MARGVERITE. 117

Entrer dans la court, firent alte, & se logerent là auprès, esperant de m'attraper le lendemain matin. Comme nous estions en ces alteres, pour ne nous voir que dedans la court, qui n'estoit fermée que d'une meschante muraille, & d'une meschante porte qui eust esté bien aisée à forcer, disputans tousiours avec la Dame du Chasteau inexorable à nos prieres, Dieu nous fit cette grace que son mary Monsieur de Fleurines y arriua à nuit fermante; lequel soudain nous fit entrer dans son chasteau, se courrouçant fort à sa femme de l'indiscrete inciuilité qu'elle auoit monstrée. Ledit sieur de Fleurines nous venoit trouuer de la part du Comte de Lalain pour me faire seurement passer par les villes des Estats, ne pouuant quitter l'armée desdits Estats de laquelle il estoit Chef pour me venir accompagner. Cette bonne rencontre fut si heureuse, que le maistre de la maison s'offrant de m'accompagner jusques en France, nous ne passâmes plus par aucunes villes où ie ne fusse honorablement & paisiblement receuë, pour ce que c'estoit pais des Estats; y receuant ce seul déplaisir que ie ne pouuois repasser à Mons comme i'auois promis à la Comtesse de Lalain, & n'en approchois pas plus près que de Niuelles, qui estoit à sept grandes lieuës de là; qui fut cause, la guerre étant si forte comme elle estoit, que nous ne nous pûmes voir elle & moy, ny aussi peu Monsieur le Comte de Lalain, qui estoit comme j'ay dit, en l'armée des Estats vers Anuers. Je luy escriuis seulement de là par un homme de ce Gentil

homme qui me conduisoit. Elle soudain me sçachant là, m'enuoye des Gentils-hommes plus apparens qui fussent demeurez-là pour me conduire jusques à la frontiere de France (car j'auois à passer tout le Cambresis, qui estoit my party pour l'Espagnol, & pour les Estats) avec lesquels j'allay loger au Chasteau Cambresis, d'où eux s'en retournans, ie luy enuoyay pour se souuenir de moy vne robbe des miennes que ie luy auois oüy fort estimer quand ie la portois à Mons, qui estoit de satin noir toute couuerte de broderie de Canon, qui auoit cousté huit ou neuf cens escus. Arriuant au Chasteau Cambresis j'eus auis que quelques troupes Huguenotes auoient dessein de m'attaquer entre la frontiere de Flandre & de France. Ce que n'ayant communiqué qu'à peu de personnes, vne heure auant le iour ie fus presté. Enuoyant querir nos littieres & cheuaux pour partir, le Cheualier Saluati faisoit le long, comme il auoit fait au Liege. Ce que connoissant qu'il faisoit à dessein, ie laisse ma litiere, & montant à cheual, ceux qui furent les premiers prests me suivirent, de sorte que ie fus au Chastelet à dix heures du matin, ayant par la grace de Dieu eschappé toutes les embusches & aguets de mes ennemis. De là allant chez moy à la Fere, pour y sejourner iusques à tant que ie sçauois la paix estre faite, j'y trouuay arriué deuant moy vn courrier de mon frere. qui auoit charge de m'attédre pour soudain que ie serois arriué recourner en poste, & l'ē aduertir. Il escriuit par luy que la paix estoit faite, & que le Roy s'en retournoit à Pa-

REYNE MARGVERITE. 113

ris ; Que pour luy sa condition alloit tousjours en empirant , n'y ayant sorte de défauteurs & d'indignitez que l'on ne fit tous les iours esprouuer & à luy & aux siens , & que ce n'estoit tous les iours que quelques querelles nouvelles que l'on suscitoit à Buffi , & aux honnestes gens qui estoient avec luy ; ce qui luy faisoit attendre avec extrême impatience mon retour à la Fere pour m'y venir trouver. Je luy redespeschay soudain son homme , par lequel aduertiy de mon retour il enuoya soudain Buffi avec toute sa maison à Angers , & prenant seulement quinze ou vingt hommes des siens , s'en vint en poste me trouver chez moy à la Fere , qui fust vn des grands contentemens que i'aye jamais receu , de voir vne personne chez moy que j'aymois & honoroist ; où ie me mis en peine de luy donner tous les plaisirs que ie pensois luy rendre ce séjour agreable. Ce qui estoit si bien receu de luy , qu'il eust volontiers dit comme S. Pierre ; Faisons icy nos tabernacles , si le courage tout Royal qu'il auoit , & la generosité de son ame ne l'eussent appelé à choses plus grandes. La tranquillité de nostre Cour au prix de l'autre d'où il partoist luy rendoit tous les plaisirs qu'il y receuoit si doux , qu'à toute heure il ne pouuoit s'empêcher de dire ; O ! ma Reyne , qu'il fait bon avec vous ! Mon Dieu , cette compagnie est vn paradis comblé de toutes sortes de delices ; & celle d'où ie suis party vn enfer remply de toutes sortes de furies & toutmens. Nous passâmes près de deux mois , qui ne nous furēt que deux petits iours en cēt heureux estat , durant lequel

luy ayant rendu compte de ce que i'auois fait pour luy en mon voyage de Flandre, & des termes où i'auois mis ses affaires, il trouua fort bon que Monsieur le Comte de Montigny, frere du Comte de Lalain vint resoudre avec luy des moyens qu'il y falloit tenir, & pour prendre aussi assurance de leur volonté & eux de la sienne. Il y vint accompagné de quatre ou cinq des plus principaux de Hainaut; l'un desquels auoit lettre & charge de M. d'Ainsi d'offrir son seruice à mon frere, & l'asseurer de la citadelle de Cambray, Monsieur de Montigny luy portoit parole de la part de son frere le Comte de Lalain, de luy remettre entre ses mains tout le Hainaut & l'Artois, où il y a plusieurs bonnes villes. Ces offres tres-assurées receuës de mon frere, il les enuoya avec presens de medailles d'or, où la figure de luy & de moy estoit, & assurant les accroissemens & bien-faits qu'ils pouuoient esperer de luy. De sorte que s'en retournant ils preparerent toutes choses pour la venuë de mon frere, qui se deliberant d'auoir ses forces prestes dans peu de temps pour y aller, s'en retourna à la Cour pour tascher de tirer des commoditez du Roy pour fournir à cette entreprise. Moy voulant faire mon voyage de Gascogne, & ayant préparé toutes choses pour cét effet, ie m'en retournay à Paris, où arriuant mon frere me vint trouuer à vne iournée de Paris, où le Roy, & la Reyne ma mere, & la Reyne Louyse avec toute la Cour me firent cét honneur de venir au deuant de moy iusques à S.

Denys, qui estoit ma disnée, où ils me receurent avec beaucoup d'honneur & de bonne chere, se plaïsant à me faire raconter les honneurs & magnificences de mon voyage & séjour du Liege, & les auantures de mon retour. En ces agreables entretiens, estant tous dans le chariot de la Reyne ma mere, nous arriuasmes à Paris, où après auoir soupé & le bal étant finy, le Roy & la Reyne ma mere estant ensemble ie m'aproche d'eux, & leur dis que ie les suppliois ne trouuer mauuais si ie les requerois auoir agreable que j'allasse trouuer le Roy mon mary; Que la paix estant faite c'estoit chose qui ne leur pouuoit estre suspecte, & qu'il me seroit prejudiciable & mal seant si ie demeurois dauantage à y aller. Ils monstre-
rent tous deux de le trouuer tres bon, & de louer la volonté que i'en auois. Et la Reynema mere me dist qu'elle vouloit m'y accôpagner, estant aussi son voyage necessaire en ce pais-là pour le seruice du Roy; auquel elle dist aussi qu'il falloit qu'il me baillast des moyens pour mon voyage; Ce que le Roy librement m'accorda. Et moy ne voulant rien laisser en arriere qui me pût faire reuenir à la Cour, ne m'y pouuant plus plaire lors que mon frere en seroit dehors, que ie voyois se preparer pour s'en aller bien tost en son entreprise de Flandre, ie suppliy la Reyne ma mere de se souuenir de ce qu'elle m'auoit promis à la paix avec mon frere, qu'adeuenant que ie partisse pour m'en aller en Gascogne elle me feroit bail-
ler des terres pour l'assignat de mon dot.

Elle s'en ressouuint, & le Roy le trouue tres-raisonnable, & me promet qu'il seroit fait. Je le supplie que ce soit promptemēt, pource que ie desirois partir s'il luy plaisoit pour le commencement du mois prochain. Ce qui fut ainsi arresté; mais à la façon de la Cour. Car au lieu de me dépescher, bien que tous les iours ie les en sollicitasse, ils me firent traîner cinq ou six mois, & mon frere de mesme, qui pressoit aussi son voyage de Flandre, representant au Roy que c'estoit l'honneur & l'accroissement de la France; Que ce seroit vne inuention pour empescher la guerre ciuile, tous les esprits remuans & desireux de nouveauté ayans le moyē d'aller en Flandre passer leur fumée, & se fouler de la guerre; Que cette entreprise seruiroit aussi comme le Piedmont décole à la Noblesse de France pour s'exercer aux armes, & y faire reuiure des Montlucs & Brissacs, des Termes & des Belle-gardes, tels que ces grands Marefchaux, qui s'estans façonnez aux guerres de Piedmont, auoient depuis si gloricusement & heureusement seruy le Roy & leur Patrie. Ces remonstrances estoient belles & veritables; mais elles n'auoient tant de poids qu'elles peussent emporter en la balance l'enuie que l'on portoit à l'accroissement de la fortune de mon frere, auquel l'on donna tous les iours de nouveaux empeschemens pour le retarder d'assembler ses forces, & les moyens qui luy estoient necessaires pour aller en Flandre: luy faisant cependant à luy, à Bussi, & à ses autres seruiteurs mille indignitez, & faisant attaquer

par plusieurs querelles Bussi, tantost par Quelus, tantost par Grammont, de iour, de nuit, & à toutes heures; estimâs qu'à quelques-vnes de ces allarmes mon frere ce precipiteroit. Ce qui se faisoit sans le sceu du Roy; mais Maugiron qui le possèdoit lors, & qui ayant quitté le service de mon frere, croyoit qu'il s'en deust ressentir, (ainsi qu'il est ordinaire que qui offense ne pardonne iamais) haïssoit mon frere d'une telle haine, qu'il conjuroit sa ruine en toutes façons, le brauant & méprisant sans respect, comme l'imprudencce d'une telle jeunesse enflée de la faueur du Roy le pouïssoit à faire toutes insolences, s'estant ligué avec Quelus, Saint Luc, Saint Maigrin, Grammont, Mauleon, Liuarrot, & quelques autres jeunes gens que le Roy fauorisoit, qui suiuis de toute la Cour, à la façon des courtisans qui ne suivent que la faueur, entreprenoient toutes les choses qui leur venoient en fantaisie, quelles qu'elles fussent. De sorte qu'il ne se passoit iour qu'il n'y eust nouvelle querelle entr'eux & Bussi, de qui le courage me pouuoit ceder à nul. Mon frere considerant que ces choses n'estoient pas pour aduancer son voyage de Flandre, desirant plustost adoucir le Roy que l'aigrir, pour l'auoir fauorable en son entreprise, & estimant aussi que Bussi estant dehors aduanceroit dauantage de dresser les troupes necessaires pour son armée, il l'enuoye par ses terres pour y donner ordre. Mais Bussi estant party, la persecution de mon frere ne cessâ pour cela; & connut-on

lors qu'encore que les belles qualitez qu'il auoit apportassent beaucoup de jalousie à Maugiron & a ces autres ieunes gens qui estoient près du Roy, la principale cause de leur haine contre Bussi, estoit qu'il estoit seruiteur de mon frere. Car depuis qu'il fut party ils brauerent & morguerēt mon frere avec tant de mépris & si apparemment que tout le monde le connoissoit, encore que mon frere fust fort prudent & res-patient de son naturel, & qu'il eust resolu souffrir toutes choses pour faire ses affaires en son entreprise de Flandre, esperant par ce moyen en sortir bien tost, & ne s'y rendre iamais plus sujet. Cette persecution & ces indignitez luy furent toutefois fort ennuyeuses & honteuses; mesmes voyant qu'en haine de luy l'on taschoit de nuire en toutes façons à ses seruiteurs, ayans depuis peu de iours fait perdre vn grand procez à Monsieur de la Chastre, pource que depuis peu il s'estoit rendu seruiteur de mon frere, le Roy s'estant tellement laissé emporter aux persuasions de Maugiron, & de Saint Luc qui estoient amis de Madame de Senetaire, qu'il auoit luy mesme esté solliciter ce procez pour elle contre Monsieur de la Chastre qui estoit lors auprés de mon frere, qui s'en sentant offensé, comme l'on peut penser, faisoit participer mon frere à sa iuste douleur. En ces iours là le mariage de Saint Luc se fit, auquel mon frere me voulant assister, il me pria aussi d'en faire de mesme, & la Reyne ma mere qui ne se plaisoit guere à la desbordée outrecuidance de

ces jeunes gens, craignāt aussi que tout ce iour seroit en joye & en débauche, & que mon frere n'ayant voulu estre de la partie l'on luy en dressast quelqu'une qui luy fust prejudiciable, fit trouver bon au Roy qu'elle allast le iour des nopces dîner à Saint Maur, & nous y mena mon frere & moy. C'estoit le Lundy gras. Nous réuinmes le soir, la Reyne ma mere ayant tellement presché mon frere qu'elle le fit consentir de paroistre & se trouver au bal pour complaire au Roy. Mais au lieu que cela amēdast les affaires, elles s'en empirerent. Car y estant Maugiron & autres de sa cabale, ils commencerent à le gausser avec des paroles si piequantes qu'un moindre que luy s'en fust offensé; luy disans qu'il auoit bien perdu sa peine de s'estre r'habillé; que l'on ne l'auoit point trouué à dire l'apresdinee; qu'il estoit venu à l'heure des tenebres, parce qu'elles luy estoient propres: & l'attaquant de sa laideur & petite taille. Tout cela se disoit à la nouvelle mariée qui estoit auprès de luy, & si haut qu'il le pouuoit entendre. Mon frere connoissant que cela se faisoit exprés pour le faire respondre, & le brouiller par ce moyen avec le Roy, s'osta de là, si plein de dépit & de colere qu'il n'en pouuoit plus; & après en auoir conféré avec Monsieur de la Chastre, se resolut de s'en aller pour quelques iours à la chasse, pensant par son absence attiedir l'animosité de ces jeunes gens contre luy, & en faire plus aisément ses affaires avec le Roy pour la preparation de l'armée qui luy estoit necessaire pour

aller en Flandre. Il s'en va trouuer la Reyne ma mere au bal, dequoy elle fut tres marrie, & luy fait entendre la resolution que là dessus il auoit prise, qu'elle trouua tres-bonne, & luy promist de la faire agréer au Roy, & en son absence de le solliciter de luy fournir promptement ce qu'il luy auoit promis pour son entreprise de Flandre; & Monsieur de Villequier estant là, elle luy commanda d'aller faire entendre au Roy le desir que mon frere auoit d'aller pour quelques iours à la chasse; ce qui luy sembloit qu'il ne seroit que bon, pour appaiser toutes les brouilleries qui estoient entre luy & ces jeunes gens, Maugiron, S. Luc, Quelus, & les autres. Mon frere se retirant en sa chambre, tenant son congé pour obtenu; commanda à tous ses gens d'estre le lendemain prests pour aller à la chasse à S. Germain: où il vouloit demeurer quelques iours à courir le cerf, ordonna à son grand Veneur d'y faire trouuer les chiens, & se coucha en cette intention de se lever le lendemain matin pour aller à la chasse soulager où diuertir vn peu son esprit de brouilleries de la Cour. Monsieur de Villequier cependant estoit allé par le commandement de la Reyne ma mere demander son congé au Roy, qui d'abord l'accorda. Mais estant demeuré seul en son cabinet avec le conseil de Jeroboam de cinq à six jeunes hommes, iis luy rendent ce partement fort suspect, & le mettent en telle apprehension qu'ils luy font faire vne des plus grandes folies qui se soit faite de nostre temps, qui fut de prendre

mon frere & tous les principaux seruiteurs prisonniers. S'il fut imprudemment deliberé, il fut encore plus indiscretement executé. Car le Roy soudain prenant la parole, de nuit s'en alla trouuer la Reine ma mere tout émeu comme en vne alarme publique, ou que l'ennemy eust esté à la porte, luy disant; Comment, Madame, que pensez-vous m'auoir demandé de laisser aller mon frere? Ne voyez-vous pas s'il s'en va, le danger où vous mettez mon Estat? Sans doute sous cette chassè il y a quelque dangereuse entreprise. Je m'en vais me saisir de luy & de tous ses gens, & feray chercher dans ses coffres. Je m'assùre que nous decouurirons de grandes choses. Et à mesme temps, ayant avec luy le sieur de Lossè, Capitaine des gardes, & quelques Archers Eseoillois la Reine ma mere craignant qu'en cette precipitation il fit quelque tort à la vie de mon frere, le prie qu'elle aille avec luy, & toute deshabillée comme elle estoit, s'accommodant comme elle pût avec son manteau de nuit, le suit montant à la chambre de mon frere, où le Roy frappe rudement, criant que lon luy ouurist, que c'estoit luy. Mon frere se réueille en sursaut, & sçachant bien qu'il n'auoit rien fait qui luy deust donner crainte, dit à Cange son valet de chambre qu'il luy ouurist la porte. Le Roy entrant en cette furie, commença à le gourmander, & luy dire qu'il ne cesseroit iamais d'entreprendre contre son Estat, & qu'il luy apprendroit que c'est de s'attaquer à son Roy. Sur cela il commanda à ses Archers d'emporter ses coffres.

hors de là , & de tirer ses valets de chambre hors de la chambre. Il fouille luy-mesme le lit de mon frere pour voir s'il y trouueroit quelques papiers. Mon frere ayant vne lettre de Madame de Sauue qu'il auoit receuë ce soir là, la prend à la main pour empescher qu'on ne la vit. Le Roy s'efforce de la luy oster. Luy y resistant, & le priant à mains jointes de ne la voir point, cela en donna plus d'enuie au Roy, croyant que ce papier seroit assez suffisant pour faire le procez à mon frere. Enfin l'ayant ouverte en la presence de la Reyne ma mere, ils resterent aussi confus que Caton, quand ayant contraint Cesar dans le Senat de monstrier le papier qui luy auoit esté apporté, disant que c'estoit chose qui importoit au bien de la Republique, il luy fit voir que c'estoit vne lettre d'amour de la sœur du mesme Caton adressant à Cesar. La honte de cette tromperie augmentant plustost par le dépit la colere du Roy que la diminuant, sans vouloir écouter mon frere, lequel demandoit sans cesse de quoy on l'accusoit, & pourquoy l'on le traittoit ainsi, il le commit à la garde de Monsieur de Lossè & des Escossois, leur commandant de ne le laisser parler à personne. Cela se fit vne heure après minuit. Mon frere demeura en cette façon, estant plus en peine de moy que de luy, croyant bien que l'on m'en auoit fait autant, & ne croyant pas qu'un si violent & si iniuste commencement pust auoir autre qu'une sinistre fin, Et voyant que Monsieur de Lossè auoit la larme à l'œil de regret de voir passer les choses

en cette sorte, & que toutefois a cause des archers qui estoient là il ne luy osoit parler librement, il luy demanda seulement ce qui estoit de moy. Monsieur de Lossé respond que l'on ne m'auoit encore rien demandé. Mon frere luy répond ; Cela soulage beaucoup ma peine de sçauoir ma sœur libre. Mais encore qu'elle soit en cét estat, ie m'assure qu'elle m'aime tant, qu'elle aimera mieux se captiuer avec moy que de viure libre sans moy. Et le pria d'aller supplier la Reyne ma mere qu'elle obtint du Roy que ie demeurasse en sa captiuité avec luy ; ce ce qui luy fut accordé. Cette ferme croyance qu'il eût de la grâdeur & fermeté de mon amitié me fust vne obligation si particuliere, bien que par ses bons offices il en eust acquis plusieurs grandes sur moy, que j'ay toujours mise celle-là au premier rang. Soudain qu'il eût cette permissiõ, qui fut sur le point du iour, il pria M. de Lossé de m'enuoyer vn archer Escossois, qui estoit là, pour m'annoncer cette triste nouvelle, & me faire venir en sa chambre. Cét archer entrant en la mienne trouue que ie dormois encore sans auoir rien sceu de tout ce qui s'estoit passé: Il ouure mō rideau, & en langage propre aux Escossois, me dist; Bon iour, Madame, Monsieur vostre frere vous prie de le venir voir. Je regarde cét homme presque toute endormie, pensant réuer, & le reconnoissant, ie luy demande s'il n'estoit pas vn Escossois de la garde. Il me dist qu'ouïy, & ie luy repliquay; Et qu'est-ce donc ? Mon frere n'a-t'il point d'autre messager que vous pour m'enuoyer ? Il me dist que non, que ses gens luy auoient esté

ostez, & me conta en son langage ce qui luy estoit aduenü la nuit, & que mon frere auoit obtenu permission pour moy de demeurer avec luy pendant sa captiuité. Et voyant que ie m'affligois fort, il s'approcha de moy, & me dist tout bas; Ne vous fâchez point, j'ay moyen de sauuer Monsieur vostre frere, & le feray, n'en doutez point; mais il faudra que ie m'en aille avec luy. Je l'asséuray de toute la recompense qu'il pouuoit esperer de nous, & me hastant de m'habiller, ie m'en allay avec luy toute seule à la chambre de mon frere. Il me falloit trauerser toute la court toute pleine de gens, qui auoiēt accoustumé de courir pour me voir & honorer. Lors chacun voyant comme la fortune me tournoit visage, eux aussi ne firent pas semblant de m'appercevoir. Entrant en la chambre de mon frere, ie le trouue avec vne si grande constance, qu'il n'auoit rien changé de sa façon, ny de sa tranquillité ordinaire. Me voyât, il me dist en m'embrassant avec vn visage plus joyeux que triste; Ma Reine, cessez ie vous prie vos larmes. En la condition que ie suis, vostre ennuy est la seule chose qui me pourroit affliger, car mon innocence & la droite intentiō que j'ay eüe m'empeschēt de craindre toutes les accusatiōs de mes ennemis. Que si injustement lon veut faire tort à ma vie, ceux qui feront cette cruauté se feront plus de tort qu'à moy, qui ay assez de courage & de resolution pour mépriser vne injuste mort. Aussi n'est ce ce que ie redoute le plus, ma vie ayant esté iusques icy accompagnée de

tant de trauerses & de peines, que ne sçachant
 que c'est des felicittez de ce monde, ie ne dois
 auoir regret de les abandonner. La seule appre-
 hension que i'ay, est, que ne me pouuant faire
 justement mourir, l'on me veuille faire languir
 en la solitude d'une longue prison, où encore
 ie mépriseray leur tyrannie, pourueu que vous
 me vouliez tât obliger que de m'assister de vo-
 stre preséce. Ces paroles au lieu d'arrester mes
 larmes me penserent faire verser toute l'hu-
 meur de ma vie. Ie luy responds en sanglottant
 que ma vie & ma fortune estoient attachées à
 la sienne; Qu'il n'estoit en la puissance que de
 Dieu seul d'empescher que ie l'assistasse en
 quelque condition qu'il pust estre: Que si on
 leinmenoit de là, & que l'on ne me permit
 d'estre avec luy, ie me tuërois en sa preséce.
 Passans en ces discours & recherchant ensem-
 ble l'occasion qui auoit conuié le Roy de pren-
 dre vne si cruelle & injuste aigreur contre luy,
 & ne nous la pouuans imaginer, l'heure vint
 de l'ouuerture de la porte du chasteau, où vn
 jeune homme indiscret, qui estoit à Buffi, é-
 tant reconnu par les gardes & arresté, ils luy
 demanderent où il alloit. Luy estonné & sur-
 pris, leur respond qu'il alloit trouer son mai-
 stre. Cette parole rapportée au Roy, l'on soup-
 çonne qu'il est dans le Louure, où l'aprédi-
 née reuenant de S. Germain mon frere l'auoit
 fait entrer parmi la troupe, pour conferer
 avec luy des affaires de l'armée qu'il faisoit
 pour la Flandre, ne pensât pas lors deuoir pa-
 rir si tost de la Cour comme depuis innopiné-

ment il se resolut. Le soir sur les occasions que j'ay dites, l'Archant Capitaine des gardes, ayant commandement du Roy de le chercher, & de se saisir de luy & de Simier, faisant cette perquisition à regret, pour estre intime ami à Buffi, duquel il estoit appellé par alliance son pere, & luy le nommoit son fils, il monte à la chambre de Simier, où il se saisit de luy; & se doutant bien que Buffi y estoit caché, il fait vne legere recherche, estant bien aise de ne le trouver pas. Mais Buffi, qui estoit sur le lit, & qui voyoit qu'il demeureroit seul en cette chambre, craignât que la cõmission fust donnée à quelque autre avec lequel il ne seroit en telle sureté, desirant plustost d'estre en la garde de l'Archant, qui estoit honneste homme & son amy; comme il estoit d'une humeur gaillarde & bouffonne, à qui les dangers & hazards n'a-voient iamais peu faire ressentir la peur, cõme l'Archant passoit la porte pour s'en aller emmenant Simier, il sort la teste du rideau & luy dit; Hé quoy, mon pere vous en voulez-vous ainsi aller sans moy? N'estimez-vous pas ma conduite plus honorable que celle de ce pendard de Simier? l'Archant se tourna, & luy dit; Ah, mon fils; pleust à Dieu qu'il m'eust cousté vn bras & que vous ne fussiez pas icy. Il luy répond; Mon pere, c'est signe que mes affaires se portent bien; allant toujours, se gaussant de Simier pour la tremblante peur où il le voyoit. L'Archant les mit en vne chãbre avec gardes, & s'en alla prendre Monsieur de la Chastre & le mena à la Bastille. Pendant que toutes ces

ehoses se faisoient, Monsieur de Loffe, bon homme vieil, qui auoit esté Gouverneur du Roy mon mary, & qui m'aimoit comme sa fille, ayant la garde de mon frere, connoissant l'injustice qu'on luy faisoit, & detestant le mauuais conseil par lequel le Roy se gouernoit, ayant enuie de nous obliger tous deux, se resout de sauuer mon frere; & pour me decourrir son intention, commande aux archers Escossois de se tenir sur le degré au dehors de la porte de mon frere, n'en retenant que deux avec soy en qui il se fioit, & me tirât à part me dist; Il n'y a bon François à qui le cœur ne saigne de voir ce que nous voyons. I'ay esté trop seruiteur du Roy vostre pere pour ne sacrifier ma vie pour ses enfans. Je crois que j'auray la garde de Monsieur vostre frere en quel lieu que l'on le tienne. Assëurez-le qu'au hazard de ma vie ie le sauueray. Mais afin que l'on ne s'apperçoieue de mon intention, ne parlôs plus ensemble; mais soyez-en certaine. Cette esperance me consoloit vn peu; & reprenant mon esprit, ie dis à mon frere que nous ne deuions point demeurer en cette forme d'inquisition sans sçauoir ce que nous auions fait; Que c'estoit à faire à des faquins d'estre tenus ainsi Je priay Monsieur de Loffe, puis que le Roy ne vouloit permettre que la Reyne ma mere montast, qu'il luy plust nous faire sçauoir par quelqu'un des siens la cause de nostre retention. Monsieur de Combaut, qui estoit Chef du Conseil d s jeunes gens, no^r fut enuoyé, qui avec sa grauité naturelle, nous dist qu'il estoit enuoyé ?

là pour ſçauoir ce que nous voulions faire entendre au Roy. Nous luy dîmes que nous deſirions de parler à quequ'un du Roy, pour ſçauoir l'occafion de noſtre retention, & que nous ne la pouuions imaginer. Il nous reſpond grauement, qu'il ne faut demander aux Dieux & aux Roys raiſon de leurs effets; Qu'ils faiſoient tout à bonne & juſte cauſe. Nous luy reſpondîmes que nous n'eſtions pas perſonnes pour eſtre tenuës comme ceux que l'on met à l'inquiſition à qui l'on fait deuiner ce qu'ils ont fait. Nous n'en pûmes tirer autre choſe, ſinon qu'il s'employeroit pour nous, & qu'il nous y feroit tous les meilleurs effices qu'il pourroit. Mon frere ſe prit à rire; mais moy qui eſtois toute conuertie en douleur, pour voir en danger mon frere que ie cheriſſois plus que moy meſme, j'eus beaucoup de peine à m'empêcher de luy parler comme il meritoit. Pendât qu'il faiſoit ſon rapport au Roy, la Reyne ma mere eſtant en ſa chambre avec l'affliction que l'on peut penſſer, qui comme perſonne tres-prudente preuoyoit bien que cét exeez fait ſans ſujet ny raiſon, pourroit, ſi mon frere n'auoit le naturel bon, apporter beaucoup de malheurs en ce Royaume, enuoya querir tous les vieux du Conſeil, Monſieur le Chancelier, les Princes, Seigneurs, & Mareſchaux de France, qui eſtoient tous merueilleuſement ſcandalizez du mauuais conſeil que l'on auoit donné au Roy, diſants tous à la Reyne ma mere qu'elle ſ'y deuoit oppoſer, & remonſtrer au Roy le tort qu'il ſe faiſoit,

Qu'on ne pouuoit empescher que ce qui auoit esté fait iusques alors ne fut; mais qu'il falloit r'habiller cela le mieux que l'on pourroit. La Reyne ma mere va soudain trouuer le Roy avec tous ses Ministres, qui luy remonstrent de qu'elle importance estoient ces effets. Le Roy ayant les yeux desillez du pernicieux conseil de ces jeunes gens, trouue bon que ces vieux Seigneurs & Conseillers le luy representēt, & prie la Reyne ma mere de r'habiller cela, & faire que mō frere oubliast tout ce qui s'estoit passé, & qu'il n'e sceust point mauuais gré à ces jeunes gens, que par mesme moyen l'accord de Bussi & de Quelus fust fait; Cela resolu, toutes les gardes furent soudain ostées à mon frere, & la Reyne ma mere le trouuant en sa chambre, luy dist qu'il deuoit loüer Dieu de la grace qu'il luy auoit faite de le deliurer d'un si grand danger; Qu'elle auoit veu l'heure qu'elle ne sçauoit qu'esperer de sa vie; Que puis qu'il connoissoit par cela que le Roy estoit de telle humeur qu'il s'offençoit, non seulement des effets; mais des imaginations, & qu'estant resolu en ses opinions, sans s'arrester à aucun aduis, ny d'elle ny d'autre, il exécutoit tout ce qu'il luy venoit en fantaisie, pour ne le jetter plus en ces aigreurs; cela le deuoit faire resoudre à s'accommoder en tout à sa volonté, & de venir trouuer le Roy, monstrent ne se ressentir point de ce qui s'estoit passé contre sa personne, & ne s'en souuenir point. Nous luy respondîmes que nous auions grandement à loüer Dieu de la grace qu'il nous auoit faite, de nous garantir de l'in-

justice que l'on nous preparoit , à quoy; après Dieu nous reconnoissons luy en auoir à elle toute l'obligation; mais que la qualité de mon frere ne permettoit pas que l'on le pût mettre en prison sans suiet, & l'en tirer sans formalité de justification & satisfaction. La Reyne respond; Que les choses faites, Dieu mesme ne pouuoit faire qu'elles ne fussent; mais que l'on r'habilleroit le desordre qui auoit esté à sa prise, en faisât sa deliurâce avec tout honneur & satisfaction qu'il pourroit desirer; Qu'aussi il falloit qu'il contentast le Roy en tout luy parlant avec tel respect & avec telle affection à son seruice, qu'il en demeurast content; & qu'il fit outre cela que Bussi & Queus s'accordassent, de sorte qu'il ne restast rien qui les pust brouiller, auoüant bien que le principal motif qui auoit produit ce mauuais conseil & ces mauuais effets, auoit esté la crainte que l'on auoit eu du combat que le vieil Bussi, digne pere d'un digne fils, auoit demandé, suppliant le Roy trouuer bon qu'il secondast son fils le braue Bussi, & que Monsieur de Quelus fust secondé du sien; qu'eux quatre finiroient cette querelle sans brouiller la Cour, comme elle auoit esté pour cette querelle, ny mettre tant de gens en peine. Mon frere luy promit que Bussi voyant qu'il n'y auoit point d'esperance de se battre, feroit pour sortir de prison ce qu'elle commanderoit. La Reyne ma mere descendant fit trouuer bon au Roy de faire sa deliurance avec honneur; & pour cét effet il vint en la chäbre de la Reyne ma mere,

avec tous les Princes , Seigneurs , & autres
 Conseillers de son Conseil , & nous enuoya
 querir par Monsieur de Villequier ; où comme
 nous allions trouuer sa Majesté, passans par les
 sales & chambres , nous les trouuâmes toutes
 pleines de gens qui nous regardoient la larme
 à l'œil , loüans Dieu de nous voir hors de
 danger. Entrans dans la chambre de la Reyne
 ma mere , nous trouuâmes le Roy avec cette
 compagnie que i'ay dite, qui voyant mon frere
 luy dist ; Qu'il le prioit de ne point trouuer
 estrange , & ne s'offenser point de ce qu'il
 auoit fait , poussé du zele qu'il auoit au repos
 de son Estat & qu'il crust qu'il n'auoit point
 esté avec intention de luy faire nul déplaisir ;
 Mon frere luy respond , qu'il deuoit & auoit
 vouié tant de seruice à sa Majesté, qu'il trou-
 uoit tousiours bon tout ce qu'il luy plairoit ,
 mais qu'il le suplioit tres - humblement de
 considerer que la deuotion & fidelité qu'il luy
 auoit tesmoignée ne meritoit pas vn tel trait-
 tement ; toutefois qu'il n'en accusoit que son
 mal-heur , & restoit assez satisfait si le Roy
 reconnoissoit son innocence. Le Roy luy res-
 pondit qu'oüy , qu'il n'en estoit point en dou-
 te , & qu'il le prioit de faire autant d'estat de
 son amitié qu'il auoit iamais fait. Sur cela la
 Reyne ma mere les prit tous deux & les fit em-
 brasser Soudain le Roy commanda que l'on fit
 venir Bussi pour s'accorder avec Quelus & que
 l'on mit en liberté Simier & Monsieur de la
 Chastre. Bussi entrât en la chambre avec cette
 belle façon qui luy estoit naturelle , le Roy luy

dist qu'il vouloit qu'ils'accordast avec Quelus & qu'il ne parlaist plus de leur querelle, & luy commonda d'embrasser Quelus. Bussi luy respond; Sire, s'il vous plaist que ie le baïse, j'y suis tout disposé, & accommodant les gestes avec la parole, luy fit vne embrassade à la pantalonne; dequoy toute la compagnie, bien qu'encore estonnée & saisie de ce qui s'estoit passé, ne se pût empescher de rire. Les plus aduisez jugerent que cette legere satisfaction que receuoit mon frere n'estoit vn appareil suffisant à vn si grand mal. Cela fait le Roy & la Reyne ma mere s'approchans de moy, me dirēt qu'il falloit que ie tinsse a la main ce que mon frere ne conseruast nulle souuenance qui le pût éloigner de l'obeïssance & affection qu'il deuoit au Roy; Je leur respondis que mon frere estoit si prudent, & auoit tant de deuotion à son seruice, qu'il n'auoit besoin d'y estre sollicité ni par moy ni par autre; mais qu'il n'auoir receu & ne receuroit iamais autre conseil de moy que ce qui seroit cōforme à leur volōté & à son deuoir. Estāt les trois heures après midi que persōne n'auoit encore disné, la Reyne maniere voulut que nous dīnassīōs tous ensemble, puis cōmanda à mō frere & à moi d'aller charger nos habits, qui étoiēt cōuenables à la triste conditiō d'oū nous étiōs presentement sortis; & nous aller parer pour nous trouuer au souper du Roy & au bal. Elle fut obeïe pour les choses qui se pouuoient deuētir & de remettre; mais pour le visage, qui est la viue image de l'ame, la passion du iuge mécontentement que nous a-

uions s'y lisoit aussi apparente qu'elle y auoit esté imprimée avec sa force & violence du dépit & juste dédain que nous ressentions par l'effet de tous les actes de cette tragi-comédie. Laquelle estant finie de cette façon le Cheualier de Seurre, que la Reine ma mere auoit baillé à mon frere pour coucher en sa chambre, & qu'elle prenoit plaisir d'ouïr quelquefois causer, pour estre d'humeur libre, & qui disoit de bonne grace ce qu'il vouloit, tenant vn peu de l'humeur d'vn Philosophe Cynique, se trouuât deuant elle, elle luy demande; Hé bien Monsieur de Seurre, que dites vous de tout cecy? C'est trop, dit il, pour faire à bõ escient, & trop peu pour se joüer; Et se tournant vers moy, sans qu'elle pût entendre, me dist; Je ne croy pas que ce soit icy le dernier acte de ce ieu, cét homme voulât parler de mon frere) me tromperoit bien s'il demeueroit là. Cette journée estant passée de cette façon, le mal ayant seulement esté adoucy par le dehors, & non par le dedans, les ieunes gens possédoient le Roy, iugant le naturel de mon frere par le leur, & leur iugement peu expérimenté ne permettant pas qu'ils pussent iuger ce que peut le deuoir & l'amour de la patrie sur vn Prince si grand & si bien né qu'il estoit, persuadant au Roy, pour tousiours ioindre leur cause à la sienne, que mon frere n'oublieroit iamais l'affront public qu'il en auoit receu, & s'en voudroit vanger. Le Roy sans se souuenir de l'erreur que luy auoient fait commettre ces ieunes gens, reçoit soudain cette seconde impression,

& commande aux Capitaines des Gardes que l'on prist soigneusement garde aux portes que mon frere ne sortist point, & que tous les soirs l'on fit sortir tous les gens de mon frere hors du Louure, luy laissant seulement ce qui couchoit d'ordinaire dans sa chambre, ou dans la garderobbe. Mon frere se voyant de cette façon estre a la misericorde de ces ieunes ceruelles, qui sans respect ny iugement faisoient disposer de luy au Roy comme il leur venoit en fantaisie, craignant qu'il ne luy auint pis, & ayant l'exemple tout recent de ce qui sans occasion ny raison luy auoit esté fait, ayant supporté trois iours l'apprehension de ce danger, se resolut de s'oster de là, pour se retirer chez luy, & ne reuenir plus à la Cour; mais auâcer ses affaires le plus promptement qu'il pourroit pour s'en aller en Flandre. Il me communique cette volonté, & voyant que c'estoit sa seurété & que le Roy ny cét Estat n'en pouuoient receuoir de prejudice, ie l'approuuay, & en cherchant les moyens, voyant qu'il ne pouuoit sortir par les portes du Louure, qui estoient si curieusement gardées, que mesme l'on regardoit tous ceux qui passoient au visage, il ne s'en trouua point d'autre que de sortir par la fenestre de ma chambre, qui regardoit dans le fossé, & estoit au second estage. Il me prie pour cét effet faire prouision d'un cable fort, & de la logueur necessaire. A quoy ie pouruois soudain, faisant emporter le iour mesme par un garçon qui m'estoit fidele vne male de lit qui estoit rompuë comme pour la faire racôûter,

& à

& à quelques heures de là la rapportant il y mit le cable qui nous estoit necessaire. L'heure de souper estant venue, qui estoit vn iour maigre que le Roy ne soupoit point, la Reyne ma Mere soupa seule en sa petite sale, & moy avec elle. Mon frere bien qu'il fut assez patient & discret en toutes ses actions, sollicité de la souuenance de l'affront qu'il auoit receu, & du danger qui le menaçoit, impatientant de sortir, s'y trouue comme ie me leuay de table, & me dît à l'oreille qu'il me prioit de me haster, & de venir tost à ma chambre où il se trouueroit. Monsieur de Matignon, qui n'estoit encore Marechal, vn dangereux & fin Normand qui n'aimoit point mon frere, en estant aduertypar quelqu'un, qui peut estre n'auoit pas bien tenu sa langue, où le coniecturant sur la façon dequoy m'auoit parlé mon frere, dit à la Reyne ma Mere comme elle entroit en sa chambre | ce que i'entreuis presque, estant assez près d'elle, & y prenant garde, & obseruant curieusement tout ce qui s'y passoit; comme font ceux qui se trouuent en pareil estat, & sur le point de leur déliurance sont agitez de crainte & d'esperance) que sans doute mon frere s'en vouloit aller; que demain il ne seroit plus là? qu'il le sçauoit tres-bien; & qu'elle y mit ordre. Je vis qu'elle se troubla à cette nouuelle; ce qui me donna encore plus d'apprehension que nous ne fussions descouverts. Nous entrâs en son cabinet, elle me tira à part, & me dit; Auez-vous veu ce que matignon m'a dit? Je luy dis, ie ne l'ay pas entendu, Madame; mais

i'ay veu que c'estoit chose qui vous donnoit peine. Oüy, ce dit-elle, bien forts; car vous sçavez que i'ay respondu au Roy que vostre frere ne s'en iroit point, & Matignon vient de me dire qu'il sçauoit tres-bien qu'il ne sera demain icy. Lors me trouuant entre ces deux extremités, ou de manquer à la fidelité que ie deuois à mon frere, & mettre sa vie en danger, ou de jurer contre la verité (chose que ie n'eusse voulu pour eiter mille morts) ie me trouay en si grande perplexité, que si Dieu ne m'eust assistée, ma façon eust assez témoigné sans parler, ce que ie craignoïs, qu'il fust découuert. Mais comme Dieu assiste les bonnes intentiōs, & sa diuine bonté operoit en cette œuvre pour sauuer mon frere, ie composay tellement mon visage, & mes paroles, qu'elle ne pût rien connoistre que ce que ie voulois, & que ie n'offensay mon ame ny ma conscience par aucun faux serment. Je luy dis donc si elle ne connoissoit pas bien la haine que M. de Matignon portoit à mon frere; Que c'estoit vn brouillon malicieux, qui auoit regret de nous voir tous d'accord; Que lors que mon frere s'en iroit i'en voulois répondre de ma vie; Que ie m'asseurois bien que ne m'ayant iamais rien celé, il m'eust communiqué ce dessein, s'il eust eu cette volonté. Ce que ie disois m'assurant bien que mon frere estant sauué l'on n'eust osé me faire déplaisir, & au pis aller, quand nous eussions esté découverts, j'aimois trop mieux engager ma vie que d'offenser mon ame par vn faux serment, & mettre la


vie de mon frere en hazard. Elle ne recher-
 chant pas de prés le sens de mes paroles me
 dist; Pensez bien à ce que vous dites; vous m'en
 ferez caution, & vous m'en répondrez sur vo-
 stre vie. Je luy dis en souûrant, que c'estoit ce
 que ie voulois, & luy donnant le bon soir ie
 m'en allay en ma chambre, où me deshabillant
 en diligence, & me mettant au lit pour me dé-
 faire de mes Dames & filles, estant restée seule
 avec mes femmes de chambre, mon frere vint
 avec Simier & Cange, & me releuant nous ac-
 cordasmes la corde avec vn baston, & ayant re-
 gardé dans le fossé s'il n'y auoit personne, é-
 tant seulement aidée de trois de mes femmes
 qui couchoient en ma chambre, & du garçon
 de la chambre qui m'auoit apporté la corde,
 nous descendons premierement mon frere,
 qui rioit & gaussoit, sans auoir aucune appre-
 hension; bien qu'il y eust vne tres grande hau-
 teur, puis Simier, qui tremblant ne se pouuoit
 presque tenir de peur, puis Cange son valet de
 chambre. Dieu conduisit si heureusement mon
 frere sans estre decouuert, qu'il se rendit à Sain-
 te Geneuiefue, où Bussi l'attendoit, qui du con-
 sentement de l'Abbé auoit fait vn trou à la mu-
 raille de la ville par lequel il sortit, & trouuant
 là des cheuaux tous prests, se retira à Angers
 sans aucune infortune. Comme nous descen-
 dions Cange le dernier, il se leue vn homme
 du fonds du fossé qui commence à courir vers
 le logis qui est auprès du jeu de paume, qui est
 le chemin où l'on va vers le corps de garde.
 Moy qui en tout ce hazard n'auois iamais ap-

prehédé ce qui estoit de mon particulier, mais seulement la seureté ou le danger de mon frere, demeuray demy pâmée de peur croyant que ce fut quelqu'un, qui suiuant l'aduis de Monsieur de Matignô eust esté mis là pour nous guetter, & estimant que mon frere fut pris, i'entray en vn desespoir qui ne se peut représenter que par l'essây des choses semblables. Estant en ces alteres mes femmes plus curieuses que moy de ma seureté & de la leur prennent la corde & la mettent au feu, afin qu'elle ne fut trouuée, si le mal-heur estoit si grand que cét homme qui s'estoit leué du fossé y eust esté mis pour guetter. Cette corde estant fort longue fait vne si grande flamme que le feu se met dans la cheminée; de façon que sortant par dessus le couuert, & estant apperceu des Archers qui étoient cette nuit - là en garde; ils viennent frapper effroyablement à ma porte, disans que l'on ouurit promptement. Lors bien que ie pensasse à ce coup - là que mon frere fut pris & que nous fussions tous deux perdus, ayant neantmoins esperé en Dieu, qui me conseruoit le jugement entier (grace qu'il a plû à sa diuine Majesté me faire en tous les dangers où ie me suis trouuée) voyant que la corde n'estoit qu'à demy brûlée, ie dis à mes femmes qu'elles allassent tout bellement à la porte demander ce qu'ils vouloient, parlant bas comme si i'eusse dormy; ce qu'elles font, & les Archers leur dirent que c'estoit le feu qui estoit à ma cheminée, & qu'ils venoient pour l'esteindre. Mes femmes leur dirent que ce n'estoit rien, & qu'el-

les l'esteindroient bien , & qu'ils se gardassent bien de m'esueiller, ils s'en vont L'allarme passée, à deux heures de là voicy Monsieur de Lossé qui me vient querir pour aller trouuer le Roy & la Reyne ma mere pour leur rēdre raison de la sortie de mon frere , en ayant esté aduertis par l'Abbé de Sainte Geneuiefue, qui pour n'estre embrouillé , & du consentement mesme de mon frere , lors qu'il vit qu'il estoit assez loing pour ne pouuoir estre attrapé , en vint aduertir le Roy , disant qu'il l'auoit súpris en sa maison , & que l'ayant tenu enfermé iusques à ce qu'ils eussent fait leur trou , il n'auoit puft plustost en venir aduertir le Roy : Il me trouua au lit , car c'estoit la nuit , & me leuant soudain avec mon manteau de nuit. Vne de mes femmes , indiscrete & effrayée se prend à mon manteau, en criant & pleurant, disant que ie n'en reuiendrois iamais ; Monsieur de Lossé medist, si cette femme auoit fait ce trait deuant vne personne qui ne vous fut pas seruiteur , comme ie suis , cela vous mettroit bien en peine, mais ne craignez riē & loüés Dieu, car Monsieur vostre frere est sauué. Ces paroles me furent vne aduertissement bien necessaire pour me fortifier contre les menaces & intimidations que i'auois à souffrir du Roy , que ie trouuay assis au cheuet du lit de la Reyne ma mere en vne telle colere que ie croy qu'il me l'eust fait ressentir , si la crainte de l'absence de mon frere , & la presence de la Reyne ma mere ne l'en eust empesché. Ils me dirent tous deux que ie leur auois dit que mon frere ne s'en iroit point,

& que ie leur en auois respondu : ie leur dis qu'oüy, mais qu'il m'auoit trompé en cela comme eux ; Que toutesfois ie leur respondois à peine de ma vie, que son parlement n'apporterait aucune alteration au seruice du Roy, & qu'il s'en alloit seulement chez luy pour donner ordre à ce qui luy estoit necessaire pour son entreprise de Flandre. Cela adoucit vn peu le Roy, & me laissa retourner à ma chambre ; Il eut bien-tost nouuelle de mon frere, qui l'asseuroient de sa volonté telle comme ie luy auois dit; ce qui fit cesser la plainte, non le mécontentement, monstrant en apparence d'y vouloir ayder; mais en effet trauersant sous main les apprests de son armée pour Flandre.





L I V R E

T R O I S I E S M E.



E temps s'estant passé de cette façon ; moy pressant à toute heure le Roy de me vouloir permettre d'aller trouver le Roy mon mary, luy voyant ne me le pouvoir refuser, & ne voulant que ie partisse mal satisfaite, desirant outre cela infiniment de me separer de l'amitié de mon frere, il m'obligea par toutes sortes de bien - faits, me donnant suiuant la promesse que la Reyne ma mere m'en auoit faite à la paix de Sens, l'assignat de mon dot en terres, & outre cela la nomination des offices & benefices. Et outre la pension qu'il me donnoit telle que les filles de France ont accoustumé d'auoir, il m'en donna encore vne de l'argent de ses coffres; prenant la peine de me venir voir tous les matins, & me representant combien son amitié me pouoit estre vtile; que celle de mon frere me causeroit enfin ma ruine, & que la sienne me pouoit faire viure bien - heureuse, & mille autres raisons tendantes à cette fin. En quoy

iamais elle ne pust esbranler la fidelité que i'auois vouée à mon frere , & ne pût tirer autre chose de moy , sinon que mon plus grand desir estoit de voir mon frere en sa bonne grace ; Qu'il me sembloit qu'il n'auoit pas merité d'en estre esloigné , & que ie m'asseurois qu'il s'efforceroit de s'en rendre digne par toute sorte d'obeïssance , & de tres-humble seruice ; Que pour moy ie ressentois d'estre obligée à luy de tant d'honneur & de biens qu'il me faisoit ; Qu'il se pouuoit bien assurer qu'estant aupres du Roy mon mary , ie ne manquerois nullement aux commandemens qu'il luy plairoit me faire , & que ie ne trauaillerois à autre chose qu'à maintenir le Roy mon mary en son obeïssance. Mon frere estant lors sur son partement de Flandre , la Reyne ma Mere le voulut aller voir à Alençon auant qu'il partist. Je suppliy le Roy de trouuer bon que ie l'y accompagnasse pour luy dire adieu. Ce qu'il me permit , bien qu'à regret. Reuenus que nous fusmes d'Alençon, ayant toutes choses prestes pour mon partement , ie suppliy encore le Roy de me laisser aller. La Reyne ma Mere qui auoit aussi vn voyage à faire en Gascogne pour le seruice du Roy , [ce pais-là ayant besoin de luy ou d'elle] elle se resolut que ie n'irois pas sans elle. Et partans de Paris le Roy nous mena à son Dolinville , où apres nous auoir traittez quelques iours , nous prîmes congé de luy , & dans peu de temps nous fusmes en Guienne , où dès que nous entraîmes dans le Gou-

uernement du Roy mon mary , l'on me fit entrée par tout. Il vint au deuant de la Reyne ma Mere iusques à la Reolle , ville que ceux de la Religion tenoient pour la deffiance qui estoient encore alors , le pais n'estant encore bien estably ne luy ayant pû permettre de venir plus outre. Il y estoit tres-bien accompagné de tous les Seigneurs & Gentils-hommes de la Religion de Gascongne , & de quelques Catholiques. La Reine ma Mere pensoit y demeurer peu de temps ; mais il survinst tant d'accidens , & du costé des Huguenots , & de celuy des Catholiques , qu'elle fust contrainte de demeurer dix-huit mois. Et en estant faschée , elle voulut quelquefois attribuer que cela se faisoit artificieusement pour voir plus long temps ses filles, pource que le Roy mon mary estoit devenu fort amoureux de Dayelle , & Monsieur de Thurene de la Vergue ; ce qui n'empeschoit pas que ie ne receusse beaucoup d'honneur & d'amitié du Roy , qui m'en témoignoit autant que i'en eusse pû desirer, m'ayant dès le premier iour conté tous les artifices que l'on luy auoit faits pendant qu'il estoit à la Cour, pour nous mettre mal ensemble. Ce qu'il reconnoissoit bien auoir esté fait seulement pour rompre l'amitié de mon frere & de luy, & pour nous ruiner tous trois ; montrant auoir beaucoup de contentement que nous fussions ensemble. Nous demeurâmes en cette heureuse condition tant que la Reine ma Mere fut

en Cascoigne ; laquelle après auois establi la paix changea de Lieutenant de Roy à la priere du Roy mon mary , ostant Monsieur le Marquis de Villars pour y mettre Monsieur le Marechal de Biron. Elle passant en Languedoc , nous la conduisimes iusques à Castelnaudary , où prenans congé d'elle nous nous en reuinimes à Pau en Bearn , où n'ayant nul exercice de la Religion Catholique , l'on me permit seulement de faire dire la Messe en vne petite Chapelle qui n'a que trois ou quatre pas de long , qui estant fort étroitte estoit pleine quand nous y estions sept ou huit. A l'heure que l'on vouloit dire la Messe l'on leuoit le pont du Chasteau , de peur que les Catholiques du pais ; qui n'auoient aucun exercice de la Religion , l'oüysent. Car ils estoient infiniment desirieux de pouuoir assister au saint sacrifice , de quoy ils estoient depuis plusieurs années priez ; & pousséz de ce saint & juste desir , les habitans de Pau trouuerent moyen le iour de la Pentecoste auant que l'on leuast le pont d'entrer dans le Chasteau , se glissans dans la Chapelle , où ils n'auoient point esté découverts jusques sur la fin de la Messe , qu'en s'ouvrans la porte pour laisser entrer quelqu'un de mes gens , quelques Huguenots qui espioient à la porte les apperceurent , & l'allerent dire au Pin , Secretaire du Roy mon mary , (lequel possedoit infiniment son Maistre , & auoit grande autorité en sa maison , menant toutes les affaires de ceux de la Re-

ligion) lequel y enuoya des gardes du Roy mon mary, qui les tirans hors, & les battant en ma presence, les menerent en prison, où ils furent long-temps, & payerent vne grosse amende. Cette indignité fut ressentie infiniment de moy, qui n'attendois rien de semblable. Le m'en allay plaindre au Roy mon mary, le suppliant faire lascher ces pauvres Catholiques, qui n'auoient point mérité vn tel chastiment, pour auoir voulu, après auoir esté si long-temps priuez de l'exercice de nostre Religion, se preualoir de ma venue pour rechercher le iour d'vne si bonne Feste d'ouïr la Messe. Le Pin se mit en tiers, sans y estre appellé, & sans porter ce respect à son Maistre de le laisser répondre, prend la parole, & me dist que ie ne rompis point la teste au Roy mon mary de cela, car quoy que j'en peusse dire il n'en seroit fait autre chose; Qu'ils auoient bien mérité ce que l'on leur faisoit, & que pour mes paroles, il n'en seroit rien ni plus ni moins; Que ie me contentasse quel'on me permettoit de faire dire vne Messe pour moy, & pour ceux de mes gens que j'y voudrois mener. Ces paroles m'offenserent beaucoup d'vn homme de telle qualité, & suppüay le Roy mon mary, si j'estois si heureuse d'auoir quelque part en sa bonne grace, de me faire connoistre qu'il ressenoit l'indignité qu'il me voyoit receuoir par ce petit homme, & qu'il m'en fist raison. Le Roy mon mary voyant que ie m'en passionnois just-

rement, le fit sortir & oster de deuant moy; me disant qu'il estoit fort marry de l'indiscretion de du Pin, & que c'estoit le zele de sa Religion qui l'auoit transporté à cela, & qu'il m'en feroit telle raison que ie voudrois; Que pour les prisonniers Catholiques, il auiseroit avec ses Conseillers du Parlement de Pau, ce qui se pouuoit faire pour me contenter. M'ayant ainsi parlé, il alla apres en son Cabinet où il trouua le Pin, qui apres auoir parlé à luy, le changea tout. De sorte que craignant que ie le requisse de luy donner congé, il me fuit; & me fait la mine. Enfin voyant que ie m'opiniaistrois à vouloir qu'il chassast du Pin ou moy, celui, qui luy seroit le plus agreable, tous ceux qui estoient-là, & qui haïssoient le Pin, luy dirent qu'il me deuoit mécontenter pour vn tel homme, qui m'auoit tant offensée, que si cela venoit à la connoissance du Roy & de la Reyne ma Mere, ils trouueroient fort mauuais qu'il l'eut souffert, & tenu près de luy. Ce qui le contraignit enfin de luy donner congé. Mais il ne laissa à continuer de me faire du mal, & de m'en faire la mine, y estant, à ce qu'il m'a dit depuis, persuadé par Monsieur de Pi-brac, qui jouïoit au double, me disant à moy que ie ne deuois souffrir d'estre brauée d'un homme de peu comme celuy-là, & quoy que ce fust qu'il falloit que ie le fisse chasser; & disant au Roy mon mary qu'il n'y auoit apparence que ie le priuasse du seruice d'un homme qui luy estoit si nécessaire. Ce que Mon-

sieur de Pibrac faisoit pour me contraindre à force de déplaisirs de retourner en France , où il estoit attaché en son Estat de President & de Conseiller ou Conseil du Roy. Et pour empirer encore ma condition depuis que Dayelle s'estoit esloignée , le Roy mon mary s'estoit mis à rechercher Rebours , qui estoit vne fille malicieuse , qui ne m'aimoit point, & qui me faisoit tous les plus mauuais offices qu'elle pouuoit en son endroit. En ces trauerses ayant tousiours recours à Dieu , il eut enfin pitié de mes larmes , & permit que nous partissions de ce petit Geneue de Pau où de bonne fortune pour moy , Rebours y demeura malade , laquelle le Roy mon mary perdant des yeux , perdit aussi d'affection , & commença à s'embarquer avec Fosseuse , qui estoit plus belle pour lors , tout enfant & toute bonne. Dressans nostre chemin vers Montauban, nous passâmes par vne petite ville nommée Eause , & la nuit que nous y arriuasmes , le Roy mon mari tomba malade d'une grande fièvre continuë , avec vne extrême douleur de teste qui luy dura dix-sept iours , durant laquelle il n'auoit repos ni iour ni nuit, & le falloit perpetuellement changer de lit à autre. Je me rendis si sujette à le seruir , ne me partant iamais d'auprès de luy , & sans me des-habiller, qu'il commença à auoir agreable mon seruice, à s'en louer à tout le monde ; & particulièrement à mon cousin Monsieur qui me rendant office de bon parant , me remit aussi bien auprès de luy que

jamais j'auois esté. Felicité qui me dura l'es-
 pace de quatre ou cinq ans que ie fus en
 Gascogne avec luy; faisant la pluspart de ce
 temps-là nostre séjour à Nerac, où nostre
 Cour estoit si belle que nous n'en auions
 point celle de France, y ayant Madame la
 Princesse de Nauarre sa sœur, qui depuis a
 esté mariée à Monsieur le Duc de Bar, &
 & moy, avec bon nombre de Dames & filles,
 & le Roy mon mary estant suivi d'une belle
 troupe de Seigneurs & Gentils-hommes, aus-
 si honnestes gens que les plus galants que
 j'aye veu à la Cour; & n'y auoit rien à re-
 gretter en eux sinon qu'ils estoient Hugue-
 nots. Mais de cette diuersité de Religion il
 ne s'en oyoit point parler, le Roy mon mary
 & Madame la Princesse sa sœur allants d'un
 costé au Presche, & moy & mon train à la
 Messe en une Chapelle qui est dans le parc;
 d'où comme ie sortois nous nous rassemblions
 pour nous aller promener ensemble, ou dans
 un tres-beau jardin, qui a des allées de lau-
 riers & de ciprez fort longues, ou dans le
 parc que j'auois fait faire, en des allées de
 trois mille pas qui sont au long de la riuere;
 & le reste de la journée se passoit en toutes
 sortes de plaisirs honnestes, le bal se tenant
 d'ordinaire l'aprèsdinée & le soir. Le Roy
 seruoit Fosseuse, qui dépendant du tout de
 moy, se maintenant avec tant d'honneur &
 de vertu, que si elle eust ioujours continué de
 cette façon elle ne fust tombée au malheur,
 qui depuis luy en a tant apporté & à moy aus-

fi. Mais la fortune enuieuse d'une si heureuse vie, qui sembloit en la tranquillité & union où nous nous maintenions mépriser sa puissance, excita nouveau sujet de guerre entre le Roy mon mary, & les Catholiques, rendant le Roy mon mary & Monsieur le Marechal de Biron, qui auoit esté mis en cette charge de Lieutenant de Roy en Guyenne, à la requeste des Huguenots; tant ennemis, que quoy que ie püsse faire pour les maintenir bien ensemble, le Roy mon mary & luy, ie ne pûs empescher qu'ils ne vinssent à une extrême deffiance & haine, commençans à se plaindre l'un de l'autre au Roy; le Roy mon mary mandant que l'on luy ostast Monsieur le Marechal de Biron de Guyenne, & Monsieur le Marechal taxant mon mary & ceux de la Religion pretenduë d'entreprendre plusieurs choses contre le Traité de la Paix. Ce commencement de des-union s'allant toujours accroissant à mon grand regret, sans que j'y püsse remedier. Monsieur le Marechal de Biron conseille au Roy de venir en Guyenne, disant que sa présence y apporteroit vn ordre; de quoy les Huguenots estans aduertis, creurent que le Roy venoit seulement pour les desemparer de leurs villes & s'en saisir, ce qui les fit resoudre à prendre les armes; qui estoit tout ce que ie craignois, moy estant embarquée à courir la fortune du Roy mon mary, & par consequent me voir en vn party contraire à celuy du Roy & à celuy de ma Religion. I'en parlay au

Roy mon mary pour l'en empêcher & à tous ceux de son Conseil , leur remon-
strant combien peu auantageuse leur pour-
roit estre cette guerre où ils auoient vn Chef
contraire , tel que Monsieur le Marechal
de Biron ; grand Capitaine & fort animé
contr'eux , qui ne les feindroit pas , & ne
les épargneroit pas comme auoient fait d'au-
tres ; Que si la puissance du Roy estoit em-
ployée contre eux avec intention de les ex-
terminer tous , ils n'estoient pas pour y re-
sister ; mais la crainte qu'ils auoient de la ve-
nuë du Roy en Guyenne, & l'esperance de plu-
sieurs entreprises qu'ils auoient sur la pluspart
des Villes de Gascogne & de Languedoc , les y
poussoit tellement , qu'encores que le Roy me
fist cét honneur d'auoir beaucoup plus de créa-
ce & de fiance en moy , & que les principaux
de la Religion m'estimassent auoir quelque iu-
gement , ie ne pûs pourtant leur persuader ce
que bien-tost après ils reconnurent à leurs dé-
pens estre vray, il fallut laisser passer ce torrét ,
qui allentit bien-tost son cours, quand ils vin-
rent à l'experience de ce que ie leur auois pre-
dit. Long-temps deuant que l'on vint à ces ter-
mes, voyant que les choses s'y dispoisoient, i'en
auois souuent aduertiy le Roy & la Reyne ma
mere pour y remedier , en donnant quelque
contentement au Roy mon mary; mais ils n'en
auoient tenu conte, & sembloient qu'ils fussent
bien aise que les choses en vinsent là ; estans
persuadez par le feu Marechal de Biron qu'il
auoit moyen de reduire les Huguenots aussi

bas qu'il voudroit. Mes aduis negligez, peu à peu les aigreurs se vont augmentant; de sorte qu'ils en viennent aux armes; Mais ceux de la Religion Pretendue Reformée s'estans de beaucoup mescontez aux forces qu'ils faisoient estat de mettre ensemble, le Roy mon mary se trouue plus foible que le Marechal de Biron; mesmes toutes leurs entreprises estans faillies, fors celle de Cahors qu'ils prindrent par petars, avec perte de beaucoup de gens, pour y auoir Monsieur de Vezins combattu l'espace de deux ou trois iours, leur ayant disputez ruë apres ruë, & maison, apres maison où le Roy mon mary fit paroistre sa prudence & valeur; non comme Prince de sa qualité, mais comme vn prudent & hazardeux Capitaine, Cette prise les affoiblit plus qu'elle ne les fortifia. Le Marechal de Biron prenant son temps tint la campagne, attaquant & emportant toutes les petites villes qui tenoient pour les huguenots, & mettant tout au fil de l'espee. Dès le commencement de cette guerre, voyant que l'honneur que le Roy mon mary me faisoit de m'aymer, me commandoit de ne l'abandonner, ie me resolus de courir sa fortune, non sans extrême regret de voir que le motif de cette guerre fut tel, que ie ne pouuois souhaiter l'auantage de l'un ou de l'autre, que ie ne souhaitasse mon dommage; Car si les Huguenots auoient du meilleur, c'estoit la ruine de la Religion Catholique; de qui i'affectionnois la conseruation plus que ma propre vie. Si aussi

les Catholiques, auoient l'auantage sur les Huguenots ie voyois la ruine du Roy mon mary. Retenuë neantmoins auprès de luy par mon deuoir, & par l'amitié & fiance qu'il luy plaisoit me monstrier, l'escriuois au Roy & à la Reyne ma mere l'estat en quoy ie voyois les affaires de ce pays-là, pour en auoir esté les aduis que ie leur en auois dōnez negligez; Que ie les suppliois, si en ma consideration ils me vouloient tant obliger que de faire esteindre ce feu au milieu duquel il me voyois exposé, qu'au moins il leur plust commander à Monsieur le Marechal de Biron, que la ville où ie faisois mon sejour fut tenuë en neutralité, & qu'à trois lieues près de là il ne se fist point la guerre, & que i'en obtiendrois autant du Roy mon mary pour le party de ceux de la Religion. Cela me fut accordé du Roy pourueu que mon mary ne fut point dans Nerac: mais que lors qu'il y seroit la neutralité n'auroit point de lieu. Cette condition fut obseruée de l'un & de l'autre party avec autant de respect que i'eussè pû desirer. Mais elle n'empescha pas que le Roy mon mary ne vint souuent à Nerac, où nous estions Madame sa sœur & moy, estant son naturel de se plaire parmy les Dames, mesmes estant lors fort amoureux de Fossi use qu'il auoit tousiours seruie depuis qu'il quitta Rebours, de laquelle ie ne receuois nul mauuais office, & pour cela le Roy mon mary ne laissoit de viure en pareille priuauté & amitié, voyant que ie ne desirois que de le contenter en toutes choses. Toutes ces considerations l'ayant vn iour

amené à Nerac avec ses troupes , il y seiourna trois iours , ne pouuant se départir d'une compagnie & d'un séjour si agreable. Le Marechal de Biron qui n'esploit qu'une telle occasion , en estant aduerty, feint de venir avec son armée près de là , pour joindre à un passage de riuere Monsieur de Cornuillon, Senechal de Tolose , qui luy amenoit des troupes , & au lieu d'aller là tourne vers Nerac , & sur les neuf heures du matin se presente avec toute son armée en bataille , près & à la volée du canon. Le Roy mon mary qui auoit eu aduis dès le soir de la venue de Monsieur de Cornuillon , voulant les empescher de se joindre , & les combattre separez , ayant forces suffisantes pour ce faire ; (car il auoit Monsieur de la Rochefoucault avec toute la noblesse de Xaintonge , & bien huit cens harquebusiers à cheual qu'il luy auoit amenez) estoit party du matin au point du iour, pensant les rencôtrer sur le passage de la riuere. Mais les ayant fallly pour n'auoir esté bien aduerty , Monsieur de Cornuillon ayant dès le soir de deuant passé la riuere , il s'en reuint à Nerac. Et comme il entroit par une porte , il sçeuist le Marechal de Biron estre en bataille deuant l'autre. Il faisoit ce iour - là un fort mauuais temps , & une si grande pluye que l'harquebuserie ne pouuoit seruir. Neantmoins le Roy mon mary jette quelques troupes des siennes dans les vignes , pour empescher que le Marechal de Biron n'approchast plus près. N'y ayant moyen , à cause de l'extreme pluye

qu'il faisoit ce iour - là de faire autre effet , le Marechal de Biron demeurant cependant en bataille à nostre veuë , & laissant seulement débander deux ou trois des siens qui vinrent demander des coups de lance pour l'amour des Dames , se tenoit ferme , couurant son artillerie iusques à ce qu'elle fust preste à tirer , Puis faisant soudain fendre sa troupe , fait tirer sept ou huit volées de canon dans la ville , dont l'un donna iusques au Chasteau , & ayant fait cela , par de là , & se retirer , m'en-uoyant vn trompette pour s'excuser à moy , & me mandant que si i'eusse esté seule , il n'eust pour rien du monde entrepris cela ; mais que ie scaüois qu'il auoit esté dit en la neutralité qui auoit esté accordée par le Roy , que si le Roy mon mary estoit à Nerac , la neutralité n'auroit point de lieu , & qu'il auoit commandement du Roy de l'attaquer en quelque lieu qu'il fut. En toutes autres occasions Monsieur le Marechal de Biron m'auoit rendu beaucoup de respect , & tesmoigné de m'estre ami ; car luy estant tóbé de mes lettres entre les mains durât la guerre , il me les auoit renuoyées toutes fermées , & tous ceux qui se disoient à moy , ne receuoient de luy qu'honneur & bon traitement. Je respondis à son Trompette , que ie scauois que Monsieur le Marechal ne faisoit en cela que ce qui estoit du deuoir de la guerre & du commandement du Roy ; mais qu'un homme prudent comme il estoit , pouoit bien satisfaire & à l'un & à l'autre , sans offenser ses amis ; Qu'il me pouoit

bien laisser joiÿr ces trois iours de contentement de voir le Roy mon mary à Nerac ; Qu'il ne pouuoit l'attaquer en ma presence sans s'attaquer à moy ; que i'en estois fort offensée , & que ie m'en plaindrois au Roy. Cette guerre dura encore quelque temps , ceux de la Religion ayans tousiours du pire , ce qui m'aydoit à disposer le Roy mon mary à vne paix. I'en écriuis souuent au Roy & à la Reyne ma mere , mais il n'y vouloit point entendre, se fiant en la bonne fortune qui iusques alors auoit accompagné Monsieur le Marechal de Biron. En mesme temps que cette guerre commença , la Ville de Cambray , qui estoit depuis mon partement de France mise en l'obeissance de mon frere , par le moyen de Monsieur d'Ainsi , duquel i ay parlé cy-deuant , fut assiegée des forces Espagnoles ; Dequoy mon frere, qui estoit chez luy au Plessis lez Tours , fut auerty (lequel estoit depuis peu reuenu de son voyage de Flandre ; où il auoit receu les Villes de Mons, Valenciennes , & autres qui estoient du gouvernement du Comte de Lalain , qui auoit pris le party de mon frere , le faisant reconnoistre pour Seigneur en tous les pays de son authoité. Mon frere le voulant secourir , fait soudain leuer des gens pour mettre sus vne armée pour s'y acheminer , Et pour ce qu'elle ne pouuoit estre si tost preste, il y fait ietter Monsieur de Balagny pour soustenir le siege , attendant qu'avec son armée il le pût faire leuer. Comme il estoit sur ces apprests, & qu'il com

mençoit d'auoir vne partie des forces qui luy estoient nécessaires, cette guerre des Huguenots interuint, qu'il fit débander tous ses Soldats pour se mettre aux compagnies de l'armée du Roy qui venoit en Gascogne. Ce qui osta à mon frere toute esperance de secourir Cambray, lequel ne se pouuoit perdre qu'il ne perdist tout le reste du pays qu'il auoit conquis, & ce qu'il regrettoit le plus, Monsieur de Balagny & tous les honnestes gens qui s'estoient iettez dans Cambray. Ce déplaisir luy fut extrême; & comme il auoit vn grand iugement, & qu'il ne manquoit iamais d'expedient, en ses aduersitez, voyant que le seul remede eust esté de pacifier la France, luy qui auoit vn courage qui ne trouuoit rien de difficile, entreprend de faire la paix, & despeche soudain vn Gentil-homme au Roy pour le luy persuader, & le supplier de luy donner la charge de la traiter: ce qu'il faisoit craignant que ceux qui eussent esté commis, ne l'eussent fait tirer en telle longueur qu'il n'eust plus eu moyen de secourir Cambray; où Monsieur de Balagny s'estant ietté cōme j'ay dit, manda à mon frere qu'il luy donneroit le temps de six mois pour le secourir. Mais que si dans ce temps-là l'on ne faisoit leuer le siege, la necessité de viures y seroit telle qu'il n'y auroit moyen de contenir le peuple de la ville, & de l'empescher de se rendre. Dieu ayant assisté mon frere au dessein qu'il auoit de persuader le Roy à la paix, il agréa l'office que luy faisoit mon frere de s'employer à la traiter, estimant par ce moyen de

le détourner son entreprise de Flandre qu'il n'auoit iamais eue agreable, & luy donna la commission de traiter & faire cette paix, luy mandant qu'il luy enuoyeroit pour l'assister en cette negotiation Messieurs de Villeroy & de Bellicure. Cette commission reüssit si heureusement à mon frere, que venant en Gascogne (où il demeura sept mois pour cet effet, qu'il luy durèrent beaucoup plus, pour l'enuie qu'il auoit d'aller secourir Cambray, encore que le contentement qu'il auoit que nous fussions ensemble luy adoucist l'aigreur de ce soing) il fit la paix au contentement du Roy & de tous les Catholiques, laissant le Roy mon mary & les Huguenots de son party non moins satisfaits; y ayant procedé avec telle prudence qu'il en demeura loué & aymé de tous; & ayant en ce voyage acquis ce grád Capitaine Monsieur le Marechal de Biron, qui se voüa à luy pour prendre la charge de son armé de Flandre, & lequel il retiroit de Gascogne pour faire plaisir au Roy mon mary qui eût en son lieu Mōsieur le Marechal de Matignon. Auāt que mon frere partist, il desira faire l'accord du Roy mon mary & de Monsieur le Marechal de Biron, pourueu qu'à la premiere veüe il me fit satisfaction par vne hōeste excuse de ce qui s'estoit passé à Nerac, & me commanda de le brauer avec toutes le rudes & desdaigneuses paroles que ie pourrois. I'vsay de ce commandement passionné de mon frere avec la discretion requise en telles choses, sçachant bien qu'un iour il en auroit regret, pouuant beaucoup esperer

d'assistance d'un tel caualier. Mon frere s'en retournant en France accompagné de Monsieur le Marechal de Biron avec non moins d'honneur & de gloire d'auoir pacifié un si grand trouble au contentement de tous, que de toutes les victoires que par armes il auoit eues, il en fit son armée encore plus grande & plus belle. Mais que la gloire & le bonheur est tousiours suiuy d'enuie ! Le Roy n'y prenant point de plaisir, & en ayant eu aussi peu des sept mois que mon frere & moy auions demeuré ensemble en Gascogne traittans la paix, pour trouuer un obiet à son ire, s' imagine que i'auois fait naistre cette guerre, y ayant poussé le Roy mon mary (qui peut bien témoingner le contraire pour donner l'honneur à mon frere de faire la paix ; laquelle, si elle eust dépendu de moy ; il l'eust eue avec moins de temps & de peine, car ses affaires de Flandre & de Cambray receuoient un grand prejudice de son retardement. Mais quoy, l'enuie & la haine fascinent les yeux, & font qu'ils ne voyent iamais les choses telles qu'elles sont, Le Roy bastillât sur ce faux fondement vne hayne mortelle contre moy, & faisant reuiure en sa memoire la souuenance du passé, (comme durant qu'il estoit en Pologne & de puis qu'il en estoit reuenu i'auois tousiours embrassé les affaires & le contentement de mon frere plus que le sien) joignant tout cela ensemble il iura ma ruine & celle de mon frere. En quoy la fortune fauorisa son animosité, faisant que durant les sept mois que mon frere fut en Gascogne, le mal-

heur

heur fut tel pour moy qu'il deuint amoureux
 de Fosseuse, que le Roy mon mary seruoit,
 comme i'ay dit depuis qu'il eut quitté Rebours.
 Cela pensa conuier le Roy mon mary à me
 vouloir mal, estimant que i'y fisse de bons
 offices pour mon frere contre luy. Ce qu'ayant
 reconnu, ie priay tant mon frere, luy re-
 montrant la peine où il me mettoit par cette
 recherche, que luy, qui affectionnoit plus
 mon contentement que le sien, força sa passion
 & ne parla plus à elle. Ayant remedié de ce
 costé-là, la fortune, laquelle quand elle com-
 mence à poursuiure vne personne ne se rebute
 point pour le premier coup que l'on luy fait
 teste, me dresse vne autre embusche bien plus
 dangereuse, faisant que Fosseuse, qui ay-
 moit extrêmement le Roy mon mary, & qui toute-
 fois iusques alors ne luy auoit permis que les
 priuantez que l'honnesteté peut permettre,
 pour luy oster la ialousie qu'il auoit de mon
 frere, & luy faire reconnoistre qu'elle n'ai-
 moit plus que luy, s'abandonne tellement
 à le contenter en tout ce qu'il vouloit d'elle,
 que le malheur fut si grand qu'elle deuint
 grosse. Lors se sentant en cét estat, elle chan-
 gea toute sorte de proceder avec moy, & au-
 lieu qu'elle auoit accoustumée d'y estre libre,
 & de me rendre aupres du Roy mon mary tous
 les bons offices qu'elle pouuoit, elle com-
 mença à se cacher de moy, & à me rendre au-
 tant de mauuais offices qu'elle m'en auoit fait
 de bons. Elle possedoit de sorte le Roy mon
 mari, qu'en peu de temps ie le conneus tout

changé. Il s'estrangeoit de moy, il se cachoit, & n'auoit plus ma presence si agreable qu'il auoit eu les quatre ou cinq heurieuses années que i'auois passées avec luy en Gascogne pendant que Fosseuse s'y gouuernoit avec honneur. La paix faite que i'ay ditte, mon frere s'en retournant en France pour faire son armée, le Roy mon mari & moy nous en retournasmes à Nerac, où soudain que nous fumes arriuez Fosseuse luy met en la teste, pour trouuer vne couüerture à sa grosseſſe, ou bien pour se deffaire de ce qu'elle auoit, d'aller aux eaux de Aigues-caudes qui sont en Bearn. Je suppliy le Roy mon mary de m'excuser si ie ne l'accompagnois à Aigues-caudes; qu'il ſçauoit que depuis l'indignité que i'auois receüe à Pau, i'auois fait vn serment de n'entrer iamais à Bearn que la religion Catholique n'y fust. Il me pressa fort d'y aller, iusques à s'en courroucer. Enfin ie m'en excuse. Il me dit alors que sa fille (car il appelloit ainsi Fosseuse) auoit besoin d'en prendre pour le mal d'estomach qu'elle auoit. Je luy dis que ie voulois bien qu'elle y allast. Il me respond qu'il n'y auoit point d'apparence qu'elle y allast sans moy; que ce seroit faire penser mal où il n'y en auoit point; & se fascha fort contre moy de ce que ie ne la voulois point mener. Enfin ie fis tant qu'il se contenta qu'il allast avec elle deux de ſes compagnes, qui furent Rebours & Villeſauin, & la gouuernante. Elles s'en allerent avec luy, & moy i'attendis à Bauiere. I'auois tous les iours

avis de Rebours qui estoit celle qu'il auoit aimée ; & estoit vne fille corrompue & double , qui ne desiroit que de mettre Fosseuse dehors , pensant tenir sa place en la bonne grace du Roy mon mary , que Fosseuse me faisoit tous les plus mauuais offices du monde , mesdisant ordinairement de moy , & se persuadant , si elle auoit vn fils , & qu'elle se pust deffaire de moy , d'espouser le Roy mon mary , lequel estant de retour à Bauiere auoit resolu d'aller à Pau , & de m'y mener ou de gré où de force. Ces aduis me mettoient en la peine que l'on peut penser. Toutefois ayant toujours fiance en la bonté de Dieu & en celle du Roy mon mary , ie passay le temps de ce séjour de Bauiere en l'attendant , & versant autant de larmes qu'eux beuuoient de gouttes des eaux où ils estoient ; bien que i'y fusse accompagnée de toute la noblesse Catholique de ce quartier - là , qui mettoit toute la peine qu'elle pouuoit pour me faire oublier mes ennuis. Au bout d'un mois on cinq semaines , le Roy mon mary reuenant avec Fosseuse & ses autres compagnes , sceust de quelqu'un de ces Seigneurs qui estoient avec moy l'ennuy où i'estois pour la crainte que i'auois d'aller à Pau ; Qui fut cause qu'il ne me pressa pas tant d'y aller & me dit seulement qu'il eut bien desiré que ie leussé voulu. Mais voyant que mes larmes & mes paroles luy disoient ensemble que i'aymerois plustost la mort , il changea de dessein , & retourna mes à Nerac , où voyant que tout le monde parloit

de la grosseſſe de Foſſeuſe , & que non ſeulement en noſtre Cour , mais par tout le pays cela eſtoit commun , ie voulus taſcher de faire perdre ce bruit , & me reſolus de luy en parler & la prenant en mon cabinet ie luy diſ ; Encore que depuis quelque temps vous vous ſoyez eſtrangée demoy , & que l'on m'aye voulu faire croire que vous me faites de mauuais offices auprès du Roy mon mary, l'amitié que ie vous ay porté , & celles que i'ay vouée aux perſonnes d'honneur à qui vous appartenez ne me peut permettre que ie ne m'offre de vo⁹ ſecourir au mal-heur où vous vous trouuez , que ie vous prie de me nier , & ne vouloir ruiner d'honneur & vous & moy , qui ay autant d'intereſt au voſtre , eſtant à moy comme vous - meſme , & croyez que ie vous feray office de mere. l'ay moyen de m'en aller ſans couleur de la peſte que vous voyez qui eſt en ce pays ; & meſme en cette ville , au Mas d'Aginois , qui eſt vne maiſon du Roy mon mary qui eſt fort eſcartée. Je ne meneray avec moy que le train que vous voudrez. Cependant le Roy mon mary ira à la chaſſe d'un autre coſté , & ne bougeray de là que vous ne ſoyez déliurée , & ferons par ce moyen ceſſer ce bruit qui ne m'importe moins qu'à vous. Elle au lieu de m'en ſçauoir gré ; avec vne arrogance extrême me diſt qu'elle feroit mentir tous ceux qui en auoient parlé ; Que depuis quelque temps ie ne l'aimois point , & que ie cherchois pretexte pour la ruiner. Et parlant auſſi haut que ie luy auois parlé bas , elle ſort

route en colere de mon cabinet, & y va mettre le Roy mon mary; en sorte qu'il se courrouça fort à moy de ce que j'auois dit à sa fille, qu'elle feroit mentir tous ceux qui la taxoient, & m'en fit mine fort long-temps, & jusques à tant que s'estans passez quelques mois vint l'heure de son temps. Le mal luy prenant au matin au point du iour estant couchée en la chambre des filles, elle enuoya querir mon Medecin, & le pria d'aller auertir le Roy mon mary; ce qu'il fit. Nous estions couchez en vne mesme chambre en diuers lits, comme nous auions accoustumé. Comme le Medecin luy dist cette nouuelle il se trouua fort en peine ne sçachant que faire, craignant d'un costé qu'elle fust decouuerte, & de l'autre qu'elle fust mal secourüe, car il l'aimoit fort. Il se resolut enfin de m'auouer tout, & me pria de l'aller faire secourir, sçachant bien que quoy qui se fust passé il me trouueroit toujours prest de le servir en ce qui luy plairoit. Il ouure mon rideau, & me dit, Madame, ie vous ay celé vne chose qu'il faut que ie vous auouë. Je vous prie de m'en excuser, & de ne vous point souuenir de tout ce que ie vous ay dit pour ce sujet. Mais obligez-moy tant que de vous leuer tout à cete heure, & aller secourir Fosseuse qui est fort mal; ie m'assure que vous ne voudriez, la sentant en cet estat, vous ressentir de ce qui s'est passé. Vous sçavez combien ie l'aimé; ie vous prie obligez-moy en cela. Je luy dis que ie l'honorerois trop pour m'offenser de chose qui viendrait de luy; Quand

ie m'y en allois, & y ferois comme si c'estoit ma fille; Que cependant il s'en allast a la chaste & emmenast tout le monde, afin qu'il n'en fust point oüy parler. Je la fis promptement oster de la chambre des filles, & la mis en vne chambre écartée, avec mon Medecin & des femmes pour la servir, & la fis tres-bien secourir. Dieu voulut qu'elle ne fit qu'une fille, qui encore estoit morte. Estant delivrée on la porta à la chambre des filles, où bien que l'on apportast toute la discretion que l'on pouvoit, on ne pût empescher que le bruit ne fust semé par tout le Chasteau. Le Roy mon mary estant reuenu de la chasse la va voir, comme il anoit accoustumé. Elle le prie que ie l'allasse voir; comme j'auois accoustumé d'aller voir toutes mes filles quand elles étoient malades, pensant par ce moyen oster le bruit qui couroit. Le Roy mon mary venant en la chambre me trouue que ie m'étois remise dans le lit, estant lassé de m'estre leuée si matin, & de la peine que j'auois eüe à la faire secourir. Il me prie que ie me leue & que ie l'aille voir. Je luy dis que ie l'auois fait lors qu'elle auoit eu besoin de mon secours, mais qu'à cette heure elle n'en auoit plus à faire; Que si j'y allois ie découurirois plustost que de couurir ce qui estoit, & que tout le monde me monsteroit au doigt. Il se fascha fort contre moy, & ce qui me déplût beaucoup, il me sembla que ie ne meritois pas cette recompense de ce que j'auois fait le matin. Elle le mit souuent en des hu-

meurs pareilles contre moy. Pendant que nous estions de cette façon, le Roy, qui n'ignoroit rien de tout ce qui se passoit en la maison de tous les plus grands de son Royaume; & qui estoit particulièrement curieux de sçavoir les deportemens de nostre Cour, ayant esté auerty de tout cecy, & conseruant encore le desir de vengeance qu'il auoit conceu contre moy pour l'occasion que i'ay dite de l'honneur que mon frere auoit acquis à la paix qu'il auoit faite, pense que c'estoit vn beau moyen pour me rendre aussi miserable qu'il desiroit, me tirant hors d'auprès du Roy mon mary, & esperant que l'éloignement seroit comme les onuertures du bataillon Macedonien. A quoy pour paruenir il me fit écrire par la Reyne ma mere qu'elle desiroit me voir; Que c'estoit assez d'auoir esté cinq ou six ans éloignée d'elle; Qu'il estoit temps que ie fisse vn voyage à la Cour, & que cela seruiroit aux affaires du Roy mon mary & de moy; Qu'elle connoissoit que le Roy estoit desireux de me voir, & que si ie n'auois des commoditez pour faire ce voyage le Roy m'en feroit bailler. Le Roy m'écriuit le semblable, & m'enuoyant Manniquet, qui estoit son Maistre d'hostel, pour m'y persuader (pource que depuis cinq ou six ans que j'estois en Gascogne ie n'auois iamais peu me donner cette volonté de retourner à la Cour) il me trouua lors plus aisée à receuoir ce conseil, pour le mécontentement que j'auois à cause de Fosseuse, luy en ayant

donné auis à la Cour. Le Roy & la Reyne m'écriurent deux ou trois fois coup sur coup, & me font déliurer quinze cens escus, afin que l'incommodité ne me retardast, & la Reyne ma mere me mande qu'elle viendroitu jusques en Xaintonge, & que si le Roy mon mary me menoit jusques-là, elle communiqueroit avec luy pour luy donner assurance de la volonté du Roy. Car il desiroit fort de le tirer de Gascogne pour le remettre à la Cour en la mesme condition qu'ils y auoient esté autre-fois mon frere & luy, & le Marechal de Matignon pouissoit le Roy à cela pour l'enuie qu'il auoit de demeurer tout seul en Gascogne. Toutes ces belles apparences de bien-veillance ne me faisoient point tromper aux fruits que l'on doit esperer de la Cour, en ayant eu par le passé trop d'experience. Mais ie me resolus de tirer profit de ces offres, & y faire vn voyage seulement de quelques mois, pour y accommoder mes affaires & celles du Roy mon mary, estimant qu'il seruiroit aussi comme de diuersion pour l'amour de Fosseuse que j'emmenois avec moy, & que le Roy mon mary ne la voyant plus, s'embarqueroit possible avec quelque autre qui ne me seroit si ennemie. I'eus assez de peine à faire consentir le Roy mon mary à me permettre ce voyage, pource qu'il se faschoit d'éloigner Fosseuse, & qu'il en fust parlé. Il m'en fit meilleure chere, desirant extrêmement m'oster cette volonté d'aller en France. Mais l'ayant desfa-

promis par mes lettres au Roy & la Reyne
ma Mere , mesmes ayant touché la somme
susedite pour mon voyage , le mal-heur qui
m'y tiroit l'emporta sur le peu de volonté
que i'auois lors d'y aller , voyant que le Roy
mon Mary recommençoit à me monstres
plus d'amitié.

F I N.















